

1 ያኑሲ ዓሶ ሃይሶ ኬኤዛ ማፃኣፖ ዓይያ ካር

ሃይ ያኑሲ ዓሶ ሃይሶ ኬኤዛ ማፃኣፖ ሳሙዔኤሌ ማፃኣፖና ካኣቶ ማፃኣፖናይዳ ኬኤዚንቴ ሃይሶ ዲማ ዲማ ጎይሢና ጊንሣ ለሚ ኬኤዛይ፤ ያኑሲ ዓሶ ሃይሶ ኬኤዛ ማፃኣፖይዳ ዒሰራዔኤሌ ዓጮ ካኣታ ወይሢ ሃይሶ ዛሎኮ ላምዖ ዴኤፐ ዴኤፐ ማለሢ ዓኣሢ ኬኤዚንቴ።

1. ዒሰራዔኤሌንታ ዪሁዳንታኮ ካኣታ ባይሲንታይዳ ኬዴያ ማዔያታቴያ ያኑሲ ዴርም ዒንጌ ሃጊ ማዓንዳ ዎዞ ቃኣሎ ቢያ ሃሽባኣፖ ካፔያ ማዔሢና ዪሁዳይዳ ናንጋ ዓሶ ዛሎና ዒዚ ፔ ዴርም ማላ ማሊያ ማዳይዳ ፔኤሽያ ማዔሢ ዔርዛይ፤ ሃና ማፃኣፖ ፃኣፔ ዓሢ ዬይ ሃይሳ ጎኔ ማዔያኮ ዓይሢ ካራ ዒዛም ማዓንዳፔዳ ዳውቴንታ ሴሎሞንታ ማዳ ዴኤፖ ዴኤፖ ማዳ፤ ሃሣ ጊንሣ ዒዮሳፕጂንታ ሂዘቅያሴንታ ዒዮሲያሴንታ ዔኪ ሙኩ፤ ያኑሲና ዎላ ዓኣ ጫኣቁሞ ዓካሲያንታ ያኑሲም ጉሙርቅንታያ ማዔያ ዶዲሺ ዓርቁ ዴር ሃይሶ ባንሢ ማሊያ ዔኪ ዳካ።

2. ዬሩሳላሜይዳ ዓኣ ጌኤዦ ማኣርይዳ ያኑሲ ካኣሽኪሢ ዎይቲ ዓርቅንቴቴያ ዔርዛይኬ፤ ባሼ ሃሣ ካኣዦ ዎጎ ማዲ ከንሣ፤ ቁኤሶንታ ለዊ ዓሶንታኮ ዎላ ፔቴ ማዔ ማዳ ማዳ ዎይቲ ዓርቅንቴቴያ ዔርዛይኬ፤ ጌኤዦ ማኣር ማዦሢ ሴሎሞኔ ማዔቴያ ጌኤዦ ማኣርንታ ካኣዦ ዎጎንታ ማዲንታንዳ ጎይያ ጊኢጊሼሢሢ ዳውቴ ማዔያ ዔርዛይኬ።

ማፃኣፔላ ዲማ ዲማ ዓርቁ ባኮ

- ዓዳኣሜ ዜርዎኮ ዴንዲ ካኣቲ ሳኣዎኦሌ ሄላንዳኣና (1:1—9:44)
- ሳኣዎኦሌና ናኣቶናኮ ሃይሶ (10:1-14)
- ዳውቴኮ ካኣታዲያ፤ ሃሣ ዬሩሳላሜ ዒዚ ዓርቁሢ (11:1-9)
- ዳውቴኮ ዔርቴ ፖኦሊሶ (11:10—12:40)
- ጫኣቁሞ ሳኣፂኖኮ ዬሩሳላሜ ዔውቴያ (13:1—16:43)
- ጌኤዦ ማኣር ሴሎሞኔ ማዦንዳያ ማዔሢ (17:1-27)
- ዳውቴ ያሎና ባሼ ባሺያ (18:1—20:8)
- ዳውቴ ዴር ፓይይሢር ያኑሲ ዳጋዴሢ (21:1-30)
- ጌኤዦ ማኣር ማዦኒ ጊኢጊንቶና ጊኢጊንቲ (22:1—28:21)
- ጌኤዦ ማኣር ማዦኒ ዴራ ዒንጌ ባኮ (29:1-20)

ሴሎሞን ካኣታዳሢ (29:21-25)
ዳውቴኮ ሃይሶ (29:26-30)

ዓዳአሜይዳፓ ዳንዲ ዓብራሃሜ ሄላንዳአና ሾይንቲ ዓሶ ዜርዖ
(ማዢ. ማፃ 5:1-32፤ 10:1-32፤ 11:10-26)

- 1 ዓዳአሜ:- ሴቲ፣ ሴቲ ሄኖሴ፣ ሄኖሴ ቃይናኔ ሾዔኔ፤
- 2 ቃይናኔ ሜላሊዔኤሌ፣ ሜላሊዔኤሌ ያሬዳ ሾዔኔ፤ ዩያታ ፔ ሱንሢና ሱንሢና ዔኤሊንታ ዳሮኮ ቤርታሳ ማዖንሢኬ።
- 3 ያሬዳ:- ሄኖኬ፣ ሄኖኬ ማቶሳላ፣ ማቶሳላ ላሚሄ ሾዔኔ፤
- 4 ላሚሄ ኖሄ፣ ኖሄ ሴኤሜንታ ካአሜንታ ያአፔቴንታ ሾዔኔ።
- 5 ያአፔቴያ ጎሜሬ፣ ማጎጌ፣ ማዳያ፣ ያዋኔ፣ ቱባሌ፣ ሜሼኬንታ ቲራሴ ጌይንታ ዓቲንቁ ናይ ሾዔኔ፤ ዩያታ ፔኤኮ ሱንዖና ሱንዖና ዔኤሊንታ ዳሮኮ ቤርታሳ ማዖንሢኬ።
- 6 ጎሜሬ ናኣታ ዓሽኬናዜ፣ ሪፖቴንታ ቶጋርማንታኬ።
- 7 ያዋኔ ናኣታ:- ዔሊሻ፣ ዒሰፔኔ፣ ቆጵሮሴንታ ሮዳ ዳሮንታኬ።
- 8 ካአሜኮ ዓቲንቆ ናኣታ ኩሼ፣ ሚዒራይሜ፣ ፑኤዲንታ ካአናኔንታ ማዓዛ ዩያታ ፔኤኮ ሱንዖና ሱንዖና ዔኤሊንታ ዳሮኮ ቤርታሳ ማዖንሢኬ፤
- 9 ኩሼ ዜርዖ:- ሳባ፣ ሃዊላ፣ ሳቢታ፣ ራዒማንታ ሳቢቲካ ጌይንታ ዳሮኬ፤ ራዒማኮ ዓቲንቆ ናኣታ:- ሳባና ዳዳኔናኬ።
- 10 ኩሼ ናምሩዳ ሾዔኔ፤ ዩይ ናምሩዳ ዓጩዳ ቤርታዲ ዖልዚና ዔርቲ ዓሲ ማዒ ኬሰኬኔ።
- 11 ጊብዔ ዜርዖ:- ሉዲሜ፣ ዓናሚሜ፣ ሌሃቢሜ፣ ናፕቱሄሜ፣
- 12 ፔትሩሲሜ፣ ካሰሉሂሚና ፒሊሰዔኤሜ ዓሶኮ ቤርታሳ ዓድንሢ ማዔ ቁርዔሴ ዳሮኬ።
- 13 ካአናኔ ናኣቶኮ ቶይዳሢ:- ዒደኔ፤ ጌኤዛሢ ሄቲ ማዓዛ ዩያታ ፔኤኮ ሱንዖና ሱንዖና ዔኤሊንታ ዳሮኮ ቤርታሳ ዓድንሢኬ።
- 14 ዩያጉዲ ሃሣ ዒዚ፣ ዩይ፣ ካአናኔ:- ዒያቡሳ ዓሶ፣ ዓሞራ ዓሶ፣ ጌርጌሳ ዓሶ፣
- 15 ሄዋዌ ዓሶ፣ ዓርቃ ዓሶ፣ ሲናዌ ዓሶ፣
- 16 ዓርዋዳ ዓሶ፣ ዔማራ ዓሶንታ ሃማታዌ ዓሶኮ ቤርታሳ ዓድሢኬ።
- 17 ሴኤሜ ናኣታ:- ዔላአሜ፣ ዓሶኦሬ፣ ዓርፓክሳዳ፣ ሉዳ፣ ዓራሜ፣ ዑዳ፣ ሁሌ፣ ጌቲሬንታ ሜሼኬንታ ማዓዛ ዩያታ ፔኤኮ ሱንዖና ሱንዖና ዔኤሊንታ ዓጵኮ ማዖንሢኬ።
- 18 ዓርፓክሳዳ ሼላሄ ሾዔኔ፤ ሼላሄ ዔቦሬ፣

19 ዔቦሬ ሃሣ ላምዎ ዓቲንቁ ናይ ሾዔኔ፤ ዒዛ ዎደና ዓጮ ዳራ ፓቁንቴሣሮ ዒዛኮ ቶይዶ ናዓሢኮ ሱንፃ ፔሌጌ ጌይንቲ ጌሢንቴኔ፤ ጌኤዛሢ ሱንፃ ዮቅፃኔ ጌይንቴኔ።

20 ዮቅፃኔ ዜርፃ፡- ዓልሞዳዳ፡ ሹሌፔ፡ ሃፃርማዌቴ፡ ዬራሄ፡

21 ሃደራሚ፡ ዑዛሌ፡ ዲቅላ፡

22 ዔባሌ፡ ዓቢማዔሌ፡ ሳባ፡

23 ፆፕሬ፡ ሃዊላንታ ዮባቤ ጌይንታ ዳሮንታኬ።

24 ሴኤሜፓ ዳንዲ ዓብራሃሜ ሄላንዳኣና ዓኣ ሾይንቶ ዜርፃ፡- ሴኤሜ፡ ዓርፓክሳዳ፡ ሹላሄ፡

25 ዔቦሬ፡ ፔሌጌ፡ ሬዑኔ፡

26 ሴሩጌ፡ ናኮሬ፡ ታራንታ

27 ጊንፃፓ ሱንፃ ዓብራሃሜ ጌይንቲ ላኣሚንቴ ዓብራሜንታ ቢያሢኬ።

ዒስማዔኤሌ ዜርፃ

(ማዢ. ማፃ 25:12-16)

28 ዓብራሃሜ፡- ዪሳኣቁና ዒስማዔኤሌና ሾዔኔ፤

29 ዒስማዔኤሌ ናኣታ ታጰ ላምዎ ፃጲኮ ሱኡጌ ማዔኔ፤ ዬያታ ፃጰ ዒስማዔኤሌኮ ቶይዶ ናዓሢ ሱንፃና ዔኤሊንታ ኔባዮቴ፡ ቁፃሬ፡ ዓድቤዔሌ፡ ሚብሳሚ፡

30 ሚሸማዔ፡ ዲማ፡ ማሳ፡ ሃዳዳ፡ ቲማ፡

31 ዪፀሬ፡ ናፕሹንታ ቁድማ ጌይንታ ፃጰኬ።

32 ዓብራሃሜም ኬፀራ ጌይንታ ዒዛኮ ጊንፃ ማቾስኬና ዚምራኔ፡ ዮቅሻኔ፡ ሚዳኔ፡ ሚዲያሚ፡ ዮሸባቁና ሹሃ ጌይንታ ላሆ ዓቲንቁ ናይ ሾዔኔ። ዮቅሻኔያ ሳባና ዳዳኔ ጌይንታ ላምዎ ዓቲንቁ ናይ ሾዔኔ፤

33 ሚዲያሚ ሃሣ ዔፓ፡ ዔፔሬ፡ ሃኖኬ፡ ዓቢዳዔና ዔልዳዔ ጌይንታ ደንሳ ዓቲንቁ ናይ ሾዔኔ።

ዔኤሳዎ ዜርፃ

(ማዢ. ማፃ 36:1-19)

34 ዓብራሃሜ ናኣዚ ዪሳኣቁ ዔኤሳዎና ያይቆኦቤና ሾዔኔ፤

35 ዔኤሳዎ፡- ዔሊፓዜ፡ ሬዑዔኤሌ፡ ዪዑሹ፡ ያዕላሜንታ ቆራሂንታ ሾዔኔ፤

36 ዔሊፓዜ፡- ቲማኔ፡ ፆማሬ፡ ጌፔ፡ ጋዕታሚ፡ ቁናዜ፡ ቲምናዔንታ ዓማሌቁ ጌይንታ ላምዎ ፃጰኮ ቤርታሳ ዓዶ ማዔኔ።

37 ሬዑዔኤሌያ፡ ናሃቴ፡ ዛራሄ፡ ሻማናንታ ሚዛ ጌይንታ ፃጰኮ ቤርታሳ ማዓሢ ማዔኔ።

ቤርታዲ ዔደአሜ ዓጮይዳ ናንጋ ዓሶ
(ማዢ. ማፃ 36:20-30)

38-42 ቤርታዲ ዔደአሜይዳ ናንጋ ዓሶ ሴዒሬ ናኦቶ ዜርያ ማዓዛ
 ዔያታ:- ሎፃኔ፥ ሸባል ፃባዖኔ፥ ዓና፥ ዲሾኔ፥ ዔፃሬና ዲሻኔናኩ።
 ሎፃኔ ናኦታ:- ሆሪና ሆማሚና ማዓዛ ቲሚና ሎፃኔኮ ጌሮኩ።
 ሸባሌ ናኦታ:- ዓልዋኔ፥ ማናሃቲ፥ ዔባል ሸፒና ዖናሚናኩ።
 ፃባዖኔ ናኦታ:- ዓያና ዓናናኩ።
 ዓና ናኦዚ ዲሾኔኩ።
 ዲሾኔ ናኦታ:- ሄሚዳኔ፥ ዔሸባኔ፥ ዒትራኔና ኪራኔናኩ።
 ዔፅሬ ናኦታ:- ቢልሃኔ፥ ዛዕዋኔና ዓቃኔናኩ።
 ዲሾኔ ናኦታ:- ዑፃና ዓራኔናኩ።

ዔደአሜ ዓጮ ካኦቶ
(ማዢ. ማፃ 36:31-43)

43 ዒሰራዔኤሌ ዓጮይዳ ካኦታ ካኦታዲዋንቲ ዔደአሜ ዓጮ
 ሃይካፓ ዴማ ፓይዲንታ ካኦቶንሢ ዋሊ ሄሊ ሄሊ ካኦታዴኔ፤
 ዩንሢያ:- ዲንሃባ ጌይንታ ካታማ ሾይንቲ ቤዖሬ ናኦዚ ቤላዔ
 ካኦታዴኔ፤
 44 ቤላዔ ሃይቃዛ ዒዛ ቤዛ ባሶሬ ዓጮ ዓሢ ዛራ ናኦዚ ዮባቤ
 ካኦታዴኔ።
 45 ዮባቤ ሃይቃዛ ቲማኔ ዓጮ ዓሢ ሁሻሚ ካኦታዴኔ፤
 46 ሁሻሚ ሃይቁሰካፓ ሞዓኦቤ ዓጮይዳ ሚዲያሚ ዓሶ ዖሎና
 ባሽ ቤዳዴ ናኦዚ፥ ሃዳዴ ካኦታዴኔ፤ ዒዚ ካኦታዲ ዴዔ ካታሚላ
 ዓዋ ጌይንታኔ፤
 47 ሄሊሳዖ ሃዳዴ ሃይቃዛ ማሰሬቃ ዓጮ ዓሢ ሳሚላ ካኦታዴኔ።
 48 ሳሚላ ሃይቁሰካፓ ዔፕራዲሴ ዋሮ ዓጮ ዓኦ ሬሃቦቲይዳ
 ሾይንቲ ሻዑሌ ካኦታዴኔ።
 49 ሻዑሌ ሃይቃዛ ዓክቦሬ ናኦዚ፥ ቤዓልሃናኔ ካኦታዴኔ፤
 50 ቤዓልሃናኔ ሃይቁሰካፓ ፓዑ ካታሞ ዓሢ፥ ሃዳዴ ካኦታዴኔ፤
 ሃዳዴኮ ማቻ፥ ሚሃፃቤሎ ጌይንታያ ዛሃቤኮ ናኦዚ ናዖ ማዔሢ
 ማናሬንዴ ናይኩ።
 51 ሃዳዴያኦ ሃይቁኔ፤ ዩካፓ ሃሣ ዔደአሜ ዓሶኮ ሱኡጎ
 ማዔዘንሢ:- ቲሞናዒ፥ ዓልዋ፥ ዩቲቲ፥
 52 ዖሆሊባማ፥ ዔላ፥ ፒኖኔ፥
 53 ቁናዜ፥ ቲማኔ፥ ሚብሳሬ፥
 54 ሚግድዔሌና ዒራሚ ጌይንታዘንሢኩ።

2

ዪሁዳ ዜርዖ

1 ዲሰራዔኤሌ ታጳ ላምዖ ዓቲንቄ ናይ ሾዔኔ፤ ዔያታ፡-
ርእቤኤሌ፡ ሲሞኑኔ፡ ሌዋ፡ ዪሁዳ፡ ዪሳኮኦሬ፡ ዛብሎኦኔ፡

2 ዳኦኔ፡ ዮሴፔ፡ ቢኢኒያሜ፡ ኒፕታኦሌኤሜ፡ ጋኦዳገታ
ዓሴኤሬገታኩ።

3 ዪሁዳ ፔኤኮ ማቾ ካኦኔ ናጮ ላኦሌሎ፡ ባትሹዖይዳፓ
ሃይሃ ዓቲንቄ ናይ ሾዔኔ፤ ዪንሢያ፡- ዔሬ፡ ዖናኔና ሹላ ጌይገታያኩ፤
ዒዛኮ ቶይዶ ናዓሢ ዔሬ ናንጊና ናንጋ ጎዳም ዓይሢንቴዎ ሚርጌና
ፑርታታሢር ናንጊና ናንጋ ጎዳ ዒዛ ዎዴኔ፤

4 ዪሁዳ ፔኤኮ ናኦዚ ማቾ ቲዕማርፓ ፓርሴና ዛራሃ ጌይገታ
ላምዖ ዓቲንቄ ናይ ሾዔኔ፤ ዪሁዳኮ ዎሊ ዑዖ ዶንጎ ናይ ዓኦኔ።

5 ፓርሴያ ሄዲርኔና ሃሙሌ ጎዖ ላምዖ ዓቲንቄ ናይ ሾዔኔ፤

6 ዒዛኮ ጌርሲ ዛራሃ ዶንጎ ዓቲንቄ ናይ፡- ዚምሪ፡ ዔታኔ፡ ሄማኔ
ካልኮሌና ዳርዳዔ ጎዖዛንሢ ሾዔኔ፤ ዒዛኮ ዎሊ ዑዖ ዶንጎ ናይ
ዓኦኔ።

7 ዛራሃ ዜርዖፓ ፔቴይ ካርሚናዓሢ፡ ዓካኔ ዖሎና ባሺ ዲዒ ዔኪ
ናንጊና ናንጋ ጎዳም ዲማሶና ባኮ ዉኡቂ ዔኪ ዓኦቹሢር ናንጊና
ናንጋ ጎዳ ዲሰራዔኤሌ ዳርይዳ ማቶ ዓጌኔ።

8 ዔታኔ ዓዛሪያ ጌይገታ ፔቴ ዓቲንቄ ናይ ሾዔኔ።

ካኦቲ ዳውቲ ማኦር ዓሶ

9 ሄዲርኔ ጎዖሢ ሃይሃ ዓቲንቄ ናይ፡- ዪራህሜዔሌ፡ ራማና
ካኦሌቤ ጎዖዛንሢ ሾዔኔ፤

10 ዓራሜ ዓምናኦዳኦኤኮ ዓዶኬ፤ ዓምናኦዳኦኤያ ዪሁዳ ናኦቶኮ
ሱኡጌ ማዔ፡ ኔዓሶኔ ሾዔኔ።

11 ዪካፓ ኔዓሶኔ ሳልሞኔ፤ ሳልሞኔ ቦዔዜ ሾዔኔ።

12 ሄሊሳዖ ቦዔዜ ዒዮቤዳ ሾዓዛ፡ ዒዮቤዳ ዒሴዬ ሾዔኔ፤

13 ዒሴዬ ለንካይ ዓቲንቄ ናይ ሾዔኔ፤ ዔያታ ዎሊ ሄሊ ሄሊ
ሾይገቲ ጎይዖ ሃካፓ ሊካፓይዲገቲ፡- ዔሊዓቤ፡ ዓቢናዳኦኔ፡ ሻማ፡

14 ናትናዔሌ ራዳዬ፡

15 ዓፄሚና ዳውቲናኩ።

16 ዒማና ዒሴዬ ጂሩያና ዓቢጋይሎ ጌይገታ ላምዖ ዉዳር
ናይሰኬንሢያ ሾዔኔ፤

ዒሴዬ ናኦ፡ ጂሩያ ሃይሃ ዓቲንቄ ናይ፡- ዓቢሻዬ፡ ዒዮዓቤና
ዓሳሄሌ ጎዖዛንሢ ሾዔኔ።

17 ሃንሳ ሃሣ ዒሴዬኮ ናኦ፡ ዓቢጋይላ ዒሰራማዔሌ ዜርፃሣ ሄቴሬም ሎዓዖ ዓማሳ ጌይንታ ዓቲንቄ ናይ ሾዔኔ።

ሄደሮኔ ዜርፃ

18 ሄደሮኔ ናኦዚ ካኦሌቤ፡- ዓዙባ ጌይንታ ላኦሊሰኬኖ ዔኪ ዪሪዖቴ ጎዖ ዉዱሮ ናይ ሾዔኔ፤ ዪሪዖቴ፡- ዬሹሬ፣ ሾባቤና ዓርዶኔ ጌይንታ ሃይሣ ዓቲንቄ ናይ ሾዔኔ።

19 ዓዙባ ሃይቄሰካፓ ካኦሌቤ ዔፕራታ ጌይንታ ላኦሊሰኬኖ ዔኪ ሁሪ ጌይንታ ዓቲንቄ ናይ ሾዔኔ፤

20 ዬካፓ ሁሪ ዑሬ፤ ዑሬ ገንሣ ባደዔሌ ጌይንታ ዓቲንቄ ናይ ሾዔኔ፤

21 ሄደሮኔኮ ለዓ ላሂታሚ ማዓዛ ጌሌዓዴ ጎዖሢኮ ጌር ማኪሪና ዔካዖ ሱፐቤ ጌይንታ ዓቲንቄ ናይ ሾዔኔ፤

22 ዬካፓ ሱፐቤ ያዒሬ ሾዔኔ፤ ዬይ፡ ያዒሬ ጌሌዓዴ ዓጮይዳ ዓኦ ላማታሚ ሃይሣ ካታማ ዬኖ ዎደና ዎይሣያኬ፤

23 ጋዓንቴ ጌሹሬና ዓራሜ ዓጮ ካኦቶና ላሂታሚ ማዓ ዳኮ ዳኮ ካታሞ ዬያ፡ ጌሌዓዴይዳፓ ዖሎና ባሺ ዓርቄኔ፤ ዬያታ፡- ያዒሬንታ ቄናቲኔንታ ጉርዶ፤ ዬያጉዲ ዔያቶኮ ኮይላ ዓኦ ዳኮ ዳኮ ካታሞንሢያ ቃሲ ዓርቃያኬ፤ ዒኦካ ናንጋ ዴራ ቢያ ጌሌዓዴኮ ዓዶ ማኪሬ ዜርሢኬ፤

24 ሄደሮኔ ካኦሌቤ ጌይንታ ዓጮ፡ ዔፕራታይዳ ሃይቄሰካፓ ዓቢያ ጌይንታ ዒዛ ማቻ ዓሽሁሪ ጌይንታ ዓቲንቄ ናይ ሾዔኔ፤ ዓሽሁሪ ቴቆዓ ጌይንታ ካታማ ማክፎ።

ዪራህሚዔሌ ዜርፃ

25 ሄደሮኔኮ ናኦዚ ቶይዲ፡ ዪራህሚዔሌ ደንሳ ዓቲንቄ ናይ ሾዔኔ፤ ዔያታ፡- ቤርታሳ ቶይዲሢ ራሜ፡ ሄሊሴሢ ቡና፡ ሃይሣሳሢ ዖሬኔ፡ ዖይዳሳሢ ዓፄሜ፡ ደንጋሳሢ ዓሂያ ጌይንታያኬ።

26-27 ራሜ ሃይሣ ዓቲንቄ ናይ፡- ማዓፄ፡ ያሚኔና ዔቄሪ ጌይንታሰኬንሢ ሾዔኔ፤ ዒማና ዪራህሚዔሌ ዓታራ ጌይንታ ፔቴ ሜሌ ላኦሊሰኬኖ ዔኪ ዖናሜ ጌይንታ ዓቲንቄ ናይ ሾዔኔ፤

28 ዬያጉዲ ሃሣ ዖናሜ ሻማያና ያዳዔ ጌይንታ ላምዖ ዓቲንቄ ናይ ሾዔኔ፤ ሻማያኦ ናኦዳኦቤና ዓቢሹሬ ጌይንታ ላምዖ ዓቲንቄ ናይ ሾዔኔ።

29 ዓቢሹሬ ዒማና ዓቢሃይሎ ጌይንታ ፔቴ ላኦሊሰኬኖ ዔኪ ዓህባኔና ሞሊዴ ጌይንታ ላምዖ ዓቲንቄ ናይ ሾዔኔ፤

30 ዓቢሹ ራከ ገርሲ ናኣዳኣቤ ሴሌዳና ዓገይሜ ገይነታ ላምዎ ዓቲንቄ ናይ ሾዔኔ፤ ሴሌዳ ጋዓንቴ ፔቴታዎ ዓቲንቄ ናይ ሾዑዋዎ ሃይቄኔ።

31 ዓገይሜ ዪሺዒ ገይነታ ዓቲንቄ ናይ ሾዔኔ፤ ዬካፓ ዪሺዒያ ሹሻኔ ገይነታ ዓቲንቄ ናይ፡ ሹሻኔ ዓህላዬ ገይነታ ዓቲንቄ ናይ ሾዔኔ።

32 ሻማዬኮ ገርሲ ያዳዔ ዬቴሬና ዮናታኣኔ ገይነታ ላምዎ ዓቲንቄ ናይ ሾዔኔ፤ ዬቴሬ ጋዓንቴ ዓቲንቄ ናይ ሾዑዋዎ ሃይቄኔ፤

33 ዮናታኣኔ ፔሌቴና ዛዛ ገይነታ ላምዎ ዓቲንቄ ናይ ሰከንህሂ ሾዔኔ፤ ዬንህሂ ቢያ ዪራህሜዔሌ ዜርዖኔ።

34 ዔሻኔኮ ዉዱሮ ናይዳፓ ዓታዛ ዓቲንቄ ናይ ባኣሴ፤ ዒዛኮ ያሬሃዔ ገይነታ ፔቴ ገብፂ ዓሲታዎ ማዶ ማዳሰከይ ዓኣኔ፤

35 ዬያ ማዳህሞ ዒዚ ፔኤኮ ዉዱሮ ናኣቶይዳፓ ፔቴዛ ማቸማሂ ዒንገኔ፤ ዬካፓ ያሬሃዔ ዓታዬ ገይነታ ዓቲንቄ ናይ ሾዔኔ፤

36 ዓታዬይዳፓ ዳንዲ ዔልሻማዔ ሄላንዳኣና ዋሊ ሄሊ ሄሊ ከሰከኔ ሾይነታ፡- ዓታዬ፡ ናኣታኣኔ፡ ዛባዳ፡

37 ዔፕላሌ፡ ዖቤዳ፡

38 ዬሁ፡ ዓዛሪያ፡

39 ሄሌፂ፡ ዔልዓሳ፡

40 ሲሰማዬ፡ ሻሉሜ፡

41 ዪቃምያንታ ዔሊሻማዔንታኔ።

ዓቲ ሃሃ ካኣሌቤ ዜርዖ

42 ዪራህሜዔሌኮ ገርሲ ማዔ ካኣሌቤኮ ቶይዶ ናዓሂኮ ሱንፃ ሜሻዔ ገይነታኔ፤ ዬይ ሜሻዔ ዚፔ ገይነታ ዓቲንቄ ናይ ሾዔኔ፤ ዬካፓ ዚፔ ማሬሻኔ ሾዓዛ፡ ማሬሻኔ ሃሃ ከብሮኦኔ ሾዔኔ።

43 ከብሮኦኔ፡- ቆራሂ፡ ታፑሃ፡ ሬቄሜንታ ሹማዔ ገይነታ ያይዶ ዓቲንቄ ናይ ሾዔኔ።

44 ሹማዔያ ራሃሜ ሾዓዛ፡ ራሃሜ ዮርቄዓሜ ሾዔኔ፤ ሹማዔኮ ገርሲ ሬቄሜ ሻማዬ ሾዔኔ፤

45 ሻማዬ ማዖኔ ሾዓዛ፡ ማዖኔ ቤትፁሬ ሾዔኔ።

46 ካኣሌቤኮ ዔፓ ገይነታ ሜሌ ላኣሊሰከና ዓኣኔ፤ ዒዛይዳፓ ካኣሌቤ፡- ሃራኔ፡ ሞፃንታ ጋዜዜ ገይነታ ሜሌ ሃይሃ ዓቲንቄ ናይ ሾዔኔ፤ ሃራኔ ሃሃ ጋዜዜ ገይነታ ሜሌ ዓቲንቄ ናይ ሾዔኔ።

47 ያህዳዬ ገይነታ ዓሂ፡- ሬገሜ፡ ዮታሜ፡ ገሻኔ፡ ፔሌፂ፡ ዔፓና ሻዓፔ ገይነታ ላሆ ዓቲንቄ ናይ ሾዔኔ።

48 ካኣሌቤኮ ማዕካ ጌይነታ ሜሌ ላኣሊሰኬና ዓኣነቲ ዒዘይዳፓ ዒ ሹቤሬና ቲርሃ ጌይነታ ላምዖ ዓቲንቄ ናይ ሹዔኔ፤

49 ዬና ላኣሌላ ናንጊቤቃ ጊንፃፓ ሜሌ ላምዖ ዓቲንቄ ናይ ሹዔኔ፤ ዔያቶኮ ቶይዳሢ ማድማና ጌይነታ ካታሞ ማዜ፣ ሻዓፔ ማዓዛ ላምዓሳሢ ሃሣ ማክቢና ጊቢዓ ጌይነታ ላምዖ ካታሞንሢ ማዜ፣ ሻቀኬ።

ቃሲ ሃሣ ካኣሌቤኮ ዓክሳ ጌይነታ ፔቲ ዉዲር ናይሰኬና ዓኣኔ።

50 ሃካፓ ሊካ ዴማ ፓይዲነታዞንሢያ ካኣሌቤ ዜርዖኬ፡- ካኣሌቤ ፔኤኮ ማቾ ዔፕራታይዳፓ ሹዔ ቤርታሳ ናዓሢ ሁሬ ማዓዛ ሁሬኮ ናኣዚ፣ ቂሪያትይዓሪሜኮ ዓዴ ሹባሌኬ፤

51 ሁሬኮ ላምዓሳ ናዓሢ፣ ሳልሞኔ ቤቴልሃሜኮ ዓዴ ማዓዛ ሃይሣሳ ናዓሢ ሃሬፔ ቤትጋኣዴሬ ዓዴኬ።

52 ቂሪያትይዓሪሜ ዓዴ፣ ሹባሌኮ ሜሌ ናይ ዓኣኔ፤ ዬያታ፡- ሃሪዔቴና ማንሆቴ ቶኣኮኮ ዛሎኬ።

53 ዬያፕዲ ሃሣ ቂሪያትይዓሪሜይ ናንጋ ዩትራ ዓሳ፣ ፑታ ዓሳ፣ ሹማታ ዓሳና ሚሸራዓ ዓሶ ጌይነቲ ዔኤሊነታ ዜርዖኮ ቤርታሳ ዓዳሢ ሹባሌኬ፤ ዬያቶይዳፓ ሃሣ ዖርዓና ዔሸታዖሌ ጌይነታ ቶኣካ ኬሰኬኔ።

54 ቤኤቴሌሃሜ ካታሞ ማዜ፣ ሳልሞኔ ናኣታ፡- ኔፃፓ ዓሶንታ ዓፃርት ቤቴዮዓቤነታ ማናሃ ዓሶኮ ዛሎንታ ዖርዓ ዓሶንታኬ።

55 ቲርዓ ዓሶንታ ሺምዓ ዓሶንታ ሱካ ዓሶ ጌይነታ ቶኣኮንሢ ሃይሴ ፃኣፕሢና ጊንሣ ሃሣ ጊዳፓ ዔኪ ዲቢሺ ፃኣፕሢኮ ዔራቶ ዓኣያ፣ ያቤፄ ጌይነታ ዳካ ካታማሰኬማይዳ ናንጋያኬ፤ ዔያታ ሬካቤ ዓሶኮ ዓዴ፣ ሃሜቴና ዎላ ዔፒ ዛላና ካኣሜያ ቄና ዓሶኬ።

3

ካኣቲ ዳውቴ ናኣቶ

1-3 ዳውቴ ኬብርኣኔይይዳ ዓኣዖ ሹዔ ዓቲንቆ ናኣታ ዎሊ ጊንፃ ሃካፓ ዴማ ፓይዲነታኔ፡-

- ዒይዚራዔኤሌ ዓጮ ዓሴላ ዓሢኖዓማ ሹዔ ቶይዳሢ ዓምኖኣኔ፣
- ቄርሜሎሴ ላኣሌሎ ዓብጋይሎይዳፓ ሹይነቲ ዳኣኔኤሌ፣
- ጌሹሬ ካኣቲ ታልማዬ ናኣ ማዕካ ሹዔ ዓቤሴሎሜ፣
- ሃጊታ ሹዔ ዓድኒያሴ፣
- ዓቢፃላ ሹዔ ሹፓዲያ፣
- ዔግላ ሹዔ ዩትሬዓሜንታኬ፤

4 ዩንሢ ላሆ ናኣቶ ዒ ሾዔሢ ኩብርኦኔይዳ ናንጌ ዎደናኬ፤ ዳውቴ ኩብርኦኔይዳ ናንጌ ላንካይ ሌዔና ዛላና ዓጮ ዎይሢ።

ዩካፓ ዳውቴ ዩሩሳላሜይዳ ናንጌ ሃይሢታሚ ሃይሠ ሌዔ ዎይሢ፤

5 ዩኖ ቤዘይዳኣ ዒዚ ሚርጌ ዓቲንቄ ናይ ሾዔ።

ዒዘኮ ማቻ፡ ዓሚዔኤሌ ናኣ፡ ቤርሳቤ ዒዛም፡- ሸምዓ፡ ሸባቤ፡ ናኣታኔና ሴሎሞን ጌይንታ ዖይዶ ዓቲንቄ ናይ ሾዔ።

6 ዩንሢ ሌሊቱዎንቲ ሜሌ ዒዛኮ ታዘጳ ዓቲንቄ ናይያኣ ዓኣኔ፤ ዩያታ፡- ዩብሃሬ፡ ዔሊሹዓ፡ ዔሊፓሌ።

7 ኖጋሄ፡ ኔፔጌ፡ ያፒዓ፡

8 ዔሊሻማዓ፡ ዔሊያዳዔና ዔሊፔሌ፣ ጌይንታያኬ፤

9 ሃሃ ዩንሢዳፓ ሜሌ ሃንጎ ላኣሊና ሾዖና ዓቲንቄ ናይ ዓኣኔ፤ ዒዛኮ ቲዕማር ጌይንታ ዉዲር ናይሰኬናኣ ዓኣኔ።

ካኣቲ ሴሎሞን ዜርፃ

10 ካኣቲ፡ ሴሎሞንኮ ሾይንቶ ዜርፃ ዎሊ ሄሌ ጎይፃ ሃካፓ ዳማ ፓይዲንታኔ፤ ሴሎሞን፡ ርቢዓሜ፡ ዓቢያ፡ ዓኣሳ፡ ዒዮሳፒ፣

11 ዒዮራሜ፡ ዓካዚያሴ፡ ዒዮዓሴ፡

12 ዓሜሲያሴ፡ ዓዛሪያሴ፡ ዒዮዓታሜ፡

13 ዓካኣዜ፡ ሂዚቂያሴ፡ ሚናኣሴ፡

14 ዓሞኦኔንታ ዒዮሲያሴንታኬ፤

15 ዒዮሲያሴኮ ናኣዚ ቶይዲ ዮሃናኔ፤ ሄሌ ጌኤዚ ዒዮዓቁሜ፤ ሃይሠሳሢ ሴዳቂያሴ ማዓዛ ዖይዳሳሢ ሻሉሜኬ፤

16 ዒዮዓቁሜ ዒኮኒያኔና ፄዳቂያ ጌይንታ ላምዎ ዓቲንቄ ናይ ሾዔ።

ካኣቲ ዒኮኒያኔ ዜርፃ

17 ባብሎን ዓሳ ዖሎና ባሺ ዲዒ ዔኪ ቱኡሲ ዓሲ ማሄ ካኣቲ፡ ዮዓኪኔኮ ዜርፃ ሃይማፓ ዳማ ዓኣዘንሢኬ፤ ዒዚ፡ ዮዓኪኔ ላንካይ ዓቲንቄ ናይ ሾዔ፤ ዔያታኣ፡- ሳላቲያሌ፡

18 ማልኪራሜ፡ ፔዳያ፡ ሹናፃሬ፡ ዩቃሚያ፡ ሆሻማዓና ኔዳቤ ጎዎዘንሢ።

19 ፔዳያ ዜሬባቡሌና ሸምዒ ጌይንታ ላምዎ ዓቲንቄ ናይ ሾዔ፤ ዜሬባቡሌኮ ሃሃ ሚሹላሜና ሃናኒያ ጌይንታ ላምዎ ዓቲንቄ ናይና ሹሎሚቶ ጌይንታ ዉዲር ናይያኣ ዓኣኔ።

3:4 2ሳሙ. 5:4-5፤ 1ካኣቶ. ማ 2:11፤ 1ያሕሲ. ዓሃኬ 29:27። 3:5 2ሳሙ. 11:3።

20 ዬያጉዲ ሃሣ ፔዲያኮ ሜሌ ደንጎ ዓቲንቄ ናይ ዓኣያ ማዓዛ ዔያታ፡- ሃሹባ፣ ዓሄሌ፣ ቤሬኪያ፣ ሃሳድያና ዩሻብሄሴዴ ጌይንታያኹ።

21 ሃናኒያ ፔላዲና ዩሻዕያ ጌይንታ ላምዎ ዓቲንቄ ናይ ሾዔኔ፤ ዩሻዕያ ሬፓያ፤ ሬፓያ ዓርናኔ፤ ዓርናኔ ዓብዲዩኔ፣ ዓብዲዩኔያ ሹካኒያ ሾዔኔ።

22 ሹካኒያ ሹማዒያ፤ ሹማዒያ፡- ሃፁሹ፣ ዩጋሌ፣ ባሪያሄ፣ ኔዓሪያና ሻፓዳ ጌይንታ ደንጎ ዓቲንቄ ናይ ሾዔኔ፤ ዬያሮ ሹካኒያኮ ዜርፃ ዋሊ ዑፃ ላሆኹ፤

23 ኔዓሪያ፡- ዔልዮዔናዬ፣ ሂዚቄያሴንታ ዓዝሬቃሜ ጌይንታ ሃይሣ ዓቲንቄ ናይ ሾዔኔ፤

24 ዔልዮዔናዬያኣ፡- ሆዳውያ፣ ዔሊያሺቤ፣ ፔላያ፣ ዓቁቤ፣ ዮሃናኔ፣ ዴላያንታ ዓናኒ ጌይንታ ላንካይ ዓቲንቄ ናይ ሾዔኔ።

4

ዪሁዳ ማኣሮ ዜርፃ

1 ዪሁዳኮ ዜርፃ፡- ፓሬሴ፣ ሄዲሮኔ፣ ካርሚ፣ ሁሪና ሾባሌናኹ።

2 ሾባሌ ሬዓያ፤ ሬዓያ ያሃቴ ሾዔኔ፤ ዬይ፣ ያሃቴ ፆርዓይዳ ናንጋ ዓሶኮ ቤርታሳ ዓደንሢ ማዔ ዓሁማዬና ላሃዴ ጌይንታዞንሢ ሾዔኔ።

3-4 ሁሬ ካኣሌቤና ካኣሌቤኮ ማቾ ዔፕራታናኮ ቶይዶ ናዓሢኹ፤ ቤኤቴሌሂሜ ካታሞ ማዜዞንሢ ዒዛ ፃጶኹ፤ ዬይ፣ ሁሬ፡- ዔፃሚ፣ ፔኑዔሌና ዔዜሬ ጌይንታ ሃይሣ ዓቲንቄ ናይ ሾዔኔ፤ ዔፃሚ፡- ዒይዚራዔኤሌ፣ ዒሻማ፣ ዔድባሹንታ ጌዶሬ ካታሞ ማዜ፣ ፓኑዔሌንታ ሁሻኔ ካታሞ ማዜ፣ ዔፃሬ ሾዔኔ፤ ዬያቶኮ ሃፅሌልፓኖ ጌይንታ ጌሮሰኪና ዓኣኔ።

5 ቱቆዓኔ ካታሞ ማዜ፣ ዓሽሁሬኮ ሄላና ናዕራ ጌይንታ ላምዎ ላኣሊሰኪንሢ ዓኣኔ፤

6 ዓሽሬ ናዕራይዳፓ፡- ዓሁዛሜ፣ ሄፔሬ፣ ቱሚኒና ዓሃሽታሬ ጌይንታ ያይዶ ዓቲንቄ ናይ ሾዔኔ፤

7 ሃሣ ሄላ ጌይንታ ማቾይዳፓ፡- ጄሬቴ፣ ዪፀሃሬና ዔትናኔ ጌይንታ ሃይሣ ዓቲንቄ ናይ ሾዔኔ።

8 ቆፄ ጎዖሢ ዓኑቤና ያባቤ ጌይንታ ላምዎ ዓቲንቄ ናይ ሾዔኔ፤ ዬይ ቆፄ ሃሩሜ ናኣዚ ዓሃርሄሌ ዜርፃ ማዔዞንሢኮ ቤርታሳ ዓዳሢኹ።

9 ቆፄ ዜርፃ ባኣካ ሚርጌና ቦንቺንታ ያዕቤፄ ጌይንታ ፔቴ ዓሲ ዓኣኔ፤ ዒዚ ሾይንቱ ዎዶና ዒዛኮ ዒንዳ ሾይፆና ሚርጌ ሜታዳሢሮ ሱንፆ ዒዛኮ «ያዕቤፄ» ጌይ ጌሢኔ፤

10 ፔቴ ከሌ ያዕቤ።- «ታ ያኦሳህ! ታና ዓንጃ፤ ዳልጊ ዓጪ ታኦም ዓንገ፤ ፔቴታዎ ታጊዳፓ ዱማዲፓ፤ ታና ሜታሳኒ ዳንዳዓ ዓይጎዎ ፑርታ ባኦዚፓ ታና ካፔ» ጌይ ዒሰራዔኤሌ ያኦሳህ ሺኢቁም፣ ያኦሲያ ዒ ሺኢቁሂጉዲ ዒዛም ዋይዜኔ።

11 ሹሃኮ ጌርሲ ካሉቤ ሜሂሬ ጌይንታ ፔቴ ዓቲንቁ ናይ ሾዓዛ፣ ሜሂሬያ ዔሽቶኔ ሾዔኔ፤

12 ዔሽቶኔ ሃሣ ቤትራፓ፣ ፓሴሃና ቴሂና ጌይንታ ሃይሃ ዓቲንቁ ናይ ሾዔኔ፤ ቴሂና ናሃሼ ጎዎ ካታማ ማገፍኔ፤ ዩንሂ ዜርፃ ሬካ ጌይንታ ዓጪዳ ናንጋኔ።

13 ቁናዚሜ ያትኒዔኤሌና ሴራያ ጌይንታ ላምዎ ዓቲንቁ ናይ ሾዔኔ፤ ያትኒዔኤሌያ ሃታቴና ሜዖኖታዬ ጌይንታ ላምዎ ዓቲንቁ ናይ ሾዔኔ፤

14 ሜዖኖታዬ ያፕራ ሾዔኔ።
ሴራያ ዔኤቢ ኮሺሂ ሃኦማቶ ማድና ዔርቲዓሳ ናንጋ ቤዛ «ሃኦ ልኦ» ጌይንታ ካታማ ማገፍ፣ ዒዮባቤ ሾዔኔ።

15 ዪፑኔ ናኦዚ ካኦሌቤያ፡- ዒሩ፣ ዔላና ናዓሜ ጌይንታ ሃይሃ ዓቲንቁ ናይ ሾዔኔ፤ ዔላ ቁናዜ ሾዔኔ።

16 ዪሃልዔሌ ጎዖሂ፡- ዚፔ፣ ዚፓ፣ ቲሬያና ዓሳርዔሌ ጌይንታ ያይዶ ዓቲንቁ ናይ ሾዔኔ።

17-18 ዔዘራ፡- ዬቴሬ፣ ሜሬዴ፣ ዔፔሬና ያሎኔ ጌይንታ ያይዶ ዓቲንቁ ናይ ሾዔኔ። ሜሬዴያኦ ቢትያ ጌይንታ፣ ጊብፃ ካኦቲኖዎ ዔከ ማይራዎ ጌይንታ ዉዱር ናይሰኬናና ሻማዬንታ ዩሽባሄ ጌይንታ ላምዎ ዓቲንቁ ናይ ሾዔኔ፤ ዩሽባሄ ዔሽቲሞዓ ጌይንታ ካታማ ማገፍ፤ ሜሬዴያ ጊንሃ ዪሁዳ ፃጸፓ ፔቴ ላኦላ ዔከ ጌዶሬ ካታም ማገፍ፣ ዬሬዴ፤ ዬያጉዲ ሃሃ ሶኮ ካታም ማገፍ፣ ሄቤሬና ዛኖሃ ካታም ማገፍ ቁቲዔሌ ጎዖሂ ሾዔኔ።

19 ሆዲያ ናሃሚኮ ጌር ዔኬኔ፤ ዒዛ ዜርፃ፡- ቁዒላ ካታማ ናንጋ ጋርሚ ቶኦኮና ዔሽቲሞዓ ካታማ ናንጋ ማዕካቲ ቶኦኮኮ ማዖንሂኬ።

20 ሺሞኔያ፡- ዓምኖኦኔ፣ ሪና፣ ቤንሃኔና ቲሎኔ ጌይንታ ያይዶ ዓቲንቁ ናይ ሾዔኔ።

ዩሽዒ፡- ዘሄቴና ቤንዘሄቴ ጌይንታ ላምዎ ዓቲንቁ ናይ ሾዔኔ።

ሼኤላ ዜርፃ

21 ሼኤላ ዪሁዳኮ ዓቲንቁ ናኦቶይዳፓ ፔቴሂ ማዓዛ ዒዛኮ ዜርፃ ለካኔ ካታም ማገፍ ዔሬ፣ ማሬሻ ካታም ማገፍ ላዕዳ፣ ቤትዓሽቤዓ ካታማ ናንጋ ሻኦኮ ሚዛጶ ዓፒሎ ዱዓ ቶኦኮ፤

22 የቁመናና ኮዜባ ካታሞይዳ ናንጋ ዴራ ሞዓኣቤ ዓጮ ላኣሌሎ ዔኪ በኤቴሌሃሚይዳ ማዠፍ ዒዮዓሴና ሳራፔናኬ፤ [ዩያቶ ዓሶ ዛሎ ሃይሳ ሚናፓ ኬኤዚንቲ ዓኣያኬ]

23 ዔያታ ካኣቱሞ ማኣሮይዳ ዲማ ዲማ ባኣዚ ዓጪና ማዠያ ኮዓዒሚና ጌዴራ ጌይንታ ካታሞይዳ ናንጋ ማኒኬ።

ሲሞኦኔ ዜርፆ

24 ሲሞኦኔ ጎዖሢ ኔሙዔኤሌ፥ ያሚኔ፥ ያሪቤ፥ ዜራሄና ሻዑሌ ጌይንታ ዶንጎ ዓቲንቄ ናይ ሾዔኔ፤

25 ሻዑሌ፡- ሻሉሚ ሾዓዛ ሻሉሚ ሚብሳሚ ሾዔኔ፤ ሚብሳሚ ሃሣ ሚሸማዔ ሾዔኔ፤

26 ሚሸማዔ ሃሙዔኤሌ፥ ሃሙዔኤሌ ዛኩራ፥ ዛኩራ ሺሞዒ ሾዔኔ፤

27 ሺሞዒ፡- ታጾ ላሆ ዓቲንቄና ላሆ ዉዲሮ ናይና ሾዔኔ፤ ዒዛኮ ጌርሲንሢ ጋዓንቲ ሚርጌ ናይ ሾይባኣሴ፤ ዬያሮ ሲሞኦኔ ፃጳ ዪሁዳ ፃጳጉዲ ዲቢባኣሴ።

28 ዴንዲ ዳውቲ ካኣታጴ ዎዶ ሄላንዳኣና ሲሞኦኔ ዜርፆ ናንጌሢ፡- በርሳቤ፥ ሞላዳ፥ ሃፃርሹዓሌ፥

29 ቤልሃ፥ ዔፃሚ፥ ቶላዴ፥

30 ቤቱዔሌ፥ ሆርማ፥ ፂቅላጌ፥

31 ቤትማርካቦቲ፥ ሆፃር ሱሲሚ፥ ቤትቢሪና ሻዕራይሚ ካታሞይዳኬ፤

32 ዬያጉዲ ሃሣ ዔፃሚ፥ ዓይኔ፥ ሪሞኔ፥ ቶኬኔና ዓሻኔ ጌይንታ ሜሌ ዶንጎ ዳካ ዳካ ካታማሰኬንሢዳ፤

33 ኮይሎይዳ ዓኣ ጉርዶይዳኣ ናንጌኔ፤ ዬይ ዔያታ ናንጌ ቤዛ ደኣሎ ዛሎና ዴንዲ ባዕላቲ ካታሞ ሄላኔ። ሲሞኦኔ ዜርፆ ፔኤኮ ማኣሮ ዓሶንታ ዔያታ ናንጌ ቤዛንታ ዛሎ ፃኣፒ ጌሢሢ ያዲኬ።

34 ዲማ ዲማ ቶኣኮኮ ሱኡጋ ሃይካፓ ሊካ ፓይዲንታዘንሢኬ፡- ሚሸባቤ፥ ያሞሌኬ፥ ዓሚሲያሴ ናኣዚ ዮሻ፥

35 ዮዔሌ፥ ዮሺቢያ ናኣዚ ዒዩ፥ [ሴራያ ናኣዚ ዮሺቢያ፥ ዓሴዔሌ ናኣዚ ሴራያ፥]

36 ዔልዮዔናዬ፥ ያዕቆባ፥ ዬሾሃያ፥ ዓሳያ፥ ዓዲዔኤሌ፥ ሺሚዔኤሌ፥ ቤናያ፥

37 ሺፕዒ ናኣዚ ዚዛ፥ ዬዲያንታ ሺሞሪንታ ሺማዒያንታ ዜርሢ ማዔ ዓሎኔ ናኣዚ ሺፕዓንታኬ።

38 ዬንሢ ዓሶኮ ማኣሮ ዓሳ ሚርጌ ሚርጌ ዴንዴኔ፤

39 ይኛሮ ዔያታ ፔኤኮ ቆልሞ ሄንቆ ቤሲ ኮዒ ዔያታ ናንጋ ቤዘኮ ዓባ ገላ ዛሎና ዴንዲ ጌራሬ ሄላንዳኣና ዴዔኔ፤ ዩካ ዶኦጮኮ ዓባ ኬሰካ ዛላ ጌራሬ ካታማ ዓኣ ዛሎና ቆልሞ ዔያታ ሄንቃኔ።

40 ዩና ቤዘላ ዔያቶ ዲቃሣ ባኣዚባኣ ፔጌ ቤሲኬ፤ ዒኢካ ዔያታ ቆልማ ሄንቃንዳ ዓኣዔ ማኣቲ ዓኣ ቤሲ ሚርጌ ዴንቄኔ፤ ቤርታ ዩኖ ቤዘይዳ ናንጋ ዴራ ካኣማ ዓሶ ጌይንታኔ።

41 ዪሁዳ ካኣቲ፡ ሂዘቂያሴ ካኣታዳ ዎዶና ዩና ኬኤዚንቴ ዓሳ ጌራሬ ዓጮ ዴንዲ ዒኢካ ናንጋ ዓሶኮ ዓፒሎና ማዦና ማኣሮንታ ማኣቶ ማኣሮዎ ቢያ ሻሂኔ፤ ሃሣ ካኣማ ፃጶንታ ሚዑና ዓሶዎ ዓይሱዎ፣ ጋፒሲ ዎዲ ፔኤኮ ቆልሞም ሚርጌ ሄንቆ ቤሲ ዴንቄሢሮ ዒኢካ ዓኣ ዓሶ ዳውሲ ዳኪ ፔኤሮ ዒኢካ ቤዛ ናንገሢሣ ዓርቄኔ።

42 ሲሞኦኔ ዜርዖይዳ፣ ዶንጎ ጃኤታ ማዒ ዓሲ ዔዳዳማ ዲኮ ባንሢ ዴንዴኔ፤ ዔያቶ ሱኡጌ ማዒ ዔኪ ዓኣዳዘንሢ ዩሻዒ ናኣቶ ፔላፂያ፡ ኔዓሪያ፡ ሬፓያና ዑዚዔኤሌናኬ፤

43 ዔያታ ዒኢካ ዓቲ ዓኣ ዓማሌቄ ዓሶ ዎዲ ጋፒሲ፡ ሃኖ ሄላንዳኣና ዒኢካ ናንጋኔ።

5

ሮኦቤኤሌ ዜርዖ

1 ዒሰራዔኤሌኮ ናኣዚ ቶይዲ፡ ሮኦቤኤሌኮ ዜርዖ ሃይካፓ ዴማ ፓይዲንታዘንሢኔ፤ [ሮኦቤኤሌ ዒሰራዔኤሌኮ ናኣዚ ቶይዲታዖ ዒንዶ ሌጎ ዓርቄ ዒኢሰሢሢሮ ቶይዲታ ዮሴፔ ናኣቶም ዒንገንቴኔ፤ ዩኖሮ ዔያቶኮ ቶይዲማ ዔያታ ዎሊ ሄሊ ሾይንቴ ጎይዖ ዓኣዳኒ ዳንዳዒባኣሴ።

2 ሂዳቶዎ ቢያፓ ባሼ ዶዲ ማዔሢና ፃጶ ቢያኮ ሱኡጌ ማዔ ዓሲ ጴዳሢ ዪሁዳ ፃጶፓኬ፤]

3 ዖይቆኦቤኮ ናኣዚ ቶይዲ፡ ሮኦቤኤሌ ዖይዶ ዓቲንቄ ናይ ሾዔኔ፤ ዔያታ፡- ሃኖኬ፡ ፓሉ፡ ሄፂሮኔና ካርሚ ጌይንታያኬ።

4-6 ሾይንታፓ ሜሌ ሾይንቲ ሄላንዳኣና ናንጌ ዮዔኤሌ ዜርዖ፡- ሸማዒያ፡ ጎጊ፡ ሸምዒ፡ ሚካ፡ ሬዓያ፡ ቤዓሌና ቤዔራናኬ፤ ዓሶኦሬ ካኣቲ ቲግላቶፔሌሴሬ ሮኦቤኤሌ ቶኦኮኮ ሱኡጋሢ ማዔ ቤዔራ ዓርቄ ዲዒ ዔኪ ዓኣዳኔ።

7 ማኣሮ ዓሶኮ ፃኣፒንቴ ሱንፃ ዛገንቴ ጎይዖና ሮኦቤኤሌ ፃጶኮ ቶኦኮ ቶኦኮኮ ሱኡጎ ማዔዘንሢ፡- ዒዩዔኤሌንታ ዛካሪያሰንታ፡

5:1 ማዢ. ማፃ 35:22፤ 49:3-4። 5:2 ማዢ. ማፃ 49:8-10። 5:4-6 2ካኣቶ. ማ 15:29።

8 ዲዩዌኤሌ ዜርፃፓ ሹማዒኮ ናኣዚ ናፆ፡ ዓዛዜ ናኣዚ ማዌ ቤላዌንታኬ፤ ዬና ቶኦካ ናንጋ ቤዛ ዓርዌኤሬና ዬያኮ ኬዶ ዛሎና ኔቦና ባዓልሚዖን ዓጮ ሄላንዳኣናኬ፤

9 ዔያቶኮ ጌሌዓዴ ዓጮይዳ ሚርጌ ቆልሞ ዓኣሢሮ ዓባ ኬሰካ ዛሎና ዴንዲ ዔፕራዒሴ ዎሮ ሄላንዳኣና ፒዲ ጌይ ዓኣ ዓሲ ናንጉዎ ዳውሎ ቢያ ዔያታ ዓርቄ።

10 ካኣቲ ሳኣፆኦሌ ዎዶና ሮኦኤሌ ፃጳ ሃጋራ ዓሶ ጶሊ ቢያ ዎዲ ኩርሴኔ፤ ጌሌዓዴኮ ዓባ ኬሰካ ዛሎና ዓኣ ዬያ ዓሶኮ ቤዛ ፔ ዓጪ ዔያታ ማሃ።

ጋኣዴ ዜርፆ

11 ጋኣዴ ፃጳ፡- ሮኦኤሌ ፃጳ ናንጋ ቤዛኮ ኬዶ ዛሎና ዓኣ ዓጮይዳ ናንጋኔ፤ ዬይ ዓጮ ባኣሳኣኔ ዓጮ ጋራ ዓኣያ ማዓዛ ዓባ ኬሰካ ዛሎና ዴንዲ ሳሌካ ሄላ።

12 ዲዩዌኤሌ ቢያፓ ባሼ ዜርፆኮ ዓዶኬ፤ ሄሊሳፆ ሻፓሚ ዒዛኮ ዴማ ሄሊሲ ዓኣ ቶኦኮኮ ዓዶኬ፤ ያዕናዬና ሻፓፃና ባኣሳኣኔይዳ ናንጋ ሃንጎ ቶኦኮኮ ማፆንሢኬ፤

13 ሚሌ ዓቲ ዬኖ ፃጳ ዓሲ ማዌ ዓሳ፡- ሚካዌኤሌ፡ ሚሹላሚ፡ ሹባዒ፡ ዮራዬ፡ ያዕካኔ፡ ዚዓና ዌቤሬ ጌይንታ ላንካዎ ቶኦካኣ ዬኖ ዓሶና ዎላኬ፤

14 ዔያታ ሁሬ ናኣዚ ዓቢሃይሌ ዜርፆ ማዓዛ ዔያቶኮ ቤርታሳ ዓዶንሢ፡- ዓቢሃይሌ፡ ሁሪ፡ ያሮሃ፡ ጌሌዓዴ፡ ሚካዌኤሌ፡ ሺሻዬ፡ ያህዶና ቡዜናኬ፤

15 ጉኒኮ ናኣዚ ናዓሢ፡ ዓብዲዌሌ ናኣዚ፡ ዓሃ ዬንሢ ቢያ ቶኦኮኮ ሱኡጋሢኬ፤

16 ዬያታ ቢያ ባኣሳኣኔና ጌሌዓዴ ዓጮ ዴማ ዓኣ ዳኮ ዳኮ ካታሞና፤ ዬያጉዲ ሃሣ ሳኣሮኔ ዓጮይዳ ቆልማ ሄንቃ ቤዛ ቢያይዳ ናንጋ።

17 ዬይ፡ ማኣሮ ዓሶኮ ሱንፆ ፃኣፒ ዓርቆና ባካ ጊኢጊሺንቴሢ ጸሁዳ ካኣቲ ዒዮዓታሚና ዒሰራዌኤሌ ካኣቲ ዒዮርቢዓሚ ዎዶናኬ።

ዓባ ኬሰካ ዛሎና ዓኣ ፃጳኮ ጶሎ ዓሶ

18 ሮኦኤሌንታ ጋኣዴንታ ዓባ ኬሰካ ዛሎና ዓኣ ሚናኣሴ ፃጳ ሄካሢንታኮ ገቲማና ጨንቻ ዓፓሮና፤ ዬያጉዲ ዓኣዛናኣ ኮሺ ጶልቲ ዌሬ ጶይዲታሚ ጶይዶ ሺያና ላንካይ ፆኤታና ላሂታሚ ፖኦሊሴ ዓኣኔ፤

19 ዔያታ ሃጋራ ፃጳ ማዌ፡- ዬፀሬ፡ ናፒሹንታ ናዳቤ ዴሮ ጶላኒ ዴንዴ።

20 ዔያታ ያኦሲ ጉሙርቂ ዒዚ ዔያቶ ማኣዳንዳጉዲ ሺኢቂኔ፤ ዬያሮ ያኦሲ ሺኢዲ ያ ዔያቶኮ ዋይዚ ሃጋራ ዓሶንታ፣ ዬያቶ ዛላ ማዒ ያላ ላጎዋ ባሺሲሴኔ፤

21 ዬያ ሞርኮ ኩጫፓ ደንጊታሚ ሺያ ጋኣሎ፣ ላምዖ ዌኤታና ደንጊታሚ ሺያ ማራይና ላምዖ ሺያ ሃሪ ዲዒ ዔያታ ዔኬኔ፤ ዬያጉዲ ፔቲ ዌኤታ ሺያ ዓሲያኣ ዲዒ ዔኬኔ።

22 ያላ ያኦሲሮ ማዕሢሮ ሞርኮ ዛላፓ ሚርጌ ዓሲ ዔያታ ዋዳኔ፤ ዬካፓ ዔያታ ጊንሣ ፔኤሮ ያልዚና ባሺንቲ ዲዒንታንዳያ ሂላንዳኣና ዬዮ ዓጩሎይዳ ናንጌኔ።

ዓባ ኬሰካ ዛሎና ዓኣ ሚናኣሴ ፃጰ

23 ዓባ ኬሰካ ዛላ ዓኣ ሚናኣሴ ፃጰኮ ሃካሢ ኬዶ ዛሎና ዴንዲ ባዓልሂርሞኔ ሂላኔ፤ ዬካፓ ዴንዲ ሴኒሬና ጋዓዖ ሂርሞኔ ዲኮ ሂላ ባኣሳኣኔ ዓጮይዳ ናንጋኔ፤ ዔያቶኮ ዴራኣ ሚርጌ ሚርጌ ዴንዳኔ፤

24 ዬያቶ ቶኦኮኮ ሱኡጋ፡- ዔፔሬ፣ ዩሸዒ፣ ዔሊዔኤሌ፣ ዓዝሪዔኤሌ፣ ዔርሚያሴ፣ ሆዳውያና ያህዲዔኤሌናኬ፤ ዬያታ ቢያ ቶኦኮኮ ሱኡጎና ያሎ ሱኡጌያ ማዒ ዔርቲ ዓሶኬ።

ዓባ ኬሰካ ዛሎና ዓኣ ፃጰኮ ዲዒንቶ

25 ያዲ ማዔቲያ ዴራ ዔያቶኮ ቤርታኣ ዓደንሢ ያኣዛህሞ ጉሙርቂንታያ ማዒባኣሴ፤ ዔያታ ዋይቲይ ጌዔቲ ያኦሲ ካኣሽኪያ ሃሺ ዔያታ ዓኣ ዓጩሎይዳፓ ያኦሲ ባይዜ፣ ማሌ ዴራ ካኣሽካ ያኣዞ ዘጊ ካኣሽኬኔ፤

26 ዬያሮ ዲሰራዔኤሌ ያኦሲ ዔያቶይዳ ፑሌ፣ ሃሣ ባጎ ሱንፃ ቲግላትፔሌሴሬ ጌይንታ ዓሶኦሬ ካኣቲ ዔቂሲ ዓጮ ዔያቶኮ ዓይሤኔ፤ ዬያይዲ ቲግላትፔሌሴሬ ሮኦቤኤሌንታ ጋኣዴንታ ዓባ ኬሰካ ዛሎይዳ ዓኣ ሚናኣሴ ፃጰኮ ሃካሢ ዲዒ ዔኪ ሃላሂ፣ ሃቦሬንታ ሃራንታ፤ ዬያጉዲ ጎዘኔ ዋሮ ዓጫ ዔያታ ሃዮ ሂላንዳኣና ናንጋንዳጉዲ ማሄኔ።

6

ቄኤሶ ቢያኮ ሱኡጎ ማኣሮ ዓሶ

1 ሌዋ ሃይህ ዓቲንቁ ናይ ሾዔኔ፤ ዔያታ፡- ጌርሾኔ፣ ቄዓቴና ማራሪ ጎዖኬ፤

2 ቄዓቴ፡- ዓምራሚ፣ ዬፀሃሬ፣ ኬብሮኦኔና ዑዚዔሌ ጌይንታ ያይዶ ዓቲንቁ ናይ ሾዔኔ።

5:26 2ካኣቶ. ማ 15:19፤29፤ 17:6።

3 ዓምራሜያ ዓኣሮኔና ሙሴ ጌይነታ ላምዖ ዓቲንቄና ማይራሞ ጌይነታ ፔቲ ዉዲር ናይ ሾዔኔ።

ዓኣሮኔ፡- ናኣዳኣሴ፥ ዓቢሁ፥ ዓላዜሬነታ ዒታማሬ ጌይነታ የይዶ ዓቲንቄ ናይ ሾዔኔ።

4 ዓላዜሬ ፒንሃሴ ሾዔኔ፤ ፒንሃሴ ዓቢሹዓ፥ ዓቢሹዓ ቡቁ ሾዔኔ፤

5 ቡቁ ዑዚ ሾዔኔ፤

6 ዑዚ፡- ዜራህያ ሾዓዛ፥ ዜራህያ ማራዮቲ ሾዔኔ፤

7 ማራዮቲ ዓማሪያ፥ ዓማሪያ ሃሣ ዓሂያቤ ሾዔኔ፤

8 ዓሂያቤ ፃዶቄ፥ ፃዶቄ ዓሂማዓፃ ሾዔኔ፤

9 ዓሂማዓፃ ዓዛሪያሴ፥ ዓዛሪያሴ ዮሃና ሾዔኔ፤

10 ዮሃና ዓዛሪያሴ ሾዔኔ፤ ዓዛሪያሴ ካኣቲ፥ ሴሎሞኔ ዩሩሳላሚያይዳ ማኲሴ ጌኤዡ ማኣሮይዳ ቄኤሴ ማዒ ማዴያኩ።

11 ዓዛሪያሴ ዓማሪያ፥ ዓማሪያ ሃሣ ዓሂፀብ ሾዔኔ፤

12 ዓሂፀብ ፃዶቄ፥ ፃዶቄ ሻሉሜ ሾዔኔ፤

13 ሻሉሜ ሂልቄያ ሾዔኔ፤ ሂልቄያ ዓዛሪያሴ ሾዔኔ፤

14 ዓዛሪያሴ ሴራያ፥ ሴራያ ዒዮፃዳቄ ሾዔኔ።

15 ናንጊና ናንጋ ጎዳ ዪሁዳና ዩሩሳላሚና ዳር ናቡካዳናዖሬ ያሎና ባሺ ዲዒ ዔኩም ቤሲ ባኣያ ማዒ ናንጋንዳጉዲ ማሂ ዎዶና ዒዮፃዳቄያ ዬያ ዓሶና ዎላ ዲዒንቲ ዴንዴኔ።

ሌዊ ዜርዖ

16 ሌዊ ሃይሣ ዓቲንቄ ናይ ሾዔኔ፤ ዔያታ፡- ጌርሾኔ፥ ቄዓቲና ማራሪ ጎየያኩ፤

17 ጌርሾኔ፡- ሊቢኒና ሺምዒና ሾዔኔ፤

18 ቄዓቲያ፡- ዓምራሜ፥ ዪፀሃሬ፥ ኩብሮኦኔነታ ዑዚዔኤሌንታ ሾዔኔ፤

19 ማራሪ ሃሣ ማህሊና ሙሺና ሾዔኔ። ሌዊ ፃ፳ ዒጊኖ ሾይነታ ሃይካፓ ዴማ ዓኣዘንሢኩ፡-

20 ጌርሾኔ ሊቢኒ ሾዔኔ፤ ሊቢኒ ያሃቲ ሾዔኔ፤ ያሃቲ ዘማ ሾዔኔ፤

21 ዘማ ዮዓሂ፥ ዮዓሂ ዒዶ፥ ዒዶ ዜራሂ፥ ዜራሂ ዓትራዬ ሾዔኔ።

22 ቄዓቲ ዓምናኣዳኣሴ፥ ዓምናኣዳኣሴ ቆራሂ፥ ቆራሂ ዓሲሬ ሾዔኔ፤

23 ዓሲሬ ዔልቃና፥ ዔልቃና ዔቢያሳፔ፥ ዔቢያሳፔ ዓሲሬ ሾዔኔ፤

24 ዓሲሬ ታሃቲ፥ ታሃቲ ዑሪዔኤሌ፥ ዑሪዔኤሌ ዑዚያ ሾዓዛ፥ ዑዚያ ሻዑሌ ሾዔኔ።

25 ዔልቃና ጎየሢ ዓማሳዬና ዓሂሞቲና ሾዔኔ፤

26 ዓሂሞቲ ዔልቃና፥ ዔልቃና ያፓዬ፥ ያፓዬ ናሃቲ ሾዔኔ፤

6:19 ኩሲ. ማፃ 6:16-19።

27 ናሃቴ፡- ዔሊያቤ፥ ዔሊያቤ ዪሮሃሜ፥ ዪሮሃሜያኣ ሂልቃና ሾዔኔ።

28 ሳሙዔኤሌሌ ላምዎ ዓቲንቄ ናይ ሾዔኔ፤ ዬያቶኮ ቶይዳሢ ዒዩዩኤሌ፤ ሄሌሢ ዓቢያ ጌይንታኔ።

29 ሜራሪ ማሂሊ፥ ማሂሊ ሊቢኒ፥ ሊቢኒ ሺምዒ፥ ሺምዒ ዑዛ ሾዔኔ፤

30 ዑዛ ሺምዒ፥ ሺምዒ ሃጊያ፥ ሃጊያ ዓሳያ ሾዔኔ።

ጌኤዠ ማኣሮይዳ ያኦሲ ቦንቾም ዓይናዳ ዓሶ

31 ጫአቁም ሳኣዲና ዬሩሳላሜ ሙኬሢዳ፣ ካኣቲ፥ ዳውቲ ናንጊና ናንጋ ጎዳ ማኣሮይዳ ዓይኑሞና ማዳዘንሢም ሱኡጌ ማዓ ዓሲ ዶኦሬኔ፤

32 ካኣቲ ሴሎሞኔ ናንጊና ናንጋ ጎዳኮ ጌኤዠ ማኣሮ ዬሩሳላሜይዳ ማዠንዳሢኮ ቤርታ ዬና ዓሳ ቢያ ዎዴ ፔ ኬሎና ኬሎና ዓፒሎና ማዠንገቴያ ያኦሲ ዴርና ካኣማ ማኣሮይዳ ዓይኑሞ ዓይናዳያኬ።

33 ዬና ቤዘይዳ ማዳ ዓሶኮ ማኣሮ ዓሳ ሃካ፣ ሊካ ኬኤዚንታሢጉዲኬ፡-

ቁዓቲ ቶኦኮ፣- ቤርታዳያ ማዓ፥ ያኦሲ ቦንቾም ዓይኑሞ ዓይናዳ ዓሶኮ ሱኡጋሢ ዒዩዩኤሌሌ ናኣዚ ሄማኔኬ፤ ዒዛ ማኣሮ ዓሳ ሃይካ፣ ዴማ ፓይዲንታ ጎይዮና ዴንዲ ያይቆኦቤ ሄላኔ፤ ዔያታ፡- ሄማኔ፥ ዒዩዩኤሌሌ፥ ሳሙዔኤሌሌ፥

34 ሂልቃና፥ ዪሮሃሜ፥ ዔሊዔኤሌሌ፥ ቶሃ፥

35 ፀፒ፥ ዔልቃና፥ ማሃቴ፥ ዓማሳዬ፥

36 ዔልቃና፥ ዒዩዩኤሌሌ፥ ዓዛሪያ፥ ሶፖኒያሴ፥

37 ታሃቴ፥ ዓሲሬ፥ ዓቢያሳፒ፥ ቆሬ፥

38 ዪፅሃሬ፥ ቁዓቴ፥ ሌዊንታ ያይቆኦቤንታኬ።

39 ሚዛቆ ዘላ ዔቂ ማዳ ላምዓሳ፥ ዓይናዳ ዓሶ ሱኡጋሢ ዓሳኣፒኬ፤ ዬያኮ ማኣሮ ዓሶ ፓይዳ ሃካ፣ ዴማ ፓይዲንታ ጎይዮና ዴንዲ ሌዊ ሄላኔ፤ ዔያታ፡- ዓሳኣፒ፥ ቤራኪያ፥ ሺምዓ፥

40 ሚካዔኤሌሌ፥ ባዕሴያ፥ ማልኪያ፥

41 ዔተኒ፥ ዜራሄ፥ ዓዳያ፥

42 ዔታኔ፥ ዘማ፥ ሺምዒ፥

43 ያሃቴ፥ ጌርሾኔንታ ሌዊንታኬ።

44 ቫውሎ ዘላ ዔቂ ማዳ፥ ሃይሣሳ ዓይናዳ ዓሶ ሱኡጋሢ ሜራሪ ናኣዚ ዔታኔኬ፤ ዒዛኮ ማኣሮ ዓሶኮ ፓይዳ ሃይካ፣ ዴማ ፓይዲንታ ጎይዮና ዴንዲ ሌዊ ሄላኔ፤ ዔያታ፡- ዔታኔ፥ ቂሺ፥ ዓብዲ፥ ማሉኬ፥

45 ሃሻቢያ፥ ዓሜሲያሴ፥ ሂልቂያ፥

46 ዓሞዲ፣ ባኒ፣ ሾሜሬ፣
 47 ማሂሊ፣ ሙሺ፣ ሜራሪንታ ሌዊንታኬ።
 48 ሌዊ ዓሶ ማዕ፣ ዔያቶኮ ዒጊና ያኦሲ ዚጊ ካኦሽኮ ቤዛ ማዲንታ ሜሌ ሜሌ ማዶ ቢያ ማዳኔ።

ዓኣሮኔ ዜርዖ

49 ዓኣሮኔና ዒዛኮ ዜርዖና ዑንጅንታ ዒንጎ ባኮ ዒንጎ ቤዘይዳ ሚቺ ዒንጎ ባኮዋ ቢያ ሚቺ ያኦሲም ዒንጋኔ፤ ዬያጉዲ ሃሣ ዑሣ ዓኣዳ ጌኤዡ ማኣሮይዳ ካኦሽኮ ዳሞቦና ያኦሲ ዒሰራዔኤሌ ዓሶኮ ጎሞ ዓቶም ጋዓንዳጉዲ ዒንጊንታ ባኮኮ ቢያ ሱኡጋ ዔያቶኬ፤ ዔያታ ዬያ ቢያ ማዲ ኩንሣሢ ያኦሲ ፔ ዓይላሢ ሙሴ ዓይሢ ጎይዖናኬ።

50 ዓኣሮኔ ዜርዖኮ ፓይዳ ሃካፓ ዴማ ዓኣ ጎይዖኬ፤ ዔያታ፡- ዓላዜሬ፣ ፒንሃሴ፣ ዓቢሹዓ፣

51 ቡቁ፣ ዑዚ፣ ዜራህያ፣
 52 ሜራዮቴ፣ ዓማሪያ፣ ዓሂዖቤ፣
 53 ሳዶቄንታ ዓሂማዓዳንታኬ።

ሌዊ ዓሳ ናንጎም ዒንጊንታ ቤዛ

54 ዓኣሮኔ ዜርዖይዳፓ ቁዓቴ ዜርዖ ሌዊ ዓሶም ዒንጊንታ ቤዘይዳፓ ቤርታዲ ዒዛም ማዓ ቤዘ ዲማሲ ዔራኒ ዓጎ ባኮና ዔኬኔ፤

55 ዬይ ቤዛ ዪሁዳ ዓጮይዳ ዓኣ ኬብሮኦኔና ዬኖኮ ኮይሎይዳ ቆልማ ሄንቃ ቤዘዋ ቢያ ዓርቃያኬ።

56 ኬብሮኦኔኮ ጎዡ ቤዘና ጉርዳ ጋዓንቲ ዪፑኔ ናኣዚ፣ ካኣሌቤም ጌይንቲያኬ።

57-59 ዓኣሮኔና ዒዛኮ ዜርዖናም ዒንጊንታ፣ ዓሲ ዎዴ ዓሲ ዓኣሺንቲ ቶላንዳጉዲ ጌይንቲ ካታሞንሢ፡- ኬብሮኦኔ፣ ያቴሬ፣ ሊቢና፣ ዔሸቴሞዓ፣ ሂሌኔ፣ ዴቢሬ፣ ዓሻኔንታ ቤትሾሜሾንታ ማዓዛ ቆልማ ሄንቃ ቤዘንታ ዎላኬ።

60 ቢኢኒያሜ ዓጮይዳ፡- ጌባዒ፣ ዓሌሜቴና ዓናቶቴ ጌይንታ ካታሞና ቆልማ ሄንቃ ቤዘና ዓኣሮኔ ዜርዖም ዒንጊንቲያኬ፤ ዓካሪ ዓኣሮኔ ዜርዖም ቢያ ናንጊ ቤሲ ማዓያ ዎሊ ዑፃ ታጳ ሃይሣ ካታማኬ።

61 ዓባ ጌላ ዛሎና ዓኣ ሚናኣሴ ፃጸኮ ሄካሢ ዓጮፓ ታጳ ካታማ ሃንጎ ቁዓቴ ዜርዖም ዒፃ ዓጊንቲም ጊሸኪንቲኔ።

62 ጌርሾኔ ፃጸኮ ዲማ ዲማ ቶኦኮም፡- ዪሳኮኦሬይዳፓ፣ ዓሴኤሬይዳፓ፣ ኒፕታኣሌኤሜና ባኣሳኣኔናይዳ ዓኣ ዓባ ኬሰካ ዛሎና ዓኣ ሚናኣሴ ዓጮይዳፓ ዎሊ ዑፃ ታጳ ሃይሣ ካታማ ዒንጊንቲኔ።

63 ዬያጉዲ ሃሣ ሜራሪ ፃጸኮ ዲማ ዲማ ቶኦኮም፡-
ርኦቤኤሌሊዲገ፡ ጋኣዴና ዛብሎኦኦኦ ዓጮናይዲገ ዋሊ 0-9 ታጾ
ላምዖ ካታማ ዒፃና ዲማሲ ዒንጊንቴኔ።

64 ዬያይዲ ዒሰራዔኤሌ ዓሳ ሌዊ ዓሳ ስጋጎንዳ ካታም ዔያቶም
ዒንጊኔ፤ ዬያይ ካታም ካታሞኮ ኮይላ ቆልማ ሄንቃ ቤዘና ዋላኬ።

65 ኬዴና ኬኤዚንቴ ቤዛ፡- ዪሁዲይዳ፡ ሲሞኦኦና ቢኢኢያሜና
ዓጮይዳ ዓኣ ካታሞዋ ሃንጎዋቶጉዲ ቢያ ዲማሲ ዔሮ ባኮና
ዒንጊንቴያኬ።

66 ቁዓቴ ቶኦካገ ፔቴ ፔቴ ማኣሪ ዓሲም ዔፕሬኤሜ ዓጮይዳ
ካታማና ቆልሞ ሄንቃ ቤሲና ዒንጊንቴኔ።

67 ዬንሢያ ዔፕሬኤሜ ጌሜሮይዳ ዓኣያ፡ ዓሶ ዋዴ ዓሳ ዓኣሺንቴ
ቶላ ካታሞንሢ፡- ሴኬሜ፡ ጌዜሬ፡

68 ዮቅሚዓሜ፡ ቤትሆሮኔ፡

69 ዓያሎኔና ጋትሪሞኔናኬ፤ ዬይ ካታማ ቆልማ ሄንቃ ቤዘና
ዋላኬ።

70 ዓባ ጌላ ዛሎና ዓኣ ሚናኣሴ ዓጮይዳ ሃሣ ዓኔሬና ቢልዓሚ
ካታማ ኮይላ ዓኣ ቆልማ ሄንቃ ቤዘና ዋላ ቁዓቴ ቶኦኮም
ዒንጊንቴኔ።

71 ጌርሾኔ ቶኦኮም፡- ሃካገ ዴማ ፓይዲንታ ካታማ ኮይላ ዓኣ
ቆልማ ሄንቃ ቤዘና ዋላ ዒንጊንቴያኬ፤

ዓባ ኬሰካ ዛሎና ዓኣ ሚናኣሴ ዓጮይዳገ ባኣሳኣይይዳ ዓኣ
ጎላኔና ዓሰታሮቴና።

72 ዪሳኮኦሪ ዓጮይዳ፡- ቃዴሴ፡ ዳቤራቴ፡

73 ራሞቴና ዓኔሜናኬ።

74 ዓሴኤሬ ዓጮይዳ፡- ማሻሌ፡ ዓብደኔ፡

75 ሁቆቄና ሬሆቤናኬ፤

76 ኒፕታኣሌኤሜ ዓጫ ጌሊላይዳ ዓኣ ቁዴሹ፡ ሃሞኔና
ቂርያታይሜናኬ፤

77 ሃንጎ ሜራሪ ቶኦኮም ሃካገ ዴማ ፓይዲንታ ካታሞንሢ ኮይላ
ዓኣ ቆልማ ሄንቃ ቤዘና ዋላ ዒንጊንቴኔ፡-

ዛብሎኦኦኦ ዓጮይዳ፡- ሪሞናና ታቦሬና፤

78 ዮርዳኖሴ ዋሮኮ ዓባ ኬሰካ ዛሎና ዒያርኮኮ ሱካ ዓኣ
ርኦቤኤሌ ዓጫ ዳውሎይዳ ዓኣ፡- ቤፆሬ፡ ያህፆ፡

79 ቁዴሞቴና ሜገዓቴናኬ፤

80 ጋኣዴ ዓጫ ጌሌዓዴይዳ ዓኣ ራሞቴ፡ ማሂናይሜ፡

81 ሃሴቦኦኦኦ ያዕዘሬናኬ።

7

ዪሳኮኦሬ ዜርዖ

1 ዪሳኮኦሬ ያይዶ ዓቲንቄ ናይ ሾዔኔ፤ ዬንሢያ፡- ቶላዒ፡ ፑዋ፡ ያሹቤና ሺምርኔ ጌይንታዘንሢኤ።

2 ቶላዒ ላሆ ዓቲንቄ ናይ ሾዔኔ፤ ዬያታ፡- ዑዚ፡ ሬፓያ፡ ዪሪዔሌ፡ ያህማዬ፡ ዩብሳሚንታ ሹሙዔሌ ጌይንታያከ፤ ዬንሢ ቶላዒ ቶኦኮ ማኦር ዓሶኮ ሱኡጌ፡ ጊንሣ ሃሣ ያልዚናኦ ዔርቲ ዓሲከ፤ ዔያቶ ዜርዖኮ ሚርጉማ ካኦቲ ዳውቲ ዋዶና ላማታሚ ላምዖ ሺያና ላሆ ዪኤታናኤ።

3 ዑዚ ጎምሢ ዩዘራህያ ጌይንታ ፔቲ ዓቲንቄ ናይ ሾዔኔ፤ ዬያ ዩዘራህያና ዒዘኮ ያይዶ ዓቲንቄ ናኦታ፡- ሚካዔኤሌ፡ ዓብዲዩ፡ ዒዮዔኤሌንታ ዩሺያንታ ዔያቶ ማኦር ዓሶኮ ሱኡጎኤ።

4 ዔያቶኮ ሚርጌ ላኦሊና ናይና ዓኦሢር ዜርዖ ዔያቶሲ ፖኦሊሴ ማዶ ማዳኒ ዳንዳዓ ሃይሢታሚ ላሆ ሺያ ዓቲንቄ ከሳኒ ዳንዳዓያኤ።

5 ዪሳኮኦሬ ያጻፓ ፖኦሊሴ ማዶ ማዳኒ ዳንዳዓ ሳሊታሚ ላንካይ ሺያ ዓቲንቄ ዓኦያ ማዔሢ ያኦፒ ዓርቆና ባካ ዔርዘኔ።

ቢኢኒያሜና ዳኦኔና ዜርዖ

6 ቢኢኒያሜ ሃይሆ ዓቲንቄ ናይ ሾዔኔ፤ ዔያታ ቤላዔ፡ ቤኬሬና ዪዲዔኤሌ ጎያያኤ።

7 ቤላዔ ደንጎ ዓቲንቄ ናይ ሾዔኔ፤ ዬያታ፡- ዔፅቦኔ፡ ዑዚ፡ ዑዚዔኤሌ፡ ያሪሞቲና ዒሪ ጌይንታዘንሢኤ፤ ዔያታ ፔ ዜርዖኮ ሱኡጌ፡ ጊንሣ ሃሣ ያልዚናኦ ዔርቲ ፖኦሊሴከ፤ ዔያቶ ዜርዖፓ ፖኦሊሴ ማዶ ማዳኒ ዳንዳዓ ላማታሚ ላምዖ ሺያና ሃይሢታሚ ያይዶ ዓቲንቄ ዓኦኔ።

8 ቤኬሬ ጎምሢ ታዘጸ ዓቲንቄ ናይ ሾዔኔ፤ ዬያታ፡- ዜሚራ፡ ዮዓሺ፡ ዔሊዔኤሌ፡ ዔልዮዔናዬ፡ ያምራ፡ ዪሬሞቲ፡ ዓቢያ፡ ዓናቶቲና ዓሊሜቲ ጌይንታያከ።

9 ዔያቶኮ ዜርዖይዳፓ ፖኦሊሴ ማዶ ማዳኒ ዳንዳዓያ ማዔም ያኦፒንቲ ዓቲንቄ ላማታሚ ሺያና ላምዖ ዪኤታታሢ ዔርቲኔ።

10 ዪዲዔዔኤሌ፡ ቢልሃኔ ጌይንታ ዓቲንቄ ናይ ሾዔኔ፤ ቢልሃኔ፡ ያዑሹ፡ ቢኢኒያሜ፡ ዔሁዳ፡ ከናዒና፡ ዜታኔ፡ ታርሺሼንታ ዓሢሻሃሪ ጌይንታ ላንካይ ዓቲንቄ ናይ ሾዔኔ፤

11 ዬያታ ፔ ቶኦኮኮ ማኦር ዓሶ ሱኡጌ፤ ሃሣ ዔርቲ ያልዚ ዓሲከ፤ ዔያቶ ዓሶ ዜርዖፓ ፖኦሊሴ ማዶ ማዳኒ ዳንዳዓ ዓቲንቄ ታጾ ላንካይ ሺያና ላምዖ ዪኤታናኤ።

12 ሹፒሜና ሁፒሜ ጎዎዞንሢ ዓሂሬ ዜርሢኸ፤ ሁሽሜ ጎዎሢ ዓሂሬ ናይኸ።

ኒፕታኣሌኤሜ ዜርዎ

13 ኒፕታኣሌኤሜ ዎይዶ ዓቲንቄ ናይ ሾዔኔ፤ ዬያታ፡- ያሃዳዔኤሌ፥ ጉኒ፥ ዩጄሬና ሻሉሜ ጌይንታዞንሢኸ፤ ዔያታ ቢልሃ ዜርሢኸ።

ሚናኣሴ ዜርዎ

14 ሚናኣሴ ፔኤኮ ማቾ፥ ሶኦሪያ ዓጮ ላኣሌሎይዳፓ ዓሰሪዔኤሌና ማኪሬ ጌይንታ ላምዎ ዓቲንቄ ናይ ሾዔኔ፤ ማኪሬ ጌሌዓዴ ሾዔኔ፤

15 ዩይ ማኪሬ፡- ሁፒሜና ሹፒሜ ዜርዎፓ ፔቲ ፔቲ ላኣሊ ዔከኔ፤ ማኪሬኮ ማዕካ ጌይንታ ጌራ ዓኣኔ፤ ጃሎፒሃዴ ጌይንታ ማኪሬ ዜርሢኸከይ ወዲሮ ናይ ሌሊ ሾዔኔ።

16 ማኪሬኮ ማቾ፥ ማዕካ ፔሬሼና ሼሬሼ ጌይንታ ላምዎ ዓቲንቄ ናይ ሾዔኔ፤ ፔሬሼ ጌይ ሱንዎ ጌሢዛ ዒንዶ ማዕካከ፤ ፔሬሼያ ዑላሚና ሬቄሜ ጌይንታ ላምዎ ዓቲንቄ ናይ ሾዔኔ።

17 ዑላሚ ዓዳኔ ጌይንታ ፔቲ ዓቲንቄ ናይ ሾዔኔ፤ ዬንሢ ቢያ ሚናኣሴ ናኣዚኮ ናኣዚ፥ ማኪሬ ናኣዚ፥ ጌሌዓዴ ዜርዎኸ።

18 ጌሌዓዴኮ ጌራ ሃሞሌከቲ ሃይሃ ዓቲንቄ ናይ ሾዔኔ፤ ዬያታ፡- ዒሹዴ፥ ዓቢዔዜሬና ማህላ ጌይንታያኸ፤

19 ሼሚዳዔ ጎዎሢ ዓህያኔ፥ ሼከሜ፥ ሊቅሃንታ ዓኒዓሜ ጌይንታ ዎይዶ ዓቲንቄ ናይ ሾዔኔ።

ዔፕሬኤሜ ዜርዎ

20 ዔፕሬኤሜ ሹቲላሂ፤ ሹቲላሂ ቤሬዴ፥ ቤሬዴ ታሃቲ፥ ታሃቲ ዔልዓዳ፥ ዔልዓዳ ታሃቲ ሾዔኔ፤

21 ታሃቲ ዛባዴ፥ ዛባዴ ሹቲላሂ ሾዔኔ፤ ዔፕሬኤሜ ሹቲላሂፓ ሜሌ ዔዜሬና ዔልዓዴ ጌይንታ ላምዎ ዓቲንቄ ናይ ሾዔኔ፤ ዬንሢ ጋኣቲይዳ ናንጋ ዓሶኮ ባይ ወኤቃንቲ ዓርቂ ዔያቶ ዎድና፤

22 ዓዳሢ ዔያቶኮ ዔፕሬኤሜ ሚርጌ ከሊ ዔያቶ ዛሎ ዎዩ ዎዩ ናንጋሢሮ ዒዛኮ ጌርሲንሢ ዒዛ ዶዲሻኒ ሙከኔ፤

23 ዩካፓ ዔፕሬኤሜ ፔ ማቾና ላሄሞ፥ ዒዛ ጎጳዲ ዓቲንቄ ናይ ሾዔኔ፤ ዔያቶኮ ማኣራ ሄሌ ሜታሢዳፓ ዔቄያና ዬያ ናዓሢኮ ሱንዎ «ቤሪዓ» * ጌይ ጌሢኸ።

* 7:23 ቤሪዓ ጌይዎ፡- ዔብሬ ዓሶ ሙኤጮና «ሚቶና (ሜታሴ)» ጌይሢኸ።

24 ገንፃፓ ዔፕሬኤሜ ሸዒራ ጌይንታ ወዲር ናይ ሾዔኔ፤ ዒዛ ኪደ ዛሎና ደኣሎ ዛሎናይዳ ዓኣ ቤትሆሬንታ ዑዜንሸዒራ ጌይንታ ካታማኣ ማዢሴኔ።

25 ዔፕሬኤሜ ሃሣ ሬፓሄ ጌይንታ ሜሌ ዓቲንቁ ናይ ሾዔኔ፤ ዬያ ሬፓሄኮ ዜርፃ፡- ሬሼፔ፣ ቴላሄ፣ ታሃኔ፣

26 ለዒዳኔ፣ ዓሚሁዳ፣ ዔለሻማዔ፣

27 ኔዌንታ ዒያሱንታኩ።

28 ዔፕሬኤሜ ዜርፃ ጉቤ ዔኪ ፔኤኮ ናንጎ ቤሲ ማሄ ዓጫ ቤኤቴኤሌና ኮይሎይዳ ዓኣ ዳኮ ዳኮ ካታሞ ማዓዛ፣ ዓባ ኬሰካ ዛሎና ዴንዲ ናዕራና፤ ዓባ ጌላ ዛሎና ዴንዲ ጌዜሬ ሄላ፤ ዬያጉዲ ሃሣ ጌዜሬ ኮይላ ዓኣ ዳኮ ዳኮ ካታሞ ቢያ ዔካኔ፤ ሴኬሜንታ ዓያንታ ኮይላ ዓኣ ዳኮ ዳኮ ካታሞ ፔ ጋራ ማሄ ዔካኔ።

29 ሚናኣሴ ዜርፃ፡- ቤትሻኔ፣ ታዕናኩ፣ ሜጊዶኔና ዶሬና፤ ዬያጉዲ ሃሣ ዬያ ካታሞኮ ኮይላ ዓኣ ዳኮ ዳኮ ካታሞ ፔ ዴማ ማሄ ያይሣኔ።

ዬይ ቢያ ዒሰራዔኤሌ ናኣዚ፣ ዮሴፔ ዜርፃ ናንጌ ቤዛኩ።

ዓሴኤሬ ዜርፃ

30 ዓሴኤሬ ያይዶ ዓቲንቁ ናይ ሾዔኔ፤ ዬንሢያ፡- ዩሞና፣ ዪሺዋ፣ ዪሺዋና ቤሪዓ ጌይንታያኩ፤ ዬያጉዲ ሃሣ ሴራሄ ጌይንታ ፔቴ ወዲር ናይያኣ ሾዔኔ።

31 ቤሪዓ ሄቤሬና ማልኪዔኤሌ ጌይንታ ላምዖ ዓቲንቁ ናይ ሾዔኔ፤ ማልኪዔኤሌ፡- ቢርዛዊ ጌይንታ ዓቲንቁ ናይ ሾዔኔ።

32 ሄቤሬ ሃይሃ ዓቲንቁ ናይ ሾዔኔ፤ ዔያታ፡- ያፕሌዴ፣ ሾሜሬና ሆታሜ ጎያያኩ፤ ሃሣ ፔቴ ሹዓ ጌይንታ ወዲር ናይያኣ ዒ ሾዔኔ።

33 ያፕሌዴ፡- ፓሳኩ፣ ቢምሃሌና ዓሸዋቴ ጌይንታ ሃይሃ ዓቲንቁ ናይ ሾዔኔ።

34 ያፕሌዴኮ ጌርሲ ሾሜሬ ጎያሢያ፡- ዓሂ፣ ሮህጋ፣ ዬሁባና ዓራሜ ጌይንታ ያይዶ ዓቲንቁ ናይ ሾዔኔ።

35 ያፕሌዴ ጌርሲ ሆታሜያ፡- ያፓሄ፣ ዩሞናዔ፣ ሸሌሸና ዓማሌ ጌይንታ ያይዶ ዓቲንቁ ናይ ሾዔኔ።

36 ያፓሄ ዜርፃ፡- ሱሃ፣ ሃርኔፔሬ፣ ሹዓሌ፣ ቤሪ፣ ዩሞራ፣

37 ቤዴሬ፣ ሆዴ፣ ሻማ፣ ሸልሻ፣ ዩትራኔና ቤዔራ ጌይንታያኩ።

38 ዬቴሬ ዜርፃ፡- ዪፑኔ፣ ፒሰፓና ዓራ ጌይንታያኩ፤

39 ዑላ ዜርፃ፡- ዓራሄ፣ ሃኒዔሌና ሪፅያ ጌይንታያኩ።

40 ዬያታ ቢያ ዓሴኤሬ ዜርፃኩ፤ ዔያታ ፔ ማኣሮ ዓሶኮ ሱኡጌ፣ ገንሣ ሃሣ ዔርቴ ያልዚ ዓሲ ማዔያ ዲማ ዲማ ቢታንቶ ዓኣ ዓሲኩ፤

ዓሴኤሬ ዜርፃፓ ፖኦሊሴ ማዶ ማዳኒ ዳንዳዓ ዓቲንቃ ለማታሚ ላሆ ሺያኩ።

8

ቢኢኒያሜ ዜርፃ

1 ቢኢኒያሜ ዳንጎ ዓቲንቁ ናይ ሾዔኔ፤ ዩንሢያ ሞሊ ሄሊ ሄሊ ሾይንቲ ጎይፆና፡- ቤላዔ፡ ዓሽቤሌ፡ ዓህራሄ፡

2 ጥሃና ራፓ ጌይንታያኩ።

3 ቤላዔ ዜርፃ፡- ዓዳሬ፡ ጌራ፡ ዓቢሁዳ፡

4 ዓቢሹዓ፡ ናዕማኔ፡ ዓሆሃ፡

5 ጌራ፡ ሹፑፓኑና ሁራሜ ጌይንታያኩ።

6-7 ዔሁዳ ዜርፃ፡- ናዕማኔ፡ ዓሂያና ጌራ ጎፆያኩ፤ ዔያታ ጌባዔይዳ ናንጌፆ ጌንፃፓ ዳውሰንቲ ማናሃቲ ዳንዲ ዒኢካ ናንጌ ማኣሮ ዓሶ ሱኡጎኩ፤ ዩካ ዔያቶ ዔኪ ዳንዳሢ ዐዛና ዓሂሁዳኮ ዓዶ፡ ጌራናኩ።

8-9 ሻሃራሜ፡- ሁሽሜና ባዕራ ጌይንታ ለምፆ ላኣሊ ዓኣንቲ ዔያቶ ዓንጃኔ፤ ዩካፓ ሞዓኣቤ ዓጮይዳ ናንጌቤቃ ሆዶሾ ጌይንታ ፔቲ ላኣሊሰኩፎ ዔኪ ላንካይ ዓቲንቁ ናይ ሾዔኔ፤ ዩንሢያ፡- ዮባቤ፡ ዪቢያ፡ ሜሻ፡ ማልካኣሜ፡

10 ዩዐፃ፡ ሳክያና ሚርማ ጌይንታያኩ፤ ዒዛኮ ዓቲንቆ ናኣታ ጉቤ ዒዛ ማኣሮ ዓሶኮ ሱኡጌ ማዔኔ።

11 ቃሲ ሃሃ ሁሻሜ ጌይንታ ማቾይዳፓ ዓሂቱቤና ዔልፓዓሌ ጌይንታ ለምፆ ዓቲንቁ ናይ ሾዔኔ።

12 ዔልፓዓሌያኣ፡- ዔቤሬ፡ ሚሼዓሜና ሼሜዳ ጌይንታ ሃይሃ ዓቲንቁ ናይ ሾዔኔ፤ ሼሜዳ ፆና ሎዳ ጌይንታ ካታማሰኩንሢና ኮይላ ዓኣ ጉርዶሞ ማኬያኩ።

ጋኣቲንታ ዓያሎኔይዳ ናንጋ ቢኢኒያሜ ዓሶ

13 ቤሪዓና ሴማዓና ዓያሎኔ ካታሞይዳ ዳዔ ማኣሮ ዓሶኮ ሱኡጎኩ፤ ዔያታ ቤርታ ጋኣቲይዳ ናንጋ ዴሮ ዳውሰ ኬሴኔ፤

14 ቤሪዓ ዜርፃ፡- ዓሂዮ፡ ሻሻቁ፡ ዪሬሞቲ፡

15 ዜባድያ፡ ዓራዳ፡ ዔዳሬ፡

16 ሚካዔኤሌ፡ ዩሽፓና ዮሃ ጌይንታያኩ።

ዩሩሳላሜይዳ ናንጌ ቢኢኒያሜ ዓሶ

17 ዔልፓዓሌ ናኣታ፡- ዜባድያ፡ ሜሹላሜ፡ ሂዘቁ፡ ሄቤሬ፡

18 ዩሽሜራዬ፡ ዩዝሊዓና ዮባቤ ጌይንታያኩ።

19 ሺምዒ ናኣታ፡- ያቂሜ፡ ዚክሪ፡ ዛብዲ፡

- 20 ዔሊዔናዬ፣ ደልታዬ፣ ዔሊዔኤሌ፣
- 21 ዓዳያ፣ ቤራያና ሺምራቴ ጌይንታያኬ።
- 22 ቫሻቁ ናኣታ፡- ዒሽጳኔ፣ ዔቤሬ፣ ዔሊዔኤሌ፣
- 23 ዓብደኔ፣ ዚክሪ፣ ሃናኔ፣
- 24 ሃናኒያ፣ ዔላእሜ፣ ዓንቶቲያ፣
- 25 ዩፕዴያና ፓኑዔሌ ጌይንታያኬ።
- 26 ዪሮሃሜ ናኣታ፡- ሻምሼራዬ፣ ሼሃሪያ፣ ዓታልዓያ፣
- 27 ያዕሬሺያ፣ ዔሊያና ዚክሪ ጌይንታያኬ።
- 28 ዬያታ ቢያ ዬሩሳላሜይዳ ናንጌ፣ ቤርታሳ ማኣሮ ዓሶኮ ሱኩጎንታ ዔያቶ ማኣሮኮ ቶይዶ ቶይዶኬ።

ጌባዖኦኔና ዬሩሳላሜናይዳ ናንጌ ቢኢኒያሜ ዓሶ

- 29 ዪረዔኤሌ ጌባዖኦኔ ካታሞ ማዢ ዒኢካ ዴዔኔ፤ ዒዛኮ ማቻ ማዒካ ጌይንታያ ማዓዛ፣
- 30 ዒዛኮ ናኣዚ ቶይዲ ዓብደኔ ጌይንታኔ፤ ሜሌ ዒዛኮ ዓቲንቆ ናኣታ፡- ፀሬ፣ ቂሼ፣ ባዓኣሌ፣ ኔሬ፣ ናኣዳኣቤ፣
- 31 ጌዶሬ፣ ዓሂዮ፣ ዜኬሬንታ፣
- 32 ሺምዓኮ ዓዶ ሚቅሎቴ ጌይንታሢንታኬ፤ ዔያቶኮ ዜርፃ ዔያቶ ቶኦኮ ማዔ ዒጊኖ ኮይላ ዬሩሳላሜይዳ ናንጋኔ።

ካኣቲ ሳኣዖኦሌ ማኣሮ ዓሶ

- 33 ኔሬ ቂሴ ሾዔኔ፤ ቂሴ ካኣቲ ሳኣዖኦሌ፤ ሳኣዖኦሌ፡- ዮናታኣኔ፣ ማልኪሹዓ፣ ዓቢናዳኣቤና ዔሽባዓኣሌ ጌይንታ ዖይዶ ዓቲንቁ ናይ ሾዔኔ፤
- 34 ዮናታኣኔያ ሜሪባዓኣሌ፤ ሜሪባዓኣሌ * ሚካ ሾዔኔ።
- 35 ሚካ፡- ፒቶኔ፣ ሜሌኬ፣ ታሬዓና ዓሃዜ ጌይንታ ዖይዶ ዓቲንቁ ናይ ሾዔኔ።
- 36 ዓሃዜ፡- ዬሆዓዳ ሾዔኔ፤ ዬሆዓዳ፡- ዓለሜቲ፣ ዓዝማዌቲንታ ዘምሪ ጌይንታ ሃይሆ ዓቲንቁ ናይ ሾዔኔ፤ ዚምሪ ሞፃ ጎሆሢ ሾዔኔ፤
- 37 ሞፃ፡- ቢንዓ፣ ቢንዓ ራፓ፣ ራፓ ዔልዓሳ፣ ዔልዓሳ ዓፃሌ ሾዔኔ።
- 38 ዓፃሌ፡- ዓዝሪቃሜ፣ ቦኬሩ፣ ዒሰማዔኤሌ፣ ሼዓሪያ፣ ዓብደዩና ሃናኔ ጌይንታ ላሆ ዓቲንቁ ናይ ሾዔኔ፤
- 39 ዓፃሌ ጌርሲ ዔሼቁ ቶይዶ ናዓሢ ዑላሜ፣ ሄሌሢ ያዑሼ፤ ሃይሣሳሢ ዔሊፔሌፃ ጌይንታያ ዓቲንቁ ናይ ሾዔኔ።

* 8:34 ሜሪባዓኣሌ ጌይንታሢ፡- 2ሳሙ. 4:4ይዳ «ሚገሰሹቴ» ጌይንታኔ።

40 ዑላማኮ ሳቲንቆ ናኣታ ሂኢሺ ዲኪሢና ዔርቲቲ ያልዚ ዓሲኬ፤ ዔያቶኮ ዜርፃ ዋሊ ዑፃ ፔቲ ጃኤታና ደንጊታሚ ናይና ናኣቶኮ ናይና ዓኣያኬ፤ ዓካሪ ሱንፃ ኬዴ ዔኤሊንቴዞንሢ ቢያ ቢኢኒያሚ ፃጶኬ።

9

ዲዒንታፓ ማዔ ዒሰራዔኤሌ ዴሮ

1 ዒሰራዔኤሌ ዴራ ፔ ማኣሮ ዓሶና ዓሶና ፃኣፒንቴኔ፤ ዬይ ሃይሳ ዒሰራዔኤሌ ዓሶኮ ካኣቶ ሃይሶ ማፃኣፓ ፃኣፒንቴ ዓኣኔ።

ጹሁዳ ዴራ ማጴ ጎሞ ዛሎና ማቶ ዔኪ ዲዒንቲንሢና ባብሎኔ ዓጮ ዓኣጴኔ፤

2 ካታሞይዳ ካታሞይዳ ዔያቶኮ ናንጎ ቤዞ ባንሢ ማዔ ቤርታሳ ዓሳ፡- ቁኤሳ፡ ለዊ ዓሳ፡ ጌኤዠ ማኣሮይዳ ማዳ ዓሶንታ ሃንጎ ዒሰራዔኤሌ ዓሲንታኬ።

3 ጹሁዳይዳፓ፡ ቢኢኒያሚይዳፓ፡ ዔፕሬኤሚንታ ሚናኣሴንታ ፃጶፓ ዓሲ ዬሩሳላሚይዳ ናንጋኒ ዴንዴ።

4-6 ጹሁዳ ፃጶይዳፓ ዬሩሳላሚይዳ ናንጋኒ ዴንዴ ዓሳ ላሆ ጃኤታና ታዞጲታሚ ማኣሪ ዓሲኬ።

ጹሁዳ ናኣዚ ፓሬሴ ዜርፃ፡- ያሚሪኮ ናኣዚ ናያ፡ ዓሚሁዴ ናኣዚ፡ ዑታዬ ሱኡጌ ማሂ ደኣሬኔ፤ ማሌ ሃንጎ ፓሬሴ ዜርፃ ዒሞሪና ባኒናኬ።

ጹሁዳ ናኣዚ፡ ሸኤላ ዜርፃኮ ቶይዳሢ ዓሳያ ዒዛኮ ናኣቶና ዋላ ማኣሮ ዓሶኮ ሱኡጋሢኬ።

ጹሁዳ ናኣዚ ዛራሂ ዜርፃ፡- ዩዑዔሌ ዔያቶኮ ሱኡጌ ማሄኔ።

7-8 ቢኢኒያሚ ዜርፃፓ ዬሩሳላሚይዳ ናንጋኒ ዴንዴ ዓሳ ሃይካፓ ዴማ ፓይዲንታዞንሢኬ፡-

ሃሴኑዓ ናኣዚ ሆዳውያ፡ ሆዳውያ ናኣዚ ማሹላሚ፡

ሚሹላሚ ናኣዚ ሳሉ፡ ዩሮሃሚ ናኣዚ ዩብኔያ፡

ሚክሪ ናኣዚ ናያ ዑዚ ናኣዚ ዔላ፡

ዩብኒያ ናኣዚ ሬዑዔኤሌ፡ ሬዑዔኤሌ ናኣዚ ሸፓፂያ፡ ሸፓፂያ ናኣዚ ማሹላሚንታኬ።

9 ቢኢኒያሚ ፃጶፓ ዬሩሳላሚይዳ ናንጋኒ ዴንዴ ዓሳ ዋሊ ዑፃ ታዞጲ ጃኤታና ደንጊታሚ ላሆ ማኣሪ ዓሲኬ፤ ሃይካፓ ኬዴ ፓይዲንቲ ሳቲንቆ ቢያ ማኣሮ ዓሶኮ ሱኡጎ ሱኡጎኬ።

ዬሩሳላሚይዳ ናንጌ ቁኤሶ

10-12 ዬሩሳላሚይዳ ናንጌ ቁኤሳ ሃይካፓ ዴማ ፓይዲንታዞንሢኬ፡-

9:3 ዓ.ዘ. 2:27፤ ኔሄ. 7:73።

ዱዳዊያ፣ ዩሆያሪቤና ያከኔ፣
 ጌኤዠ ማኣሮይዳ ቢታንታ ዓኣ ሂልቂያ ናኣዚ ዓዛሪያሴ፤
 ዒዛኮ ቤርታኣ ዓዶንሢ፡- ሜሹላሜ፣ ፃዶቄ፣ ሜራዮቴንታ
 ዓሂፀ-ቤንታኬ።
 ዩሮሃሜ ናኣዚ ዓዳያ፤ ዒዛኮ ቤርታኣ ዓዶንሢ፡- ፓሽሁሬና
 ማልኪያናኬ።
 ዓዲዔኤሌ ናኣዚ ማዕሳዬ፤ ዒዛኮ ቤርታኣ ዓዶንሢ፡- ያህዜራ፣
 ሜሹላሜ፣ ሜሺሊሚቴንታ ዒሜሬንታኬ።
 13 ማኣሮ ዓሶኮ ሱኡገ ማዔ ቄኤሳ ዎሊ ዑፃ ፔቴ ሺያና ላንካይ
 ዪኤታና ላሂታሚኬ፤ ዬያታ ቢያ ጌኤዠ ማኣሮይዳ ማዲንታ ማዶ
 ማዳኒ ዔራቶ ዓኣያኬ።

ዩሩሳላሜይዳ ናንጌ ሌዊ ዓሶ

14-16 ዩሩሳላሜይዳ ናንጌ ሌዊ ዓሶ ሃይማፓ ዴማ ፓይዲንታ
 ዓሶኬ፡-
 ሃሹቤ ናኣዚ ሹማዒያ፤ ዒዛኮ ቤርታኣ ዓዶንሢ፡- ሜራሪ
 ቶኣኮይዳፓ ዓዘሪቃሜና ሃሻቢያናኬ።
 ባቅባቃሬ፣ ሄሪሹንታ ጋላሌ፤
 ሚካ ናኣዚ ማታኒያ፤ ዒዛኮ ቤርታኣ ዓዶንሢ፡- ዚክሪና ዓሳኣፔናኬ።
 ሹማዒያ ናኣዚ ዓብዲዲ፤ ዒዛኮ ቤርታኣ ዓዶንሢ፡- ጋላሌና
 ዩዲታናኬ።
 ኔያፓ ካታሞ ዴማ ማዔ ዓጫ ናንጋ፣ ዔልቃናኮ ናኣዚ ናዖ፣ ዓኣሳ
 ናኣዚ ቤሪኪያ።

ዩሩሳላሜይዳ ናንጌ ጌኤዠ ማኣሮ ካፓ ዓሶ

17 ዩሩሳላሜይዳ ናንጌ ጌኤዠ ማኣሮ ካፓ ዓሶ ሃኣቶኬ፡-
 ሻሉሜ፣ ዓቁቤ፣ ፃልሞኔ፣ ዓሂማኔንታ ጌርሲንሢንታኬ፤ ዬያቶኮ
 ሱኡጋሢ ሻሉሜኬ፤
 18 ዴንዲ ዬኖ ዎዶ ሄላንዳኣና ዓባ ኬሰካ ባንዖና ካኣቲ ጌላ ዲሮ
 ካሮ ካፓንዳጉዲ ዬያታ ዓይሢንቲኔ፤ ዔያታ ቤርታ ሌዊ ዓሶ ጉርዶ
 ባንሢ ጌሎ ዲሮ ካሮ ካፓያኬ።
 19 ዔቢያሳፔኮ ናኣዚ ናዖ፣ ቆሬ ናኣዚ ሻሉሜ ቆሬ ቶኣኮ ማዔ፣
 ዒዛኮ ዒጊናና ዎላ ዔያቶኮ ቤርታኣ ዓዶንሢ ናንጌና ናንጋ ጎዳ ዴሮና
 ዎላ ካኣማ ማኣሮ ጌሎ ካሮ ካፓሢጉዲ ዔያታኣ ዓፒሎና ማዢንቴ
 ጌኤዠ ማኣሮ ጌሎ ካሮ ካፓኔ።
 20 ቤርታ ዓሳዜሪ ናኣዚ ፒንሃሴ ዔያቶኮ ሱኡጋሢኬ፤ ዒማና
 ናንጌና ናንጋ ጎዳኣ ዒዛኦ ዎላኬ።
 21 ሜሹሊሚያ ናኣዚ፣ ዛካሪያሴ ዓፒሎና ማዢና ናንጌና ናንጋ
 ጎዳ ዴሮና ካኣማ ማኣሮ ጌሎ ካሮ ካፓያኬ።

22 ከኤያ ጌሎ ካሮንታ ዲሮ ካሮንታ ካፓንዳጉዲ ደኦሪንቴ ዓሳ ዋሊ ዑፃ ላምፆ ጃኤታና ታጰ ላምፆ ዓሲኬ፤ ዔያታ ናንጋ ጉርዶ ጉርዶ ጎይፆ ፓይዲንቴ ፃኣፒንቴኔ፤ ዔያቶኮ ቤርታኣ ዓደንሢ ዬኖ ማዶ ማደንዳጉዲ ዓይሣሢ ካኣቲ ዳውቴና ፆኦሲ ማሊፆ ኬኤዛ ሳሙዔኤሌናኬ።

23 ዬኖ ዓሶና ዬኖ ዓሶኮ ናኣቶና ጌኤዡ ማኣሮ ጌሎ ዲሮ ካሮ ካፒፆ ሃሺባኣሴ።

24 ዲማ ዲማ ባንፆና ጌይፆ፡- ኬዶ ባንፆ፣ ደኦሎ ባንፆ፣ ዓባ ኬሰካ ባንፆንታ ጌላ ባንፆ ሆቶና ፔቴ ፔቴ ዲሮ ጋሮ ጌሎ ካራ ካፓ ዓሲ ዓኣኔ፤

25 ዬያቶ ካፓ ዓሶ ዔያታ ዓኣ ጉርዶይዳ ናንጋ ዒጊና ላንካሳ ኬሎና ኬሎና ዋሊ ዓኣሢ ጌሊ ጌሊ ማኣዳኔ፤

26 ፆይዶ ሌዊ ዓሶንሢ ካፓ ዓሶኮ ሱኡጎ ማዓዛ ዔያታ ጉቤ ቢታንቶ ዓንጊንቴያኬ፤ ዬያጉዲ ሃሣ ጌኤዡ ማኣሮይዳ ዓኣ ቆልፆና ጋሮይዳ ጌሃ ማሆኮዋ ዔያታ ሱኡጌኬ።

27 ጌኤዡ ማኣሮ ካፓንና ጉቶ ጉቶ ዲሮ ጋሮ ጌሎ ካሮ ቡላሢ ዔያቶ ማዔሢሮ ዔያታ ዋርቃሢ ጌኤዡ ማኣሮኮ ዑኬኬ።

ሜሌ ሌዊ ዓሶ

28 ሜሌ ሌዊ ዓሳ ጌኤዡ ማኣሮይዳ ማደንቶ ማሆ ሱኡጌ ማዒ ዛጋኔ፤ ማሆ ማደሮ ኬሶዋና ሃሣ ጋፒንፆይዳ ማሢ ጌልዘዋና ዔያታ ፓይዲ ፓይዲ ዛጋኔ።

29 ሃንጎዋታ ሃሣ ዛሎ ማደንቶ ማሆንታ፣ ዲኢሎንታ፣ ዋይና ዑኩንታ፣ ሪሚቶ ዛይቶንታ፣ ዑንጆና ዲማ ዲማ ሳውቃ ዴኤሾኮዋ ቢያ ሱኡጎኬ።

30 ሳውቃ ዴኤሾ ዋላ ሲኢሪፆ ጋዓንቴ ዓይሢንቴሢ ቄኤሶም ሌሊኬ።

31 ቆሬ ቶኦካፓ ሻሉሜኮ ቶይዶ ናዓሢ፣ ማቲትያ ናንጊና ናንጋ ጎዳም ዒንጊንታ ካፆ ካሢሳ ሱኡጋሢኬ፤

32 ቄዓቲ ቶኦካ ሃሣ ጌኤዡ ማኣሮም ማዓ ካፆ ሃውሾ ኬሎና ኬሎና ካሢሳ ሱኡጎኬ።

33 ዛላ ሌዊ ማኣሮ ዓሶኮ ሱኡጋ ጌኤዡ ማኣሮይዳ ዋንቴና ሮኦሪና ፆኦሲ ቦንቾም ዓይኩም ዓይናዳኔ፤ ዔያታ ዋንቶና ሮኦሪና ቢያ ማደያ ማዔሢሮ ሜሌ ማዶ ቢያ ሃሺ ጌኤዡ ማኣሮኮ ዲሮ ጋራ ዔያቶም ጊኢጊንቴ ቆልፆይዳ ናንጋኔ።

34 ዬንሢ ቢያ ሌዊ ማኣሮ ዓሶኮ ሱኡጎኬ፤ ዔያቶኮ ፃጳ ፓይዲንቴ ጎይፆና ሱኡጌ ማዒ ዬሩሳላሜይዳ ናንጌኔ።

ካአቲ ሳአዖኦሌኮ ቤርታአ ዓድንሢና ዜርዖና
(1ዖኦሲ. ዓሃኬ 8:29-38)

35 ዪዒዒኤሌ ጎዖሢ ጌባዖኦኔ ካታሞ ማዢ ዒኢካ ዴዔኔ፤ ዒዛኮ ማቻ ማዕካ ማዓዛ፤

36 ናኣዚ ቶይዲ ዒዛኮ ዓብድኔ ጌይንታኔ፤ ሜሌ ዒዛኮ ዓቲንቆ ናኣታ፡- ፀሬ፣ ቂሼ፣ ባዓኣሌ፣ ኔሬ፣ ናኣዳኣቤ፣

37 ጌድሬ፣ ዓሂዮ፣ ዛካሪያሴና ሺምዓኮ ዓድ ሚቅሎቲ ጎዖያኬ፤

38 ሚቅሎቲ ሺምዓኮ ዓድኬ፤ ዔያታ ሃንጎ ዔያቶኮ ዒጊኖኮ ዑኩ ዬሩሳላሚይዳ ናንጋኔ።

39 ኔሬ ቂሴ፣ ቂሴ ካአቲ ሳአዖኦሌ ሾዔኔ፤ ሳአዖኦሌያ ዮናታኣኔ፣ ማልኪሹዓ፣ ዓቢናዳኣቤና ዔሽባዓኣሌ ጌይንታ ዓቲንቁ ናይ ሾዔኔ፤

40 ዮናታኣኔ ሜሪባዓኣሌ፣ ሜሪባዓኣሌ * ሚካ፣

41 ሚካ ፒቶኔ፣ ሜሌኬ፣ ታሬዓና ዓሃዜ ጌይንታ ዓቲንቁ ናይ ሾዔኔ።

42 ዓሃዜ ያዕራ፣ ያዕራ ዓሌሜቲ፣ ዓሌሜቲ ዓዝማዌቲና ዚምሪ ጌይንታ ዓቲንቁ ናይ ሾዔኔ፤ ዚምሪያ ሞፃ ጎዖሢ ሾዔኔ፤

43 ሞፃ ቢንዓ፣ ቢንዓ ሬፓያ፣ ሬፓያ ዔልዓሳ፣ ዔልዓሳ ዓፄሌ ሾዔኔ።

44 ዓፄሌ፡- ዓዝሪቃሜ፣ ቦኬሩ፣ ዒሰማዔኤሌ፣ ሽዔሪያ፣ ዓብዲዩና ሃናኒ ጌይንታ ላሆ ዓቲንቁ ናይ ሾዔኔ።

10

ካአቲ ሳአዖኦሌኮ ሃይሶ
(1ሳሙ. 31:1-13)

1 ፒሊሰፄኤሜ ዓሳ ሙኪ ዒሰራዔኤሌ ዓሶ ዖሌም ዒሰራዔኤሌ ዓሳ ዔያቶ ቤርታፓ ጳሽኬኔ፤ ዬያ ዖሎና ሚርጌ ዒሰራዔኤሌ ዓሲ ጊልቦዓ ዲካ ሃይቄኔ፤

2 ዒማና ፒሊሰፄኤሜ ዓሳ ባሼና ሳአዖኦሌና ዒዛኮ ናኣቶና ዳውሴኔ፤ ዬካፓ ሳአዖኦሌኮ ናኣቶ፡- ዮናታኣኔንታ ዓቢናዳኣቤንታ ማልኪሹዓንታ ዎዴኔ፤

3 ሃሣ ሳአዖኦሌ ዓኣ ዛሎና ዖላ ኮሺ ዶዴሢሮ ሞርካ ዒዛ ሂኢሺና ማኣሳንሢ ዲኬኔ፤

4 ዒዚ ዒማና ዒዛኮ ጊቲሞ ዓርቂ ዒዛና ዎላ ሃንታ ዴጌሰኬያሞ፡- «ሃይ ዓይሁዴ ማዒባኣ ዓሳ ታና ዓማሉዋጉዲ ኔኤኮ ጨንቾ

* 9:40 ሜሪባዓኣሌ ጌይንቱሢ፡- 2ሳሙ. 4:4ይዳ «ሚፐሶሹቲ» ጌይንቱኔ።

ዓፓር ቱጊ ታና ዎዴ!» ጋዓዛ፣ ዴጌሢ ጋዓንቴ ዬያይዳኒ ሚርጌና ዒጊጩሢር ዒዛ ሃሽኔ፤ ዬያር ሳኦኦሌ ፔ ጩንቸ ዓፓር ቱጊ ሳዓ ዔቁሲ ጊዳ ሎኦሜ፤

5 ዬይ ዴጌሢ ሳኦኦሌ ሃይቁሢ ዛጌ ዎዶና ዒዚያ ፔ ጩንቸ ዓፓር ሳይዳ ዔቁሲ ጊዳ ጩቲ ሃይቁ።

6 ዬያር ሳኦኦሌና ሃይሦ ዓቲንቆ ናኦታኦ ዎሊ ዑፃ ሃይቁ፤ ዒዛ ቤዛ ካኦታዳንዳ ዓሲ ዓቲዎፃ ቢያ ሃይቁ።

7 ዒማና ዒይዘራዔኤሌ ዶኦጫ ናንጋ ዒሰራዔኤሌ ዓሳ ዔያቶኮ ፖኦሊሳ ጳሽኬሢ፤ ሃሢ ሳኦኦሌና ዒዛኮ ናኦቶና ሃይቁሢ ዎይዛፃ ፔኤኮ ካታሞ ካታሞ ሃሺ ጳሽኬም ፒሊሰጻኤሜ ዓሳ ሙኪ ዔያቶኮ ካታሞ ዓርቁ።

8 ዎሎ ዓቦኮ ዘር ጉቴሎ ፒሊሰጻኤሜ ዓሳ ሃይቁ፣ ዒሰራዔኤሌ ዓሰኮ ዓኦ ባኮ ጉሲ ዔካኒ ዴንዳፃ ሳኦኦሌና ናኦቶናኮ ለዛ ጊልቦዓ ዲካ ዓኦንቴ ዴንቁ፤

9 ዬካፓ ዔያታ ሳኦኦሌኮ ቶኦኮ ቲቁ፣ ሃሢ ዎሎ ዓንጋሞዎ ጉሴሰካፓ ዔያቶኮ ዎዞ ዔያታ ካኦሽካ ዎኦዘና ዓሰናም ኬኤዛንዳጉዲ ኪኢታ ዓሲ ዳኬ።

10 ሳኦኦሌኮ ዎሎ ዓንጋሞ ዔያቶ ዎኦዘኮ ጌኤዦ ማኦርፓ ፔቴዘይዳ ዔያታ ጌሢ፤ ቶኦኮ ዒዛኮ ዔያታ ዔያቶ ዎኦዘሢ፣ ዳኦጎፔ ጎፃሢ ጌኤዦ ማኦርይዳ ሱጻ።

11 ዒማና ጌሌዓዴይዳ ናንጋ ያቤሽ ዴራ ፒሊሰጻኤሜ ዓሳ ሳኦኦሌይዳ ማዴ ጌኖ ማዶ ዎይዜ ዎዶና፣

12 ጫርሺ ዓሲ ዴንዲ ሳኦኦሌና ናኦቶናኮ ሌዞ ዔኪ ያቤሽ ሙኬ፤ ዒኢካ ዓኦ ሻኦቦ ዴማ ዔያታ ዲኡኬሰካፓ ላንካይ ኬሊ ጉቤ ሙኡዚ ሃሺ ሲዬ።

13 ሳኦኦሌ ናንጊና ናንጋ ጎዳም ጉሙርቁንታያ ማዒባኦሢር ሃይቁ፤ ዒዚ ናንጊና ናንጋ ጎዳኮ ዓይሢፃ ማዲ ኩንሦ ዒጻ፤ ሃሢ ናንጊና ናንጋ ጎዳ ጋዓ ባኮ ሃሺ ሃይቁ ዓሰኮ ዔኤዦ ዔኤላ ዓሶ ዦቶሢና ካራ ዴንቃኒ ኮዔ፤

14 ናንጊና ናንጋ ጎዳ ዎዚ ጋዓቴያ ዒዚ ዎኦጫ ዒጻሢር ናንጊና ናንጋ ጎዳ ዒዚ ዎዴ፤ ዬካፓ ካኦቲሞዎ ዒዛኮ ዒሴዬናኦኪ፣ ዳውቴ ባንሢ ሺርሺ።

11

10:14 ለዊ. ዓኬ 19:31፤ 20:6፤ 1ሳሙ. 13:8-14፤ 15:1-24፤ 28:7-8።

ዳውቴ ዒስራዔኤልና ዩሁዳ ዓሶናኮ ካአቲ ማዔህሂ
(2ሳሙ. 5:1-10)

1 ዒስራዔኤል ዳራ ቢያ ዳውቴ ኮራ ኩብሮኦኔ ሙካዖ፡- «ኮኡኒ ቢያህሂ ኔኤኮ ዒጊኖኩ፤

2 ቤርታ ሳአዖኦሌ ካአታዲ ዓአንቴታዖ ዒስራዔኤል ዳሮ ዖሎሞ ዔኪ ዓአዳህ ኔናኩ፤ ዩያ ሌሊቱሞንቴ ናንጊና ናንጋ ጎዳ ማዔ ኔ ያኦዛህሂ ታኦኮ ዳሮ ዔኪ ዓአዳንዳህና ዔያቶኮ ካአቲ ማዓንዳህያ ኔናኩ። ጌዒ ኔኤሞ ኩኤዜኔ» ጌዔኔ።

3 ዩያይዲ ዒስራዔኤልኮ ሱኡጋ ቢያ ዳውቴ ኮራ ኩብሮኦኔ ሙካዛ፣ ካአቲ ዳውቴያ ናንጊና ናንጋ ጎዳ ቤርታ ዔያቶና ዎላ ኩብሮኦኔይዳ ጫአቄኔ፤ ናንጊና ናንጋ ጎዳ ሳሙዔኤል ዛሎና ኩኤዜ ቃኦሎ ጎይዖና ዳውቴ ዔያታ ካአቲሞሞ ዶኦሚ ዒስራዔኤሌይዳ ካአታህኔ።

ዳውቴ ዩሩሳላሚ ዖሊ ባሽህሂ

4 ካአቲ ዳውቴና ዒስራዔኤል ዓሳ ጉቤ ዳንዲ ዩሩሳላሚ ካታሞ ዖሊኔ፤ ዒማና ካታሚሎኮ ሱንፃ፡- «ዒያቡሴ» ጌይንታኔ፤ ዒዛ ዓጮይዳ ናንጋዘንህሂ ዒያቡሳ ዓሶኩ።

5 ዩና ዓሳ ዳውቴሞ፡- «ኔ ሃይካ ፔቴታዖ ጌላዓኩ» ጋዓዛ፣ ዳውቴ ጋዓንቴ ጃዮኔይዳ ዔያታ ዎርዲ ዳዔ ቤዘ ዓርቄኔ፤ ዩካፓ ዩና ቤዘ «ዳውቴ ካታሚ» ጌይንቲንህሂ ዓርቄኔ።

6 ዳውቴ ዒማና፡- «ዒያቡሳ ዓሶ ቢሪ ቤርታዲ ዲኩ ዓህ ዖሎ ዓሶኮ ሱኡጌ ማዓንዳኔ!» ጌዔኔ፤ ዩያሮ ጃሩያ ናኦዚ፣ ዒዮዓቤ ቤርታዲ ዳንዲ ዒያቡሳ ዓሶ ዲኩህረ ዒዚ ዖሎ ዓሶኮ ሱኡጋህሂ ማዔኔ፤

7 ዳውቴ ዳንዲ ዎርዲዮ ቤዘ ጌሊ ዳዔህረ ዩና ካታሚ «ዳውቴ ካታሚ» ጌይንቲኔ።

8 ዳውቴያ ሚሎ ጌይንታ ቤዘፓ ዓርቃዖ ካታሚሎኮ ዙሎ ኩልቄ ዲርቄኔ፤ ሄሊሳዖ ዒዮዓቤያኦ ካታሚሎኮ ዓቴ ዛሎ ኮሽኔ፤

9 ቢያ ባኮ ዎይህ ጎዳ ማዔ ያኦዛህሂ ዒዛና ዎላ ማዔህረ ዳውቴ ሃቸሞ ዶዲ ዶዲ ዓአዳኔ።

ዖሎና ዔርቲ ዳውቴኮ ፖኦሊሶ
(2ሳሙ. 23:8-39)

10 ዳውቴኮ ዖሎና ዔርቲ ፖኦሊሶ ሱንፃ ሃይካፓ ዳማ ፓይዲንታ ጎይዖኩ፤ ዔያታ ሃንጎ ዒስራዔኤል ዓሶና ዎላ ማዔ ናንጊና ናንጋ

11:4 ዒያ. 15:63፤ ሱኡጎ. ማፃ 1:21።

ጎዳ ዳውቴም ከኤዜ ዋዞ ቃኣሎ ጎይያና ዳውቴ ካኣታዳንዳጉዲ፤ ሃሃ ካኣቱማኣ ዶዲ ኮሺ ዔርቴያ ማዓንዳጉዲ ማሄኔ።

11 ቤርታሳሢ ሃኪሞኔ ቶኦኪ ማዔ ያሾብዓሜ ማዓዛ፣ ዒዚያ ሶሎና ዔርቴ ሃይሃንሢኮ * ሱኡጋሢኬ፤ ዒዚ ዓይጎ ዋኦቴይ ጌዔቴ ዋርሢ ዔኪ ሃይሃ ጃኤታፓ ዑሣ ማዔ ዓሲና ዋላ ፔቴና ሶልታዎ ዬያቶ ቢያ ዋዳኔ፤

12 ዒዛ ሄሊሳዎ ሃይሃ ሶሎና ዔርቴዞንሢፓ ፔቴሢ ዓሆሄ ቶኦካፓ ዶዶ ናኣዚ ዓላዜሬኬ፤

13 ዒዚያ ፒሊሰጃኤሜ ዓሳ ሶሎሮ ገኢገንቴ ዋዶና ፓስዳሚሜይዳ ዳውቴና ዋላኬ፤ ዒዛ ቤዞይዳ ዔልዓ ሚርጌ ጎሽኮና ጎሺ ዓኣንቴ ዒሰራዔኤሌ ፖኦሊሳ ፒሊሰጃኤሜ ዓሶ ቤርታፓ ጳሽኬኔ።

14 ጋዓንቴ ዓላዜሬና ዒዛና ዓኣ ዓሳ ዬያ ጎዡ ጋራ ፒሊሰጃኤሜ ዓሶ ቃዚ ሶሌኔ፤ ናንገና ናንጋ ጎዳኣ ዔያቶ ሶሎና ባሺሲሴኔ።

15 ፔቴ ከሊ ሃይሢታሚ ሶሎና ዔርቴ ፖኦሊሶፓ ሃይሃ ፖኦሊሴ ፒሊሰጃኤሜኮ ፖኦሊሳ ራፓይሜ ዶኦጫ ዱንኪ ዴዒ ዓኣንቴ ዳውቴ ናንጋ፣ ዓዲላሜ ዴና ዔቶ ኮይላ ዓኣ ላሎ ዴንዴኔ፤

16 ዳውቴ ዒማና ዋርዲዮ ማላ ጌሜርይዳ ዓኣንቴ ፒሊሰጃኤሜ ፖኦሊሶኮ ዛላ ቤኤቴሌሃሜ ካታሞ ጌሊ ዓርቄኔ።

17 ዳውቴ፡- «ቤኤቴሌሃሜ ጌሎ ዲሮ ካሮ ኮይላ ዓኣ ዋኣዎ ዔታፓ ዑሽኮ ዋኣሢ ዓይጌ ታኣሞ ዒንጋንዳይ?» ጌይ ዓፃዴኔ።

18 ዬማና ሶሎና ዔርቴ ሃይሃ ፖኦሊሶንሢ ፒሊሰጃኤሜ ዓሳ ዓኣ ቤዞይዳና ዓኣዲ ዋኣዎ ዲዎ ዔታፓ ዋኣሢ ዴዒ ዳውቴም ዔኪ ሙከንቴ፣ ዳውቴ ዑሽካኒ ኮዒባኣሢሮ ዋኣዎ ናንገና ናንጋ ጎዳም ዒንጎ ባኣዚ ማሂ ሳዓ ላኣሊ፡-

19 «ታኣኒ ሃያ ዋኣዎ ፔቴታዎ ዑሽካዓኬ! ታኣኒ ዑሽኬያ ማዔቴ ዬንሢ፣ ፔ ሺምፓሢ ዒዳ ዴንዴ ሶሎና ዔርቴ ዓሶንሢኮ ሱጉዎ ዑሽኪሢጉዴያኬ!» ጌዔኔ። ዬያሮ ዋኣዎ ዑሽካኒ ዒ ናሽኪባኣሴ፤ ዬንሢ ሶሎና ዔርቴ ሃይሃ ፖኦሊሶንሢ ጫርቂ ማዴ ባካ ዬያኬ።

20 ዒዮዓቤኮ ጌርሲ ዓቢሳ ጎዎሢ ዬንሢ፣ ሶሎና ዔርቴ ሃይሃ ፖኦሊሶንሢኮ ዑዎ ሱኡጋሢኬ፤ ዒዚ ዋርዎ ዓርቂ ሃይሃ ጃኤታ ዓሲ ዋዳሢሮ ዬንሢ፣ ሶሎና ዔርቴ ሃይሃ ፖኦሊሶንሢጉዲ ዔርቴያ ዒ ማዔኔ፤

* 11:11 ሃይሃንሢኮ ፔቴ ሚናኣ ማፃኣፔ፡- 2ሳሙ. 23:8ይዳ «ሶሎና ዔርቴ ሃይሢታሚ ዓሲ» ገዔኔ፤ ዔብሬ ዓሶ ሙኤጮና ሃይሃንታ ሃይሢታሚንታ ፃኣፒንታ ዋዶና ፔቴ ማዔሢሮ ዬና ቤዛ ዋኣዲ ጋዓቴያ ዔርቴዋያኬ።

21 የሎና ዔርቲ ሃይሃንሢጉዲ ተ ማዒ ዒ ፓይዲንቲባኢያ ማዔቲያ ዒ ጫርቂ ማዳ ማዳና ዔያቶይዳፓ ባሼ ጳንጨፍ ቦንቾ ዴንቁሢር ዔያቶኮ ሱኡጌ ማዒኒ ዳንዳዔኔ።

22 ቃብጸዔኤሌ ዓጮይዳ ዮዳሂ ናኣዚ ቤናያ የልዚና ዔርቲ ፖኦሊሴኔ፤ ዒዚ ላምዖ፣ ሞዓኣቤ ዓጮኮ የሎና ዔርቲ ዓሲ ዎዴሢ ሃሾዛ ሜሌ ሚርጌ ጫርሹሞ ማዳ ማዳኔ፤ ፔቲና ሳዖይዳ ዴኤፒ ሻቲ ኬዲ ሳዖ ባይዜ ኬሊስኬና ዒዚ ፔቲ ዴኔ ዔቲ ጌሊ ዘቢ ዎዴኔ፤

23 ዬያጉዲ ሃሃ ኮሺ ዴኤፒ ዎርሢ ሳርቁያ፣ ዔጳ ደንጎ ዎዳ ማዔ ዓንዲሪ ጌብጸ ዓሲስኬያኣ ዎዴኔ፤ ዒማና ቤናያ ኩጮይዳ ኮኦሎፓ ዓታዛ ሜሌ ዓንጋሞ ዔኩዎየ ጌብጸ ዓሢ ባንሢ ሙኪ ጌብጸ ዓሢ ጳርቁሰካፓ ጌብጸ ዓሢኮ ዘዓ ዓንዲራሾ ሚያጉዲ ማዔ ዎርዖ ሳሪ ዔኪ ዒዛና ዎዴኔ።

24 ዬንሢ ሃይሢታሞንሢዳፓ ቶ ፔቲሢ ማዔ፣ ቤናያ ጫርቂ ማዳ ባካ ዬያኬ፤

25 ሃይሢታሞንሢ ባኣካፓ ሚርጌና ዒዚ የሎና ዔርቲያ ማዔቲያ ዒ ጫርቂ ማዳ ማዳ ሃይሃ ጫርዥ ፖኦሊሶንሢሲጉዲ ማዒባኣሴ፤ ዳውቲ ፔና ካፓ ዓሶኮ ሱኡጌ ማሂ ቤናያ ደኦሬ።

26-47 ዬንሢ የሎና ዔርቲ ሃይሢታሞንሢዳፓ ሜሌ የሎና ዔርቲ ዓሶኮ ሱንፃ ሃይካፓ ዴማ ፓይዲንታዞንሢኔ፡-

- ዒዮዓቤ ጌርሲ ዓሳሄሌ፣
- ቤኤቲሌሄሜ ካታሞ ዓሢ ዶዶ ናኣዚ ዔልሃና፥
- ሃሮዴ ዓጮ ዓሢ ሻሞቲ፣
- ፔሌጿ ዓጮ ዓሢ ሄሌጿ፣
- ቲቆዓ ካታሞ ዓሢ ዒቁሼ ናኣዚ ዒራ፥
- ዓናቶቲ ካታሞ ዓሢ ዓቢዔዜሬ፥
- ሁሻ ዓጮ ዓሢ ሲቤካዬ፥
- ዓሆሄ ዓጮ ዓሢ ዒላዬ፥
- ኔያፓ ዓጮ ዓሢ ማሂራዬ፥
- ሃሃ ኔያፓ ዓጮ ዓሢ ባዕና ናኣዚ ሄሌዴ፥
- ቢኢኒያሜ ዓጮይዳ ዓኣ ጌቢዓ ካታሞ ዓሢ ሪባዬ ናኣዚ ዒታዬ፥
- ፒርዓቶኔ ዓጮ ዓሢ ቤናያ፥
- ጋዓሼ ዓጮ ኮይላ ዓኣ ዶኦጮይዳ ሾይንቲ ሁራዬ፥
- ዓሬባ ዓጮ ዓሢ ዓቢዔኤሌ፥
- ባሁሩሜ ዓጮ ዓሢ ዓዝማዌቲ፥
- ሻዓልቦኔ ዓጮ ዓሢ ዔልያሀባ፥
- ጌዞኔ ዓጮ ዓሢ ሃሼሜ፥

† 11:21 ሃይሃንሢጉዲ ጋዓዛ ዛሎ፡- ፓይ. 11ይዳ ዛጌ። ‡ 11:24 ሃይሢታሞንሢዳፓ ጋዓዛ ዛሎ፡- ፓይ. 11ይዳ ዛጌ።

ሃራሬ ዓጮ ዓሢ ሻጌ ናኣዚ ዮናታኣኔ፥
 ሃሣ ሃራሬ ዓጮ ዓሢ ሳኩሬ ናኣዚ ዓሂዓሜ፥
 ዑሬ ናኣዚ ዔልፓሌ፥
 ሜኬሬ ዓጮ ዓሢ ሄፔሬ፥
 ፔሎኔ ዓጮ ዓሢ ዓሂያ፥
 ቁርሚሎሴ ዓጮ ዓሢ ሄፀሮ፥
 ዔክባዬ ናኣዚ ናዕራዬ፥
 ናኣታኣኔ ጌርሲ ዮዔሌ፥
 ሃግሪ ናኣዚ ሚብሃሬ፥
 ዓሞኦኔ ዓጮ ዓሢ ዪሌቁ፥
 ቤዔሮቲ ዓጮ ዓሢ ዒዮዓቤኮ ያሎ ዓንጋሞ ዔኪ ሃንታ ናህራዬ፥
 ያቲሬ ዓጮ ዓሶንሢ ዒራና ጋሬቤና፥
 ሂታ ዓሢ ያሪዮኔ፥
 ዓህላዬ ናኣዚ ዛባዴ፥
 ሺዛ ናኣዚ ዓዲና፤ [ዬይ ዓሢ ዒዛና ዎላ ሃይሢታሚ ፖኦሊሴ ዓኣያ
 ማዒ ሮኦኬሌ ፃጳፓ ዔርቲ ዓሲኬ፤]
 ማዕካ ናኣዚ ሃናኔ፥
 ሚታኔ ዓጮ ዓሢ ዒዮሳፒዩ፥
 ዓሽቲራ ዓጮ ዓሢ ዑዚያ፥
 ዓሮዔኤሬ ዓጮ ዓሢ ሆታሚ ናኣቶ ሻማዕና ዪዒዔኤሌና፥
 ቲዪ ዓጮ ዓሢ ሺምሪ ናኣቶ ዪዒዕዔኤሌና ዮሃና፥
 ማሃዎ ዓጮ ዓሢ ዔለዔኤሌ፥
 ዔልናዓሜ ናኣቶ ዪሪባሂና ዮሻውያና፥
 ሞዓኣቤ ዓጮ ዓሢ ዪትማ፥
 ያባ ዓጮ ዓሶንሢ፡- ዔሌዔሌ፥ ያቤዴንታ ያዕሲዔሌንታኬ።

12

ቢኢኒያሜ ፃጳፓ ዳውቲ ጊንዖ ሺሬ ዓሶ

1 ዳውቲ ቁሴ ናኣዚ ሳኣዖኦሌይዲፓ ዓኣሺንቲ ዪቅላጌይዳ
 ናንጋንቲ ጉሙርቁንታያና ያልዚ ዛላ ዔራያና ማዔ ሚርጌ ፖኦሊሴ
 ዓዲና ዎላ ፔቲ ማዒ ዒዛ ጊንዖ ሺሬኔ።
 2 ዔያታ ሳኣዖኦሌጉዲ ቢኢኒያሜ ፃጳኬ፤ ዔያታ ሚዛቆና ሻውሎ
 ኩጮናኣ ቢያ ሂኢሺ ዲካኒ፥ ሃሣ ዎራ ዎራኒ ዲንዳዓያኬ፤
 3-7 ዬያታ ጊቢዓ ካታሞይዳ ሸይንቲ፥ ዒሺማዓ ናኣቶ ማዔ
 ዓሂዓዜሬና ዮዓሸናኮ ቢታንቶ ዴማ ዎርቃያኬ። ዬያ ፖሊሶኮ ሱንዖ
 ሃይካፓ ዴማ ዓኣ ጎይዖ ፓይዲንቲ፡-
 ዓዝማቄቲ ናኣቶ ዪዒዔሌና ፔሌጻና፥

ዓናቶቹ ካታሞ ዓሶንሢ ቤራካና ዒዩና፤
 የሎና ዔርቴያታ? ጊንፃፓ ሃይሢታሞ ዔርቴ ሱኡጎ ማዔዘንሢኮ
 ፔቴያ ማዔ፥ ጌባዖኦኔ ካታሞ ዓሢ ዩሽማዕያ፤
 ጌዴራ ካታሞ ዓሶንሢ፡- ዪርሜያ፤ ያሂዝዔኤሌ፥ ዮሃናኔንታ
 ዮዛባዴና፤
 ሃሪፔ ዓጫ ሸይንቴ፡- ዔልዑዛዬ፥ ያሪሞቴ፥ ቤዓልያ፥ ሸማሪንታ
 ሸዳዲያንታ፤
 ቆሬ ቶኦኮ ማዔ፡- ዔልቃና፥ ዩሺያሁ፥ ዓዛርዔሌ፥ ዮዔዜሬንታ
 ያሸብባሚንታ፤
 ጌዶሬ ካታሞ ዓሶንሢ ዪርሃሜ ናኦቶ፡- ዮዔላና ዜባድያና፡፡

ጋኦ ዓጳፓ ዳውቴ ጊንፃ ሺሬ ዓሶ

8 ዳውቴ ዓሲ ናንጉሞ ዳውሎይዳ ሞርዲዮ ቤዛ ዓኣንቴ ጋኦ ዓጳፓ ሙኪ ዒዛኮ የሎ ዓሶ ባኣኮ ጌሌ፥ የሎና ዔርቴያ፤ ሃሣ የልዚያ የሊ ዔሬ ፖኦሊሶኮ ሱንፃ ሃካፓ ዴማ ዓኣዘንሢኬ፤ ዬያታ ጊቴማና ሞርሢና ዔኪ የሊሢና ዔርቴያኬ፤ ዔያታ ዘቢ ዒጊቻሢጉዲ ዒጊቻያ፥ ራኡራማኣ ጌማሪዳ ናንጋ ሸኡጌ ጳሽካሢጉዲኬ፤

9-13 ዔያቶኮ ሱንፃ ዔያቶኮ ሱኡጋቶጉዴያ ጉዴያ ሞሊ ጊንፃ ፓይዲንቴኔ፡- ዔዜሬ፥ ዓብዲዩ፥ ዔለዓቤ፥ ሚሽማና፥ ዔርሚያሴ፥ ዓታዬ፥ ዔለዔኤሌ፥ ዮሃናኔ፥ ዔልዛባዴ፥ ዔርሚያሴንታ ማክባናዬንታኬ፡፡

14 ጋኦ ዓጳ ማዔ ዬንሢ ዓሶይዳፓ ዛላ ዓሲ ሸዮ ፖኦሊሶ ዓይሣ ሱኡጋቶ ዓኣያና ጃኤቶ ፖኦሊሶ ዓይሣ ሱኡጋቶ ዓኣያኬ፡፡

15 ፔቴ ኬሊ ቤርታሳ ዓጊና ጃጃኤራኣና ዮርዳኖሴ ሞራ ሱካፓ ሱኮ ሄሊ ኩሚ ዓኣንቴ ሞርና ዔያታ ፒንቄኔ፤ ሞርኮ ዓባ ኬሰካ ዛሎና ጌላ ዛሎናይዳ ዓኣ ዶኦጮ ጊንፃ ናንጋ ዴርሞ ዔያታ ዳውሴኔ፡፡

ቢኢኒያሜና ዪሁዳ ዓጳናፓ ዳውቴ ጊንፃ ሺሬ ዓሶ

16 ፔቴና ዪሁዳና ቢኢኒያሜና ዓጳፓ ኬሰኬ ዛላ ዓሲ ዳውቴ ሞርዲ ዴዒ ዓኣ ቤዘ ዴንዴኔ፤

17 ዳውቴ ዬኖ ዓሶ ጎይሣ ዔካኒ ኬሰካዮ፡- «ዒንሢ ሃይካ ሙኬሢ ሃታ ማኣዳኒ ማዔቴ ቃራኬ፤ ዒንሢ ሃታ ዛላ ማዒ ታኣና ሞላ ዔቃያ ማዔቴ ሃታ ዒንሢ ዔካኒ ጊኢጌያኬ፤ ጋዓንቴ ሃታ ዳቤ ባኣዚ ባኣያ፥ ጌኤሽ ዓኣንቴ ሃ ሞርኮም ዓኣሢ ዒንሢ ሃታ ዒንጋያ ማዔቴ ቤርታኣ ኑ ዓዶንሢ ያኦሲህ ዛጊ ሞጎንጎ!» ጌዔኔ፡፡

18 ዬካፓ ያኦሲኮ ዓያና የሎና ዔርቴ ሃይሢታሞ ዓሶኮ ሱኡጋሢ፥ ዓሚሲያሴ ዑፃ ኬዴም ዒዚ፡- «ዳውቴ! ኑኡኒ ኔኤርኬ!»

ቢሴፎ ናዓሠ ዳውቱ፣ ኑኡኒ ኔኤና ዋላኬ!
 ኔኤና ኔና ማኣዳ ዓሶናም ኮሹሞ ማዖንጎ!
 ያኑሲ ኔኤና ዋላ ማዓ ኔና ማኣዳንዳኔ»
 ጌራ ዑኡዘ ፔኤሲ ደጊዲ ዒላቱም፣ ዳውቱ ዔያቶ ዋዛና ዔኪ ፔ
 ፖኦሊሶኮ ሱኡጌ ማሄኔ።

ሚናኣሴ ፃጳፓ ዳውቱ ጊንፆ ሺሬ ዓሶ

19 ዳውቱ ፒሊሰጄኤሜ ዓሶና ዋላ ፔቱ ማዓ ካኣቱ፣ ሳኣዖኦሌ
 ያላኒ ዓኣዴ ዋዶና ሚናኣሴ ፃጳፓ ዛላ ፖኦሊሴ ዳውቱ ፖኦሊሶና
 ዋላ ፔቱ ማዓኒ ዴንዴኔ፤ ዒማና ፒሊሰጄኤሜ ዓሶኮ ሱኡጋ ጋዓንቱ፡-
 «ዳውቱ ኑና ዒዒ ቤርታ ዒዛኮ ጎዳ፣ ሳኣዖኦሌ ባንሢ ሺሬ ኑና
 ኩርሳንዳኔ» ጌራ ዒዛ ዒጊጩሢሢ ዋላ ጌሰታዖ ዒዚ ተግላጌ ማዓ
 ዴንዳንዳጉዲ ዳኬኔ፤

20 ዳውቱ ተግላጌ ማዔሰካፓ ሚናኣሴ ፃጳፓ ዒዛ ጊንፆ
 ሺሬ ፔቱ ፔቱ ፖኦሊሶኮ ሱንፃ ሃካፓ ዴማ ፓይዲንቱ ጎይዖኬ፡-
 ዓድናሄ፣ ዮዛባዴ፣ ዪዲዕዔኤሌ፣ ሚካዔኤሌ፣ ዮዛባዴ፣ ዔሊሁና
 ጂሌታዬናኬ፤ ዬንሢ ቢያ ሚናኣሴ ዓጮይዳ ዓኣዖ ሺዮ ዓሶኮ
 ሱኡጋቶ ዓኣዖኬ።

21 ቢያሢ ዔርቱ ፖኦሊሴታሢረ ያሎ ያላ ዓሶ ባኣካ ያሎ ያሊሳ
 ሱኡጎ ማዓ ዔያታ ማዴኔ፤ ዬካፓ ናንጊቤቃ ዒሰራዔኤሌኮ ያሎ ያላ
 ዓሶ ጉቤኮ ሱኡጌ ማዔኔ።

22 ቢያ ከሊ ዓሲ ሙኪ ሙኪ ዳውቱኮ ያሎ ዓሶ ባኣኮ ጌላሢረ
 ኔጉዋዖ ዳውቱኮ ያሎ ዓሳ ዑሣ ዓኣዴ ዋልቃዲ ሚርጊ ሚርጊ
 ዓኣዴኔ።

ዳውቱኮ ያሎ ዓሶ ሚርጉሞ

23-37 ቤርታ ናንጊና ናንጋ ጎዳ ዳውቱም ጫኣቄ ጎይዖና ሳኣዖኦሌ
 ካኣቱም ዳውቱ ባንሢ ማሃኒ ኬብርኣኔ ሙኬ ዓሳ፡-

ዪሁዳ ፃጳፓ፡- ጊቲማና ያልዚ ዓንጋሞ ኮይሳሢጉዴያ ዓርቄ ላሆ
 ሺያና ሳሊ ጃኤታ ፖኦሊሴ፡

ሲሞኣኔ ፃጳፓ፡- ኮይሳሢጉዴያ ዔሬያ ላንካይ ሺያና ፔቱ ጃኤታ
 ፖኦሊሴ፡

ሌዊ ፃጳፓ፡- ያይዶ ሺያና ላሆ ጃኤታ ዓሲ፤

ዓኣርኔ ዜርዖ ማዔያ፣ ዮዳሄና ዋላ ዓኣ ዓሳ ሃይሠ ሺያና ላንካይ
 ጃኤታ ዓሲ፤

ያሎና ዔርቱያ ማዔ ያዶቄ ዒጊናፓ፡- ላማታሚ ላምዖ ዔርቱ ሱኡጌ፤
 ሳኣዖኦሌኮ ዒጊናሢ ማዔ ቢኢኒያሜ ፃጳፓ፡- ሃይሠ ሺያ ዓሲ፤

ዬያ፣ ቢኢኒያሚ ዓሶኮ ባሺሢ ዴንዲ ዬማ ሄላንዳኣና ሳኣዖኦሌም
 ጉሙርቂንታያ ማዓ ዓኣ ጎይሣኬ።

ዔፕሬኤሜ ፃጳፓ፡- ለማታሚ ሺያና ሳሊ ጭታ ዓሲ ማዓዛ ቢያህ ፔኤኮ ቶኦኮና ቶኦኮና ያልዚና ዔርቴያኬ።

ዓባ ጌላ ዛሎና ዓኣ ሚናኣሴ ፃጳፓ፡- ታጾ ሳሊ ሺያ ዓሲ፤ ዳውቴ ካኣታህያኮ ዔያቶ ዳማሲ ደኦሮናያኬ።

ዪሳኮኦሬ ፃጳፓ፡- ለምያ ጭታ ዓሲ ሱኡጌ ማዓዛ፣ ዔያቶ ቢታንቶኮ ዳማ ዓኣ ዓሳ ጉቤህ ዔያቶና ዋላኬ፤ ዬንህ ሱኡጎንህ ዒሰራዔኤሌ ዓሳ ዓይጎ ማዳኒና ዓይዲ ማዳኒ ኮይሳቴያ ዔራ ዓሰኬ።

ዛብሎኦኔ ፃጳፓ፡- ጉሙርቁንታያ፣ ዓጪ ናሽካ ዓቲንቁ ያልዚም ጊኢጌያ ማዔ ዓይጎ ዓንጋሞና ማዔቴያ ያላኒ ዳንዳዓ ደንጊታሚ ሺያ ፖኦሊሴ፤

ኒፕታኣሌኤሜ ፃጳፓ፡- ጊቲማና ዋርህና ዓርቁያ ሃይህታሚ ለንካይ ሺያ ፖኦሊሴ ማዓዛ፣ ፔቴ ሺያ ሱኡጌ ማዓ ዓሲና ዋላኬ።

ዳኣኔ ፃጳፓ፡- ለማታሚ ሳሊ ሺያና ላሆ ጭታ ያልዚ ዔራ ፖኦሊሴ፤

ዓሴኤሬ ፃጳፓ፡- ያይዲታሚ ሺያ ያልዚም ጊኢጊንቴ ፖኦሊሴ፤

ዮርዳኖሴኮ ዓባ ኬሰካ ዛሎና ዓኣ ሮኦኤሌ፣ ጋኣዳና ሚናኣሴና ፃጳፓ፡- ዓይጎ ዓንጋሞናታቴያ ያላኒ ዳንዳዓ ፔቴ ጭታና ለማታሚ ሺያ ፖኦሊሴ ዓኣኔ።

38 ዬይ ያሎም ጊኢጊንቴያ ማዔ ፖኦሊሳ ቢያ ዳውቴ ዒሰራዔኤሌይዳ ካኣታህኒ ጋፒንህ ማለህ ጌህ ኬብሮኦኔ ዳንዳኔ፤ ዓቴ ዒሰራዔኤሌ ዓሳ ዬያ ማሊያ ቃራኬ ጌይ ዔኬኔ፤

39 ዬያታ ቢያ ዔያቶኮ ዒጊና ዒጊና ዔያቶም ጊኢጊሼህ ዋዛና ሙዒ ዑሽኪ ዑሽኪ ዳውቴና ዋላ ሃይህ ኬሊ ፔኤቄኔ፤

40 ዓጮኮ ኬደ ዛሎና ዓኣ ዪሳኮኦሬ፣ ዛብሎኦኔና ኒፕታኣሌኤሜ ፃጳፓኣ ዓቲዋያ ሚርጌ ዓሲ ሃሬና ጋኣሎና ባቁሎና ጌማይና ሚርጌ ሙኡዚ፣ ዲኢሊ፣ ቤሌሴ ሚያ ዓኣፓ፣ ቤሌሴ ሚያኮ ዓኣፖ ዲንቆና ላጫህ፣ ዋይኔፓ ኮሻና ዑዠንታ ሪሚቶ ዛይቶንታ ጫኣኒ ዔኪ ሙኬኔ፤ ዬያጉዲ ሃህ ሹኪ ዔያታ ሙዓንዳ ሚርጌ ባይና ማራይና ዔኪ ሙኬኔ፤ ዬይ ቢያ ዔያቶኮ ዓጮይዳ ዓኣ ዳራ ዋዛዳ ዋዛ ዔርዛያኬ።

13

ጫኣቁሞ ሳኣጺኖ ቂርያትይዓሪሚፓ ዬሩሳሌሜ ዔኪ ዓኣዳኒ ማሎናህ

(2ኅሙ. 6:1-11)

1 ካአቲ ዳውቴ ሺዮና ጭቶ ፖኦሊሶ ዓይሣያ ማዔ ያሎ ያሊሳ ሱኡጎ ቢያሢና ዋላ ዘርቴኔ።

2 ዩካፓ ዒሰራዔኤሌ ዴሮሞ ጉቤ፦ «ዒንሢ ዔኤዔያ ማዔያታቲ ሃሃ ናንጊና ናንጋ ጎዳ ማዔ ኑ ያኦዛሢ ማሊሢ ማዔያታቶ ዓቲ ኑ ዓጮ ዓሶንታ ቄኤሶንታ ዳኮ ዳኮ ካታሞይዳ ናንጋ ለዊ ዓሶንታም ኪኢታ ዓሰና ዔኤሊሢ ዳኪ ሃካ ዔያታ ሙኪ ኑኡና ዋላ ቡኪንታንዳጉዲ ኑ ኬኤዘም።

3 ሳአዖኦሌ ካአታዲ ዓአ ዎደና ዋሊንቲ ዓቲ ኑ ያኦዛሢኮ ጫአቁሞ ሳአዲኖ ዴንዲ ኑ ዔኪ ሙካንዳኔ» ጌዔኔ።

4 ዴራ ዒዛኮ ዩያ ማሊዖጉዲ ማዳኒ ዎዛና ዔኤዔኔ።

5 ዩያሮ ዳውቴ ጫአቁሞ ሳአዲኖ ቂርያትይዓሪሜፓ ዩሩሳላሜ ዔኪ ዩዓኒ ድኦሎ ዛሎና ዴንዲ ጊብጃ ዓጮ ዛጶና፣ ኬዶ ዛሎና ሃማቴ ባንሢ ዓአዳ ጎይያ ሄላንዳኦና ዒሰራዔኤሌ ዓጮ ጉቤይዳ ዓአ ዴሮ ፔቴይዳ ቡኩሴኔ።

6 ኪሩቤሌ ጋአዘይዳ ዴዔ፣ ሱንፃ ናንጊና ናንጋ ጎዳ ጌይንቲ ያኦዛሢኮ ጫአቁሞ ሳአዲኖ ዔኪ ሙካኒ ዳውቴንታ ዴራኦ ቢያ ዪሁዳ ዓጮይዳ ባዓላ ጌይንታ ቂርያትይዓሪሜ ካታሞ ዴንዴኔ።

7 ያኦሲኮ ጫአቁሞ ሳአዲኖ ዓቢናዳኦ ማኦራፓ ኬሲ ዔኪ ዓኪ ሳርጌላ ያይታይዳ ጫኦኔ፤ ዒማና ዑዛና ዓሃዮ ጎዖሰኬንሢ ሳርጌሎ ያይቶ ዒሻኔ፤

8 ዳውቴንታ ዒሰራዔኤሌ ዴራ ቢያ ሚርጌ ሻሺና ዴንሢ ዎርቆ ጎኦሎና ፔቴ ሻሺ ዴንሢ ዎርቆ ጎኦሎ ዎርቃዖ ካራቤያ ባዒ ባዒ ጊንሣ ሂቾጉዲ ያልሶ ባኦዚያ ያልሲ ያልሲ፤ ሹሉንጎጉዴ ባኦዚያ ዎርቂ ዎርቂ ያኦሲ ቦንቾም ዓይኑሞና ዒናፓ ባይዲ ባይዲ ኮርጋኔ።

9 ዩካፓ ኪዶኔ ጌይንታ ሃኦኮ ሺርኮ ቆይዳ ሄላዖ ሳርጌሎ ያይቶ ጎቻ ጌማታ ድቂንቲ ጫአቁሞ ሳአዲኖ ዓጊሣሢሮ ዑዛ ፔ ኩጮና ያኦሲኮ ጫአቁሞ ሳአዲኖ ደዑሞጉዲ ዓርቄኔ፤

10 ዒማና ዑዛ ጫአቁሞ ሳአዲኖ ካኦሜሢሮ ናንጊና ናንጋ ጎዳ ዳጋዳዖ ቤዘማና ዒዛ ዎዴም ዒኦካ ያኦሲ ቤርታ ሃይቄኔ።

11 ናንጊና ናንጋ ጎዳ ዳጋዲ ዑዛ ዔሪቦኦንቲ ዎዴሢሮ ዳውቴ ዳጋዴኔ፤ ዩና ቤዜላ ሃኖ ሄላንዳኦና «ፔሬፀ ዑዛ»* ጌይንታኔ።

12 ዩካፓ ዳውቴ ያኦሲ ሚርጌና ዒጊጫዖ፦ «ዓካሪ ሃያ ያኦሲኮ ጫአቁሞ ሳአዲኖ ታ ማኦሪ ዎዲ ታ ዔኪ ዓኦዳንዳይ?» ጌዔኔ።

13:5 1ሳሙ. 7:1-2። 13:6 1ሳሙ. 7:1-2። * 13:11 ፔሬፀ ዑዛ ጌይዖ፦ ዔብሬ ዓሶ ሙኤጮና «ዑዛ ሜንሦና ቤዞ» ጌይሢኬ።

13 ዬያሮ ዳውቴ ጫክቁሞ ሳኣዲኖ ዬሩሳላሜ ዔኪ ዓኣዲያ ሃሺ ጋኣቲ ካታማ ናንጋ፡፡ ያቤድዔዶኦሜ ማኣራ ጌሣኔ፡፡

14 ዬይ ጫክቁሞ ሳኣዲና ዒኢካ ሃይሃ ዓጊኒ ዴዔኔ፤ ዬያሮ ናንጊና ናንጋ ጎዳ ያቤድዔዶኦሜኮ ማኣሮ ዓሶና ዒዛሮ ማዔ ባኮ ቢያ ዓንጃኔ፡፡

14

ዳውቴ ዬሩሳላሜይዳ ማዴ ማዴ
(2ኛሙ. 5:11-16)

1 ዪሮሴ ካኣቲ፡ ኪራሜ ዳውቴ ኮራ ኪኢታ ዓሲ ዳኬኔ፤ ዳውቴኮ ካኣቲሞ ማኣሮ ማኸኒ ለባኖኦሴ ሚያ ዔኬ ሃኣሚንታ ሹጮና ማኣሮ ማኸ ዓሲያኣ ዬኖ ኪኢቶ ዓሶና ሞላ ዴንዴኔ፤

2 ናንጊና ናንጋ ጎዳ ዒሰራዔኤሌኮ ካኣቲ ማሃ ዒዛ ዶዲሹሣና ፔኤኮ ዴሮ ዒሰራዔኤሌሮ ጌዒ ዒዛኮ ካኣቲሞ ያርጎቹያ ማዔሣ ዳውቴ ዔሬኔ፡፡

3 ዳውቴ ዬሩሳላሜይዳ ሚርጌ ላኣሊ ዔኪ ሚርጌ ዓቲንቁና ዉዲሮ ናይና ሾዔኔ፤

4 ዒዛ ዬሩሳላሜይዳ ዓኣፆ ሾዔ ዓቲንቆ ናኣታ፡- ሻሙዓ፡ ሾባቤ፡ ናኣታኣኔ፡ ሴሎሞኔ፡

5 ዪብሃሬ፡ ዔሊሹዓ፡ ዔሊፓሌ፡

6 ኖጋሄ፡ ኔፔጌ፡ ያፒዓ፡

7 ዔሊሻማዓ፡ ቤዔልያዳና ዔሊፔሌቴ ጌይንታያኬ፡፡

ዳውቴ ያሎና ፒሊሰፄኤሜ ዓሶ ባሽሣ
(2ኛሙ. 5:17-25)

8 ዳውቴ ዒሰራዔኤሌ ዓጮ ቢያይዳ ካኣታዴሣ ፒሊሰፄኤሜ ዓሳ ሞይዛያ ያሊ ዓርቁ ዳዒ ዔካኒ ፔኤኮ ያሎ ዓሶ ዳኬኔ፤ ዳውቴያ ዬያ ሞይዛያ ዔያቶና ያልታኒ ኬሰኬኔ፤

9 ዒማና ፒሊሰፄኤሜ ዓሳ ራፓይሜ ዶኦጮ ሙኪ ያሎ ዓርቁኔ፤

10 ዬያሮ ዳውቴ፡- «ፒሊሰፄኤሜ ዓሶ ታ ያሎንዶ? ታኣም ኔ ዔያቶ ዓኣሣ ዒንገ ያሎና ባሺሲሳንዳ?» ጌይ ያኦሲ ያኦጮኔ፡፡

ያኦሲ ማሃያ፡- «ሂዮ፤ ዔያቶ ያሌ! ታኣኒ ኔኤም ዓኣሣ ዒንገም ኔ ዔያቶ ባሻንዳኔ» ጌዔኔ፡፡

11 ዬያሮ ዳውቴ ባዓልፔራዲሜ ጌይንታ ቤዛ ፒሊሰፄኤሜ ዓሶ ያሊ ባሹሰካፓ፡- «ሞርኮኮ ያሎ ዓሶ ዲጲፓዲ ዳርዚ ታ

ዓኣዳንዳጉዲ ያኦሲ ታና ማኣዳኔ» ጌዔኔ፤ ዩካፓ ዩኖ ቤዜሎኮ ሱንፃ «ባዓልፔራዲሚ» ጌይንቴኔ፤

12 ዒማና ፒሊሰጻኤሜ ዓሳ ጳዦ ጳሽካፆ ፔኤኮ ካኣሽኮ፡ ሜሌ ያኦዞ ኬኤሪ ዴንዳዛ ዳውቴ ዩያ ሜሌ ያኦዞ ጉቤ ዒዛኮ ያሎ ዓሳ ታሚና ሚቻንዳጉዲ ዓይህኔ።

13 ዩካፓ ፒሊሰጻኤሜ ዓሳ ኔጉዋፆ ገንህ ማዒ ዩኖ ዶኦጩሎ ያለሂ ዓርቄኔ፤

14 ዳውቴያ ሃህ ያኦሲ ዋዚ ጋዓቴ ያኦጫዛ፡ ያኦሲ ማሃፆ፡ «ዔያቶኮ ገንፆ ዛሎና ሽሪ ሻኣሶ ኮሪና ሙኪ ያሌ፤ ሃይና ሌካ ፒዜ ኬሰከ ያሊፖ፤

15 ታ ኔኤኮ ቤርታ ቤርታ ዓኣዲ ፒሊሰጻኤሜ ዓሶኮ ያሎ ዓሶ ያሊ ባሻንዳሂሮ ሻኣሶ ቶኦኮይዳ ያልዚ ዓሲ ካኣኒ ማላ ዑኡሲ ዋይዛፆ ያያሌ!» ጌዔኔ።

16 ያኦሲ ዒዛ ዓይህህጉዲ ዳውቴ ማዲ ፒሊሰጻኤሜ ዓሶ ገባፆኦይዳፓ ዴንዲ ጌዜሬ ሂላንዳኣና ያሊ ባሺ ዳውሴኔ፤

17 ዩያሮ ዳውቴ ማዴ ባካ ቢያ ቤዛ ዋይዚንቴኔ፤ ናንገና ናንጋ ጎዳ ሜሌ ዴራ ቢያ ዳውቴ ዒገጫንዳጉዲ ዴርይዳ ዒገቹዋ ጌልዜኔ።

15

ያኦሲኮ ጫኣቁዋ ሳኣጻኖ ዩሩሳላሚ ዔካኒ ገኢጎናሂ

1 ዳውቴ ናንጋንዳ ማኣሪ ፔ ካታሞ፡ ዩሩሳላሚይዳ ማገፔኔ፤ ሃህ ያኦሲኮ ጫኣቁዋ ሳኣጻኖ ጌሦንዶ ቤሲያ ገኢገሺ ዓፒሎና ማዦ ማኣሮዋ ዶቄኔ፤

2 ዩካፓ ዳውቴ ናንገና ናንጋ ጎዳ ናንገና ዒዛም ማዳንዳጉዲ፡ ገንህ ሃህ ጫኣቁዋ ሳኣጻኖዋ ኬዳንዳጉዲ ዶኦሬሂ ዔያቶ ማዔሂሮ፡ «ጫኣቁዋ ሳኣጻኖ ኬዳኒ ኮይሳሂ ሌዋ ዓሶም ሌሊኬ» ጌዔኔ።

3 ዩያሮ ዳውቴ ያኦሲኮ ጫኣቁዋ ሳኣጻኖ ገኢገሻና ቤዞ ዔከ ዓኣዳኒ ዒሰራዔኤሌ ዴር ቢያ ዩሩሳላሚይዳ ቡኩሴኔ፤

4 ሂሊሳፆ ዓኣሮኔ ዜርፆና ሌዋ ዓሶና ቡኩሴኔ፤

5 ዒማና ሌዋ ዓሂ ቁዓቴ ቶኦካፓ ዑሪዔኤሌ ጎፆሂ ዒዛኮ ዒገኒ ማዔያ ፔቴ ጻኤታና ላማታሚ ዓሲኮ ሱኡጌ ማዒ ሙኬኔ።

6 ሜራሪ ቶኦካፓ ዓሳፆ ጎፆሂ ዒዛኮ ዒገኒኖ ማዔያ ላምፆ ጻኤታና ላማታሚ ዓሲኮ ሱኡጌ ማዒ ሙኬኔ።

7 ጌርሾኔ ቶኦካፓ ዒዩዔኤሌ ጎፆሂ ዒዛኮ ዒገኒኖ ማዔያ ፔቴ ጻኤታና ሃይህታሚና ዓሲኮ ሱኡጌ ማዒ ሙኬኔ፤

15:2 ላሚ. ዋማ 10:8።

8 ዔሊግጋጅ ቶኦካፓ ሽማዒያ ጎረቤት ዒዘኮ ዒጊኖ ማዕያ ላምያ ዌኤታ ዓሲኮ ሱኡጌ ማዒ ሙኬኔ፤

9 ኬብሮኦኔ ቶኦካፓ ዔሊዔኤሌ ጎረቤት ዒዘኮ ዒጊኖ ማዕያ ሳሊታሚ ዓሲኮ ሱኡጌ ማዒ ሙኬኔ፤

10 ዑዚዔኤሌ ቶኦካፓ ዓምናኣዳኣቤ ጎረቤት ዒዘኮ ዒጊኖ ማዕያ ፔቴ ዌኤታና ታጳ ላምያ ዓሲኮ ሱኡጌ ማዒ ሙኬኔ።

11 ዩካፓ ዳውቴ ቁኤሶ፣ ሳዶቁንታ ዓቢያታሬንታ፤ ዩያጉዲ ሃሃ ዑሪዔኤሌ፣ ዓሳያ፣ ዮዔኤሌ፣ ሽማዒያ፣ ዔሊዔኤሌና ዓምናኣዳኣቤና ዋሊ ዑፃ ላሆ ሌዊ ዓሲ ዔኤላያ፡-

12 ዔያቶም ሃዚ ገዔኔ፤ «ዒንህ ሌዊ ዓሶ ቶኦካፓ ሱኡጎኬ፤ ዩያሮ ናንጊና ናንጋ ጎዳ ማዕ ዒሰራዔኤሌ ያኦዛህኮ ጩኣቁሞ ሳኣፂኖ ታ ገኢጊሼ ቤዘ ከዲ ዔኪ ሙካኒ ዒንህንታ ዒንህኮ ዒጊኖ ማዕ ሌዊ ዓሶንታ ቢያ ያኦሲም ዲማሱዋቴ፤

13 ሃያኮ ቤርታ ዒንህ ሙኪ ያኦሲኮ ጩኣቁሞ ሳኣፂኖ ኬዲባኣህሮ፣ ሃሃ ጌይንቴ ዳምቦ ጎይያ ኑ ዒዛም ማዲባኣህሮ ናንጊና ናንጋ ጎዳ ማዕ ኑ ያኦዛህ ፈጋዲ ሜቶ ኑ ገዳ ዓጌኔ» ጌዔኔ።

14 ዩያሮ ቁኤሶንታ ሌዊ ዓሶንታ ናንጊና ናንጋ ጎዳ ማዕ ዒሰራዔኤሌ ያኦዛህኮ ጩኣቁሞ ሳኣፂኖ ከዲ ዔካኒ ፔና ያኦሲም ዲማሱኔ፤

15 ናንጊና ናንጋ ጎዳ ሙሴ ዛሎና ዒንጌ ዓይህያጉዲ ሌዊ ዓሳ ያኦሲኮ ጩኣቁሞ ሳኣፂኖ ፔኤኮ ጌኤታ ዛጳህ ሚያና ከዲ ዳንዴ።

16 ዳውቴ ዒማና፡- «ሚርጌ ሻዡ ዳንህ ሞርቆ ጎኦሎንታ ፔቴ ሻሺና ሞርቁንታ ጎኦሎንታ ዑኡቱቡሎዋ ዔኪ ያኦሲ ቦንቾም ማዓ ዓይኑም ዓይናዳንዳጉዲ ዒንህኮ ዒጊኖ ማዕ ሌዊ ዓሶፓ ደኦሩዋቴ» ጌዒ ሌዊ ዓሶ ሱኡጎም ከኤዘኔ፤

17-21 ያኦሲ ቦንቾም ዓይኑም ዓይናዳ ዓሶ ቶኦካፓ ዑኡቱቡላህ ዋቻንዳጉዲ ዒዮዔኤሌ ናኣዚ ሃማኔ፣ ዒዘኮ ዒጊኒ ማዕ ቤራኪያ ናኣዚ ዓሳኣፔ፤ ዩያጉዲ ሃሃ ሜራሪ ቶኦካፓ ቁሳያ ናኣዚ፣ ዔታኔ ደኦሪንቴኔ፤ ዑኡዙ ዳጊዲ ሞርቁንታ ሚርጌ ሻዡና ዳንህንታ ጎኦሎ ሞርቁ ዔያቶ ማኣዳያ ማዓንዳጉዲ፡- ዛካሪያሱ፣ ያዕዘዔኤሌ፣ ሽማዒያ፣ ዩሂዔኤሌ፣ ዑኒ፣ ዔሊዓቤ፣ ማዕሴያንታ ቤናያንታ ደኦሪንቴኔ።

ሃሃ ዑኡዙ ሂርኪዲ ሞርቆ ሚርጌ ሻዡና ዳንህንታ ጎኦሎ ሞርቁንዳጉዲ፡- ማቲትያ፣ ዔሊፔሌ፣ ሚቅኔያ፣ ዓዛዝያንታ፤

15:15 ኬሲ. ማ9 25:14።

ዬያጉዲ ጌኤዠ ማኣሮ ካፓ ዓሶ ባኣካፓ ያቤድዔዶኦሚንጎታ ዩዒዒኤሌሌንጎታ ዶኦሪንጎታ።

22 ከናኒያ ጎዖሢ ዓይኑሞሮ ዋርቆ ዓንጋሞ ዋርቂ ዔራያታሢሮ ሌዊ ዓሶ፣ ዓይኑሞ ዓይናዳ ዓሶኮ ሱኡጌ ማዒ ዶኦሪንጎታ፤

23-24 ሃሣ ቤራኪያ፣ ዔልቃና፣ ያቤድዔዶኦሚንጎታ ዩሂያንጎታ ያኦሲኮ ጫኣቁሞ ሳኣጂኖ ካፓ ዓሶ ማዒ ዶኦሪንጎታ፤ ዒኖሳፒጭ፣ ናትናዔኤሌ፣ ዓማሳዬ፣ ዛካሪያሴ፣ ቤናያ፣ ዔሊዔዜሬንጎታ ቄኤሳሢ ሹባኒያንጎታ ያኦሲኮ ጫኣቁሞ ሳኣጂኖኮ ቤርታ ቤርታ ዓኣዲ ማልኮ ዋርቃንዳጉዲ ዶኦሪንጎታ።

**ያኦሲኮ ጫኣቁሞ ሳኣጂኖ ዬሩሳላሚ ዔኪ ዴንዶናሢ
(2ሳሙ. 6:12-22)**

25 ዬካፓ ካኣቲ ዳውቴንጎታ ዒሰራዔኤሌ ዓሶኮ ሱኡጎንጎታ ያሎ ያላ ዓሶ ዓይሃዞንሢንጎታ ያኦሲኮ ጫኣቁሞ ሳኣጂኖ ያቤድዔዶኦሚ ማኣራፓ ዔካኒ ዎዛና ዴንዴኔ፤

26 ያኦሲኮ ጫኣቁሞ ሳኣጂኖ ከዳ ሌዊ ዓሶ ያኦሲ ማኣዴሢሮ ላንካይ ዚያ ጌማይና ላንካይ ማራናይና ሹኪ ዒንጎ ባኣዚ ማሂ ያኦሲሞ ዔያታ ሹኢሹኔ፤

27 ዳውቴ ዒማና ሚዛጶ ሻኣዠ ዓፒሎና ኮሺንጎታ ዔቸዶ ማይንጎታ፤ ዬያጉዲ ሃሣ ዓይኑሞ ዓይናዳ ዓሳ ቢያ ዔያቶኮ ሱኡጎሢ ከናኒያንጎታ ያኦሲኮ ጫኣቁሞ ሳኣጂኖ ከዴ ሌዊ ዓሳኣ ሚዛጶ ሻኣዠ ዓፒሎ ማይንጎታ ዓኣኔ።

28 ዬያጉዲ ዒሰራዔኤሌ ዴራ ቢያ ዛዬንጎታ ፖሮዚንጎታ ዋርቂ ዋርቂ፣ ዑኡቱቡሎዎ ዎቺ ዎቺ ፔቴ ሻዠና ዋርቆ ጎኦሎንጎታ ዲቦ ሻዠ ዴንሢ ዋርቆ ጎኦሎዎ ዋርቂ ዋርቂ ናንጊና ናንጎ ጎዳኮ ጫኣቁሞ ሳኣጂኖ ሶራይቲ ዒላሸሢና ዔኪ ዬሩሳላሚ ሙከኔ።

29 ዒማና ዓሳ ጫኣቁሞ ሳኣጂኖ ዳውቴ ካታሞ ዔኪ ጌሊያይዳ ዓኣንጎታ ሳኣያኦሌኮ ናኣ፣ ሚልኮኦላ ካኣቲ ዳውቴ ዒናፓ ባይዲ ባይዲ ጵላሢ ከኤያኮ ፑልቶ ካርና ዛጎያ ዒዛ ፓሴ።

16

1 ዔያታ ዒማና ጫኣቁሞ ሳኣጂኖ ዳውቴ ጊኢጊሹ፣ ዓፒሎና ማዢንጎታ ማኣራ ጌሣኔ፤ ዬካፓ ሚቺ ዒንጎ ዒንጊያንጎታ ፔቱሞና ዒንጎ ዒንጊያዎ ዔያታ ያኦሲሞ ሹኢሹኔ፤

2 ዳውቴ ዬያ ባኮ ዒንጌሰካፓ ናንጊና ናንጎ ጎዳ ሱንያና ዴር ዓንጃኔ፤

3 ዩካፓ ዒሰራዔኤሌ ዓሶኮ ዓቲንቆንታ ላኣሎንታም፣ ፔቴ ፔቴ ዓሶም ቢያ ፔቴ ፔቴ ሙሊሢ ላኣዳ ቲቂሢ ዓሸከንታ ዎይኔ ዲንቆናያይዳፓኣ ዳካ ዒንጌኔ።

4 ያሱሲኮ ጩኣቁሞ ሳኣዲኖኮ ቤርታ ማዒ ማዳንዳጉዲና ናንጊና ናንጋ ጎዳ ማዔ ዒሰራዔኤሌ ያኦዛሢም ጋላታንታ ሄርሺሢንታ ቦንቾዎ ዒንጊ ዒንጊ ያኦዛሢ ካኣሸኮ ካኣኦ ዳምቦ ማዲሻንዳጉዲ ሌዎ ዓሶይዳፓ ዳውቴ ደኦሬኔ።

5 ዒማና ዓሳኣፔ ሱኡጋሢኬ፤ ዛካሪያሴ ዒዛኮ ዴማ ማኣዲ ማዳሢ ማዒ ደኦሪንቴኔ፤ ዩካፓ ዩዒዔኤሌ፣ ሸሚራሞቴ፣ ዩሂዔኤሌ፣ ማቲትያ፣ ዔሊዒቤ፣ ቤናያ፣ ያቤድዔደኦሚንታ ዩዒዔኤሌንታ ጎኦሎ ዋርቃንዳጉዲ፤ ዓሳኣፔ ሃሣ ዑኡቴቡላሢ ዎቻንዳጉዲ ጌይንቴኔ፤

6 ቤናያና ያሃዚዔኤሌና ጌይንታ ላምዎ ቄኤሶንሢ ጩኣቁሞ ሳኣዲኖኮ ቢያ ዎዴ ቤርቶ ዛሎና ዛዬ ዋርቃንዳጉዲ ጌይንቴኔ፤

7 ዓሳኣፔንታ ሃንጎ ዒዛኮ ዒጊኖ ሌዎ ዓሶንታ ናንጊና ናንጋ ጎዳም ማዓ ጋላታ ዓይኦም ሸኢሻንዳጉዲ ዳውቴ ሱኡቴ ማሂ ዔያቶ ደኦሬሢ ዒማናኮ።

ዳውቴኮ ያሱሲ ጋላቶ ዓይኦም
(ዓይኑ. 105:1-15፤ 96:1-13፤ 106:1፤47-48)

8 ናንጊና ናንጋ ጎዳ ጋላቱዎቴ፤

ዒዛ ሱንዖ ዔኤሊ ሸኢቁዎቴ፤
ዒ ማዴ ባኮ ዴሮ ቢያሢም ኬኤዙዎቴ።

9 ናንጊና ናንጋ ጎዳም ጋላታ ዓይኦም ዓይናዲዎቴ፤

ዒ ማዴ ዲቃሢ ሄርሺሳ ማዴ ቢያ ኬኤዙዎቴ፤

10 ዒዛኮ ዲማዴ ሱንዖና ዎዛዲዎቴ!

ናንጊና ናንጋ ጎዳ ኮዓዞንሢ ቢያ ዎዛደንጎ!

11 ዒዛኮ ማኣዳሢ ዴንቃኒ

ናንጊና ናንጋ ጎዳ ኮዕዎቴ፤
ቢያ ዎዴ ዒዛም ዘጊ ካኣሸኮዎቴ፤

12-13 ዒዛም ማዳያ ማዔ፣ ዒሰራዔኤሌ ናኣቶንሢዮ!

ያሱሲ ደኦሬያ ማዔ ያይቆኦቤ ናኣቶንሢ!
ያሱሲ ማዴ ዲቃሢ ሄርሺሳ ባኮ
ዒዚ ዎጌ ዎጊያንታ
ዒ ፔ ዎልቆና ማዴ ማዴ ጳቂሁዎቴ።

14 ናንጊና ናንጋ ጎዳ ኦኡኮ ያኦዛሢኬ፤

ዒዚ ዓጮ ቢያይዳ ፒዜ ዎጌ ዎጋኔ።

15 ዒዛኮ ጩኣቁሞ ዋሊፖቴ፤

- ዒ ዓይህ ባኮ ዳንዲ ሺያ ሾይንቲ ሄላንዳኣና
 ያኦሲ ከኤዜ ሃጊ ማዓንዳ ዎዞ ቃኣሎ ናንጊና ደዲሺ ካፓኔ።
 16 ዒ ዒብራሃሚና ዎላ ጫኣቁ ጫኣቁሞ ካፓኔ፤
 ዪሳኣቁሞ ከኤዜ ሃጊ ማዓንዳ ዎዞ ቃኣሎዎ ደዲሻኔ፤
 17 ያይቆኦቤም ዳምቤ ማሂ ደዲሹኔ፤
 ዒሰራዔኤሌማኣ ጋፒንሢባኣ ጫኣቁሞ ጫኣቁኔ።
 18 ዩይ ጫኣቁማ፡-
 «ካኣናኔ ዓጮ ታ ኔኤም ዒንጋንዳኔ፤
 ኔኤም ዒንጊንቲ ቤሲ ማዓንዳኔ» ጋዓያከ።

 19 ያዳ ጌይንቲህ ያኦሲኮ ዓሳ ፓይዶና ዳካ ዓኣንቲ
 ካኣናኔ ዓጮይዳ ዔያታ ሾኦቹ ማዒ ዓኣንቲከ።
 20 ፔቲ ዳሮ ኮራፓ ማሌ ዳሮ ባንሢ
 ፔቲ ዓጮይዳፓ ማሌ ዓጪ ባንሢ
 ሃንቲ ሃንቲ ዔያታ ማታዳኔ።
 21 ያኦሲ ጋዓንቲ ያኦሲያ ዔያቶ ሄርቂ ዎይሦም ጌይባኣሴ፤
 ዔያቶሮ ጌይ ካኣቶ ጎሬኔ።
 22 «ታ ዶኦሚ ቲሽከዞንሢ ካኣሚፖቲ፤
 ታ ማሊያ ከኤዛዞንሢ ዮርታ ማዲፖቲ» ጌይ ዔያቶም
 ላቲኔ።

 23 ሳይይዳ ናንጋ ዳራ ቢያ ናንጊና ናንጋ ጎዳ ጋላቱዎቲ!
 ዓውሲያ ዒዛኮ ከላ ከላ ከኤዙዎቲ፤
 24 ካኣቶም ቢያ ዒዛኮ ቦንቾ ዔርዙዎቲ፤
 ማሌ ዳሮም ቢያ ዒዛኮ ዳኤፖ ማዳ ከኤዙዎቲ።

 25 ናንጊና ናንጋ ጎዳ ዳኤፒከ፤
 ፑኤፒ ጋላታ ዒዛም ኮይሳኔ፤
 ማሌ ካኣሽኮ ያኦዛፓ ቢያ ባሼ ዒጊጪንታንዳያ ኮይሳኔ፤
 26 ሃንጎ ዳራ ዘጊ ካኣሽካሢ ማሌ ያኦዞከ፤
 ናንጊና ናንጋ ጎዳ ጋዓንቲ ጫሪንጮ ማዜ ያኦሲከ።
 27 ዒዛኮ ኮይሎይዳ ዓኣ ባካ ቦንቾና ዳኤፑሞናከ፤
 ዒዛም ደማዴ ማኣሮዎ ዎልቄና፣ ሃሣ ዎዛና ዒ ኩንሄኔ።

 28 ዒንሢ ሳይይዳ ናንጋ ዳራ ቢያ!

16:16 ማዢ. ማፃ 12:7፤ 26:3። 16:18 ማዢ. ማፃ 18:13። 16:22 ማዢ.
 ማፃ 20:3-7።

ዒዛኮ ቦንቾንታ ዎልቆንታሮ ናንጊና ናንጋ ጎዳ ጋላቱዎቲ።

29 ዒዛ ሱንጾም ኮይሳ ቦንቾ ሸኢሹዎቲ፤
ዒዛኮ ጌኤዢ ማእሮ ዒንጎ ባኣዚ ዔኪ ዬዑዎቲ፤
ዲማዴያ ማዔ ጾኣዛሂ ፔጋዲ ጴዳኣና ዒዛም ዘጊ
ካኣሽኩዎቲ።

30 ሳዖ ዴራ ቢያ ዒዛ ቤርታ ጎጋይቆዎቲ!
ሳዓ ደዲሺ ማዢንቴሂሮ ዓጊዲንዲዎሴ።

31 ሳዖንታ ጫሪንጮንታ ዎዛዲዎቲ!
ሜሌ ዴሮም ቢያ ናንጊና ናንጋ ጎዳ ካኣቲታሂ ዔርዙዎቲ።

32 ባዘንታ ዒኣካ ዓኣ ባካ ቢያ ዒላሹዎቲ!
ጎዢንታ ዬያይዳ ዓኣ ባካ ቢያ ዎዛዲዎቲ!

33 ናንጊና ናንጋ ጎዳ ሳዖይዳ ዎጋኒ ሙካንዳሂሮ
ዴኤሎይዳ ዓኣ ሚፃ ዒዛም ዒላሹንጎ!

34 ዒዚ ኮሺታሂሮ ናሹማ ዒዛኮ ናንጊና ባይቆዎኣሂሮ
ናንጊና ናንጋ ጎዳ ጋላቱዎቲ!

35 ናንጊና ናንጋ ጎዳ፡-
«ኩና ዓውሳ ጾኣዛሂዮ!
ሜሌ ዴሮ ባኣካፓ ማሂ ዔኪ ኑ ዓጮ ኑና ጌልዘ፤
ያኣዴ ማዔም ኔና ኑ ጋላታንዳጉዲ፡
ኔኤኮ ዲማዴ ሱንጾ ኑ ቦንቾንዳጉዲ
ሃዳራ ኑና ዓውሴ!» ጎዑዎቲ።

36 ናንጊና ናንጋ ጎዳ ማዔ ዒሰራዔኤሌ ጾኣዛሂ
ናንጊና ጋላቲንቴያ ማዖም!
ዴራ ዒማና «ዓኣሚን» ጌዔኔ፤ ናንጊና ናንጋ ጎዳኣ ጋላቲኔ።

ዬሩሳላሜና ጌባዖኦኔናይዳ ካኣሽኪንቴ ካኣዢ

37 ካኣቲ፡ ዳውቲ ዓሳኣፔና ዒዛኮ ዒጊኖ ማዔ ሌዊ ዓሶ ናንጊና
ናንጋ ጎዳኮ ጫኣቆም ሳኣፃና ዓኣ ቤዛ ካኣሽኪንታ ካኣዢ ዳምሶ
ኩንሂሲ ኩንሂሲ ናንጋንዳጉዲ ሱኡጌ ማሂ ጌህኔ፤ ዬያሮ ዔያታ
ዬያ ማዴ ቢያ ኩሊ ማዳኔ፤

38 ዔያቶ ማኣዳንዳጉዲ ዩዲቱ ናኣዚ ገቤድዔዴኣሚና ዒዛ
ቶኣኪ ማዔያ ሜሌ ላሂታሚ ሳሊ ዓሲያ ዓይሂንቴኔ፤ ዒማና ዩዲቱ
ናኣዚ፡ ገቤድዔዴኣሚና ሆላና ጌሎ ካሮ ካፒሳ ሱኡጎ ማዔኔ።

16:34 2ያሴ. ዓሃኬ 5:13፤ 7:3፤ ዒዝ. 3:11፤ ዓይኦ. 100:5፤ 106:1፤ 107:1፤
118:1፤ 136:1፤ ዔር. 33:11።

39 ቁኔሳህ፡ ሳዶቁና ዒዛ ዒጊኖ ማዔ ሜሌ ቁኔሳ ገባገኦኔይዳ ዓኣ፡ ዓፒሎና ማዠገንቴ ያኦሲ ካኣሽኪንታ ማኣሮይዳ ካኣዠ ካኣሽኪሳ ሱኡጌ ማሂዳውቴ ዔያቶ ዶኦሬ።

40 ዔያ ዒ ማጄህ ናንጊና ናንጋ ጎዳ ዒሰራዔኤሌ ዓሶም ዓይህ ምጎ ጎይያና ቢያ ኬሊ ጉቴና ሞንቴና ሚቺ ዒንጎ ዒንጊያ ሚቺ ያኦሲም ሸኢሻንዳጉዲከ።

41 ዒኢካ ዔያቶና ሞላ ሄማኔንታ ዩዲቱንታ፤ ዩያጉዲ ሃሃ ያኦሲኮ ናንጊና ናንጋ ናሹሞ ማሊ ማሊ ቢያ ኬሊ ጋላታ ዓይኦም ዓይናዳንዳጉዲ ዶኦሬንቴ ሜሌ ዓሲያ ዓኣኔ፤

42 ሄማኔና ዩዲቱና ሹሉንጋ፡ ዑኡቱቡላህ፤ ዩያጉዲ ጋላቶ ዓይኦም ዓይናዳሞኣና ሞርቆ ዓንጋም ሱኡጌ ማዒ ዓርቃያ ማዔ፤ ዩዲቱ ቶኦኪ ማዔ ዓሳ ጌሎ ካሮ ካፓ ዓሶኮ ሱኡጌ ማዔ።

43 ዩካፓ ዓሳ ቢያ ፔ ማኣሪ ማኣሪ ዴንዴ፤ ዳውቴያ ፔ ማኣሮ ዓሶ ዓንጃኒ ፔ ማኣሪ ዴንዴ።

17

ናኣታኣኔ ዳውቴም ኬኤዜ ባኮ (2ሳሙ. 7:1-17)

1 ካኣቲ ዳውቴ ካኣቲሞ ማኣሮይዳ ዓኣጾ ፔቴ ኬሊ ያኦሲ ማሊያ ኬኤዛ፡ ናኣታኣኔ ዔኤሊሲ፡- «ታኣኒ ሃህሂ ዚቢቁና ማዠና ማኣሪዳ ናንጋ፤ ናንጊና ናንጋ ጎዳኮ ጩኣቁሞ ሳኣጃና ጋዓንቴ ዓፒሎና ማዠገንቴ ማኣሮይዳ ገህንቴንቴሞ!» ጌዔ።

2 ዩያሮ ናኣታኣኔ፡- «ያኦሲ ኔኤና ሞላታህሮ ኔ ዒኖና ኔኤኒ ማሊ ባኮ ቢያ ማማጄ» ጌዔ።

3 ጋዓንቴ ዩኖ ሞንቴሎ ያኦሲ ናኣታኣኔም፡-

4 «ታ ዓይላህ፡ ዳውቴ ኮይላ ዓኣዲጋፓ ሂዚ ጌዔ፤ ታኣኒ ናንጋንዳ ጌኤዠ ማኣሮ ታኣም ማዠንዳህ ኔናቱሞ፤

5 ዒሰራዔኤሌ ዴሮ ጊብፃ ዓጮ ዓይላታፓ ታኣኒ ኬሴሰካፓ ሃኖ ሃላንዳኣና ታኣኒ ማኣሪዳ ናንጊ ቤቁባኣሰ፤ ቢያ ሞጄ ታኣኒ ዓፒላና ማዠና ማኣሪዳ ማዒ ፔቴ ቤዛፓ ሜሌ ቤሲ ሃንቲ ሃንቲ ናንጌ፤

6 ዒሰራዔኤሌ ዴሮና ታ ሃንቴ ሞዶ ቢያይዳ ታኣኒ ዶኦሬ፡ ሱኡጎ ባኣካፓ ፔቴ ዓሲታጾ ዚቢቁና ጌኤሺ ማኣሪ ታኣም ማዠም ጌዒ ታ ዓይህባኣሰ።

7 «ዩያሮ ሃህሂ ታኣኒ፡ ቢያ ባኮ ሞይሃ ጎዳ ታ ዓይላህ ዳውቴም ጋዓ ባኮ ሂዚ ጌዒ ኬኤዜ፡- ኔኤኒ ማራይ ሄንቃንቴ ታ ኔና ዔኪ ታ ዴሮ ዒሰራዔኤሌኮ ሱኡጌ ማሂ ጌህ፤

16:43 2ሳሙ. 6:19-20።

8 ኔ ዓአጳ በዘ ቢያይዳ ታ ኔኤና ዎላ ዓአያ ማዕኔ፤ ኔኤኮ ቤርታፓ ሞርኮ ቢያ ታኣኒ ኔኤም ያሊ ባሼኔ፤ ሃሢያ ዓጮይዳ ዓአ ጳኤፖ ጳኤፖ ካኣታፓ ቢያ ባሼ ዔርቴ ካኣቲ ታ ኔና ማሃንዳ።

9-10 ታ ዴሮ፣ ዒሰራዔኤሌም ዔያታ ናንጋንዳ ቤሲ ታ ዒንጋንዳ፤ ዒኢካ ዔያታ ጌላዎ ኮሺ ናንጋንዳጉዲ ታ ማሃንዳ፤ ፑርቶ ማዳ ዓሳ ቤርታኣሲጉዲ ማይ ዔያቶ ፔቴታዎ ሜታሳዓኬ፤ ሃያኮ ቤርታታ ዔያቶ ዑፃ ሱኡጌ ዶኦሪ ዎዶና ዔያታ ሜታጳ ሜቶጉዴያ ላምዓንሣ ዔያቶ ሄላዓኬ፤ ኔ ሞርካ ቢያ ኔኤም ዎርቃንዳጉዲ ታ ማሃንዳ።

11 ኔኤኒ ናንጊ ጋርቺ ኔኤኮ ቤርታኣ ዓዶንሢጉዲ ሃይቃዛ፣ ኔ ናኣቶ ባኣካፓ ፔቴታኣኒ ካኣታሣንዳ፤ ዒዛኮ ካኣቲሞ ታኣኒ ዶዲሻንዳ።

12 ጌኤኩ ማኣሮ ታኣም ማዣንዳሢ ዒዛኬ፤ ዒዛኮ ካኣቲማኣ ናንጊና ዶዲ ዴዓንዳጉዲ ታ ማሃንዳ፤

13 ታ ዒዛኮ ዓዶ ማዓንዳ፤ ዒዚ ታኣኮ ናዎ ማዓንዳ፤ ኔኤኒ ሳኣዎኦሌ ቤዛ ካኣታዳንጉዲ ካኣቲማፓ ታኣኒ ሳኣዎኦሌ ኬይሳዎ ዒዛይዳ ማጳ ጎይዎ ታኣኮ ማኣሪዎ ኔ ናኣዚፓ ሺኢሺ፣ ታ ዒዛ ሃሻዓኬ።

14 ታ ዴሮና ታ ካኣቲሞናይዳ ናንጊና ታ ዒዛ ዶኦራንዳ፤ ዒዛ ካኣቲማ ጋፑዎ ካኣታቶ ማዓንዳ። » ጌዔ።

15 ያሱሲ ዒዛሞ ፔጋሲ ዳዌ ባኮ ቢያ ዬያይዲ ናኣታኣኔ ዳውቴም ኬኤዜ።

ዳውቴ ናንጊና ናንጋ ጎዳ ጋላቲ ሺኢቁ ሺኢጲዎ
(2ሳሙ. 7:18-29)

16 ዬካፓ ካኣቲ፣ ዳውቴ ዓፒሎና ማዢንቴ ናንጊና ናንጋ ጎዳ ዴሮና ካኣማ ማኣሮ ዴንዴ፤ ዒኢካ ዒ ዴዓዎ፡- «ናንጊና ናንጋ ጎዳ ማዔ ያኦዛሢ! ታኣኒ ሃያ ቢያ ኔ ታኣም ማዳኒ ኮይሳ ዓሲቲዎሴ፤ ታ ማኣሮ ዓሳ ዓይጎ ዓሲዳይ?

17 ናንጊና ናንጋ ጎዳ ማዔ ያኦዛሢ! ኔ ታኣም ሃሢ ዑሣ ዓአጳ ባኣዚ ማዳ ማዳኬ፤ ሙካ ዎዶይዳ ኬሰካንዳ ታ ዜርዎም ቢያ ማዓንዳ ዎዛ ቃኣላ ታኣም ኔ ኬኤዜ፤ ሃሣ ታና ኔ ጳኤፒ ዓሲ ማሄ።

18 ዓካሪ ታ ኔኤም ሃያፓ ዑሣ ዓይጎ ባኣዚ ኬኤዛኒ ዳንዳዓይ? ኔኤኒ ታና ዔዔራ፤ ያዳ ማዔቴያ ኔ ታና ቦንቺሴ፤

19 ዬያ ኔ ታኣም ማዳኒ፤ ሃሣ ሃካፓ ሴካ ኔኤኒ ታና ጳኤፒ ዓሲ ማሃንዳሢ ዔርዛኒ ኔኤኮ ኮሺ ማላሢ ማዔ።

20 ናንጊና ናንጋ ጎዳሢ! ኔጉዴይ ያኦኒያ ፔቴታዎ ባኣሴ፤ ኑ ዎይዜ ጎይዎና ኔጊዳፓ ዓቴም ሜሌ ያሱሲ ባኣሴ።

17:13 2ቆሮ. 6:18፤ ዔ.ብ. 1:5።

21 ኔ ዓሲ ኔ ዔያቶ ማሃኒ ዓይሉማፓ ኔ ዔያቶ ኬሴ፥ ዒሰራዔኤሌ ደርጉዳ ዳሬ ፔቴታዎ ባኣሴ፤ ኔኤኮ ዳር ገላባጃፓ ኬሳኒ ኔ ዔያቶ ዓውሲ፤ ሃሣ ዳኤፒ ዳኤፒ ማዶ ማዳሢር ኔኤኮ ሱንፃ ዓጮ ቢያይዳ ዋይዚንቴኔ።

22 ዒሰራዔኤሌ ዳር ናንገና ኔ ዳሬ ኔ ማሃኔ፤ ናንገና ናንጋ ጎዳሢዮ! ኔኤኒ ዔያቶኮ ያኦዛሢ ማዔኔ።»

23 «ሃሢያ ናንገና ናንጋ ጎዳ ማዔ ያኦዛሢዮ! ታናንታ ታ ዜርዮንታም ኔ ኬኤዜ ዋዞ ቃኣሎ ቢያ ማዲ ኩንሢ፤ ታ ማዳንዳኔ ኔኤኒ ጌዔ ባኮ ቢያ ማዳ፤

24 ዬያ ኔ ማዳንዳሢ ሱንፃ ኔኤኮ ዶዲ ናንጋንዳጉዲና ናንገና ዳኤፒ ማዒ ናንጋንዳጉዲኬ፤ ዬካፓ ዳራ፡- ቢያ ባኮ ማዜ ጎዳሢ ዒሰራዔኤሌ ዓሶኮ ያኦሲኬ! ጋዓንዳኔ፤ ኔ ዓይላሢ ዳውቴኮ ካኣቴማኣ ኔ ቤርታ ዶዲ ናንጋያ ማዓንዳኔ።»

25 «ታ ያኦዛሢዮ! ኔ ዓይላሢ፥ ታኣም ኔኤኒ ሃያ ቢያ ፔጋሴሢርና ዜርዮ ታኣኮ ኔ ካኣታሢ ኬኤዜሢር ታኣኒ ኔና ጫርቂ ሺኢቃኒ ዳንዳዔኔ።

26 ናንገና ናንጋ ጎዳሢዮ! ኔኤኒ ጎኔ ያኦሲኬ፤ ሃያ ዲቃሢ ሄርሺሳ ዋዞ ቃኣሎ ኔ ታኣም ጉሙርሲ ኬኤዜኔ፤

27 ቢያ ዋዳ ኔ ቤርታ ዓኣያ ማዒ ናንጋንዳጉዲ፥ ኔ ዓይላሢ ማኣር ኔ ዓንጃንዳጉዲ ታ ሺኢቃኔ፤ ናንገና ናንጋ ጎዳሢዮ! ኔኤኒ ኔ ዳር ዓንጃሢር ዔያታ ናንገና ዓንጃንቴያ ማዓንዳኔ» ጌዔኔ።

18

ዳውቴ ያሎና ባሺ ባሺያ
(2ሳሙ. 8:1-18)

1 ዬካፓ ዳካ ጋዓዎ ካኣቴ፥ ዳውቴ ላሚ ሃሣ ፒሊሰጃኤማ ዓሶ ያሊ ባሺኔ፤ ዔያቶ ዒ ገኢሪሸኔ፤ ሃሣ ጋኣቴ ካታሞና ኮይሎይዳ ዓኣ ጉርዶ ፔ ዳማ ማሃ ዔኬኔ፤

2 ዬያጉዲ ሞዓኣቤ ዓሶዋ ያሊ ባሺ ፔኤም ገኢሪሸኔ።

3 ገንሣ ሃሣ ካኣቴ፥ ዳውቴ ሶኦሪያ ዓጮይዳ ዓኣ ሃማቴ ዓጮ ኮይላ ናንጋ ያባ ካኣቴ ሃዲድዔዜሬ ያሌኔ፤ ዒዚ ዬያይዳሢ ሃዲድዔዜሬ ኬዶ ዛሎና ዓፕራዒሴ ዋር ኮይሎ ዓጮ ዔካኒ ያሊሢርኬ፤

4 ዳውቴ ዒማና ሃዲድዔዜሬፓ ፔቴ ሺያ ሳርጌላ ያይታ፥ ላንካይ ሺያ ፓርና ላማታሚ ሺያ ቶኪና ሃንቲ ያላ ያልዚ ዓሲ ዲዒ ዔኬኔ፤ ዒዚ፡- ፔቴ ዒኤታ ሳርጌላ ያይታ ጎቻንዳ ፓር ፔኤም ዓይሳዎ ሃንጎ ፓራሢኮ ቃዋንሢ ተቄኔ።

5 ዳማሰቆይዳ ዓሳ ሶኑሪያ ዓሳ ያባ ካኣቲ፣ ሃዲድዔዜሪ ማኣዲኒ ያልዚ ዓሲ ዳኩም ዳውቲ ዔያቶዋ ያሊ ላማታሚ ላምዖ ሺያ ያልዚ ዓሲ ዋዴኔ፤

6 ዩካፓ ዒዚ ዔያቶኮ ዓጮይዳ ያሎ ዓሳ ዲንኪ ዳዓንዳ ቤሲ ጊኢጊሼኔ፤ ዳራኣ ዒዛም ጊኢራ ጩጊ ዓይሢንቲ ዋርቄኔ፤ ናንጊና ናንጋ ጎዳ ቢያ ቤዘይዳ ዳውቲ ያሎና ባሻንዳጉዲ ማሄኔ፤

7 ዳውቲ ሃዲድዔዜሪኮ ደንዘ ማዔ ቢታንታ ዓሳ ዓሳ ዔኪ ዓሳ ዋርቆና ኮሺንቲ ጊቲሞ ቢያ ዲዒ ዔኪ ዩሩሳላሜ ዓሳዴኔ፤

8 ዩያጉዲ ሃሣ ሃዲድዔዜሪ ዓጮ ዓሳ፣ ፀቢሃቲንታ ኩኔ ካታሞናይዳፓ ሚርጌ ዲቢ ሞኦና ዓንጊ ዔኬኔ፤ ሴሎሞኔ ጊንፃፓ ዩያ ሞኦና ዓንጎና ጌኤዠ ማኣሮይዳ ዓሳ ዴኤፓ ደኣላሢንታ ቱርቱር ማሃ ዔቁሶሢንታ ዲማ ዲማ ሞኦና ዓንጎና ኮሺንታ ሜሆ ማዠሴኔ።

9 ዳውቲ ያባ ካኣቲ፣ ሃዲድዔዜሪኮ ያሎ ዓሶ ዋዲ ኩርሲ ባሺሢ ሃማቲ ዓጮ ካኣቲ ቶዒ ጎሆሢ ዋይዜኔ፤

10 ዩያኮ ቤርታ ቶዒ ሃዲድዔዜሪና ዋላ ሚርጌ ዋዴ ያልቲሢር ፔኤኮ ናኣዚ ዮራሜ ዳውቲ ኮራ ዳኬኔ፤ ዒዚ ዳኬሢ ካኣቲ፣ ዳውቲ ዋዚ ዓኣቲያ ያኦጮንዳጉዲና ዒዚ ያሎና ሃዲድዔዜሪ ባሺሢር «ማዳ ኔ ዋዛዴኔ!» ጌዒ ኬኤዘምኬ። ዮራሜ ዒማና ዳውቲም ዋርቄና፣ ቢራ ዓንጊና ሃሣ ሞኦና ዓንጎና ኮሺንቲ ዲማ ዲማ ማሄ ዒንጎ ባኣዚ ማሃ ዔኪ ዩዔኔ፤

11 ካኣቲ፣ ዳውቲ ዩያ ሜሆ ዔኪ ዒዚ ቤርታ ዔደኦሚፓ፣ ሞዓኣቤፓ፣ ዓሞኦኔፓ፣ ፒሊሰፃኤሚንታ ዓማሌቄ ዳርንታፓ ዲዒ ዔኬ ዋርቆ ሜሆንታ ቢር ዓንጎንታ ሞኦና ዓንጎ ሚሆና ዋላ ካኣዠ ካኣሽኪንታንዳ ማሄ ማዓንዳጉዲ ያኦሲም ዲማሴኔ።

12 ፃሩያ ናኣዚ፣ ዓቢሻዩ ዔደኦሚ ዓሶ ሶኦጎ ደኦጮ ጌይንታ ቤዛ ያሊ ባሺ ዔያቶ ባኣካፓ ታጸ ሳሊ ሺያ ማዓ ያልዚ ዓሲ ዋዴኔ፤

13 ዒዚ ዒማና ዔደኦሚ ዓጮ ጉቤይዳ ያልዚ ዓሲ ዲንኪ ዳዓንዳ ቤሲ ማዠ ጊኢጊሼኔ፤ ዩና ዓጮ ናንጋ ዓሳ ካኣቲ ዳውቲም ጊኢራ ዋርቃያ ማዔኔ፤ ናንጊና ናንጋ ጎዳ ቢያ ቤዘይዳ ዳውቲ ያሎና ባሻንዳጉዲ ማሄኔ።

14 ዩያይዲ ዳውቲ ዒሰራዔኤሌ ዓጮ ቢያይዳ ካኣታዴኔ፤ ዳራኣ ቢያ ዋዴ ሳዛ ዲማሰሢ ባኣያ፣ ፒዜ ዋጌ ዋጊሢ ዴንቄኔ።

15 ዓቢሻዩኮ ጌርሲ ዒዮዓቤ ያሎ ዓሶ ዓይሣሢኬ፤ ዩያጉዲ ሃሣ ዓሃሉዳ ናኣዚ፣ ዒዮሳፒፃ ፃኣፒንቲ ጌሢንታ ባኮ ሱኡጌ ማዒ ዛጋያኬ፤

16 ዓሃፀቤ ናአዚ ሳዶቄና ዓቢያታሬ ናአዚ ዓቤሜሌኬና ቄኤሶኬ፤ ሱሳ * ጎምሂ ካአቱሞ ማአሮይዳ ፃአፖ ባኮ ፃአፓያኬ፤

17 ዮዳሄ ናአዚ ቤናያ ዳውቴ ካፓ ፖኦሊሶኮ ሱኡጌኬ፤ ካአቲ፥ ዳውቴኮ ዓተጎቆ ናአታ ዓዴ ካአታዲ ዎይሣአና ዴኤፒ ዴኤፒ ቢታጎቶ ዓአያ ማዒ ማዴ።።

19

ዳውቴ ዓሞኦኔ ዓሶጎታ ሶኦሪያ ዓሶጎታ ያሊ ባሼሢ
(2ሳሙ. 10:1-19)

1 ዬካፓ ዓሞኦኔ ካአቲ፥ ናዖሴ ሃይቄሞ ዒዛ ቤዛ ዒዛኮ ናአዚ ሃኑኔ ካአታዴ፤፤

2 ካአቲ ዳውቴ፡- «ሃኑኔኮ ዓዴ፥ ናዖሴ ታአሞ ማዴ ባኮሮ ቢያ ታአኒያ ዒዛኮ ናአዚ ሃኑኔሞ ዒዛና ላጌ ማዒ ማዴሢ ዛሎ ኮሺ ማዲ ማሃንዳኔ» ጌዔኔ፤ ዬያሮ ዳውቴ ዒዛና ዎላ ያያያ ማዒያ ዔርዛኒ ከኢታ ዓሲ ዳኬ።።

ዬይ ከኢቶ ዓሳ ዒዛ ደዲሻኒ ዓሞኦኔ ዓጮ ዴንዲ ሄላዛ፥

3 ዓሞኦኔ ዓጮይዳ ቢታጎታ ዓአ ዓሳ ካአቲሞ፡- «ዳውቴ ሃንሢ ዓሶ ዳኬሢ ኔ ዓዶ ቦንቸ፤ ኔኤና ዎላ ጎኔ ያያያ ማዒያ ዔርዛኒ ማዔያ ኔኤሞ ማላ? ፔቴታዖ ያዲቱዎሴ! ዒዚ ሃንሢ ከኢቶ ዓሶ ዳኬሢ ዓጮ ኔኤኮ ያሊ ዓርቃኒ ሙሙሮሞኬ» ጌዔኔ።።

4 ዬያሮ ሃኑኔ ዳውቴኮ ከኢቶ ዓሶ ዓርቂ ቡኡጮ ዔያቶኮ ማኤዴ፤ ኬርናፓ ሊካ ዓአ ማአዓሢያ ዔያቶኮ ቲቂ ካላሲ ገንሣ ማሂ ዓጮ ዳኬ፤፤

5 ዬንሢ ዓሳ ፔ ማአሪ ማዒ ዴንዲ ቦርሲጎቴኔ፤ ዳውቴ ዬያ ማዲጎቴ ባኮ ዎይዛዖ ከኢታ ዓሲ ዳኪ ዔያታ ዒያርኮይዳ ዴዓጎዳጉዳ፤ ሃሣ ቡኡጮ ዔያቶኮ ኬሰካንዳያ ሄላንዳአና ማዒ ሙኩዎጉዳ ኬኤዜ።።

6 ዓሞኦኔ ዓሳ ፔ ኩቻ ዬያ ማዲ ዳውቴና ዎላ ሞርኬ ማዔሢ ዔሬሬ፤ ዬያሮ ሃይሢታሚ ያይዶ ሺያ ከሎ ማዓ ቢራ ዳኪ ሳርጌላ ያይታና ፓሮና ኬዶ ዛላ ዓአ ሜሶፖታሚያና ሶኦሪያ ዓጮ ጋራ ዓአ ማዒካና ያባናይዳፓ ዔኬ፤፤

7 ዬያይዳ ዔያታ ዔኬ፥ ሃይሢታሚ ላሞዖ ሺያ ሳርጌላ ያይታና ካአቲ፥ ማዒካኮ ያሎ ዓሶና ሙኪ ሜዳባ ጌይጎታ ቤዞ ኮይላ ዴጎኪ ዴዔኔ፤ ዓሞኦኔ ዓሳ ፔኤኮ ካታማፓ ካታማፓ ሙኪ ያልዚሮ ጌኢጊጎቴ።።

* 18:16 ሱሳ ጎምሂኮ ባጎ ሱጎፃ ሴራያ ጌይጎታያኬ።።

8 ዳውቴ ዬያ ዋይዛዎ ፔኤኮ ያሎ ዓሶ ጉቤሢና ዋላ ዒዮዓቤ ዔያቶ ያላንዳጉዲ ዓይሄኔ፤

9 ዒማና ዓሞኦኔ ዓሳ ሙኪ ዔያቶኮ ዴኤፖ ካታሞ ማዔ ራባ ጌሎ ካራ ቤሲ ቤሲ ዓርቄኔ፤ ሃሃ ዔያቶ ማኣዳኒ ሙኬ ካኣታ ፔጌ ማዔ ቦኦሎይዳ ቤሲ ዓርቄኔ።

10 ሞርኮኮ ያሎ ዓሳ ቤርቶ ዛሎና ሃሃ ጊንሢና ዔያቶ ያላኒ ጊኢጌሢ ዒዮዓቤ ዴንቄኔ፤ ዬያሮ ዒሰራዔኤሌ ፖኦሊሳፓ ያሎና ዔርቴያ ዔርቴያ ማዔ ዓሶ ዶኦሪ ሶኦሪያ ያሎ ዓሶኮ ሆታ ዔቁሴኔ።

11 ያሎ ዓሶኮ ዛሎ ጊንሢ ዒዛ ጌርሲ ዓቢሻዬ ዓይሣንዳጉዲ ማሄኔ፤ ዓቢሻዬያኣ ዬዮ ዓሶ ዓሞኦኔ ዓሶኮ ሆታ ዔቁሴኔ።

12 ዬካፓ ዒዮዓቤ ዓቢሻዬም፡- «ሶኦሪያ ዓሳ ያሎና ታና ባሻኒ ዑኩም ኔ ዴንቄቴ ታና ሙኪ ማኣዴ፤ ታኣኒያ ዓሞኦኔ ዓሳ ኔና ያሊ ባሻኒ ዑኩቴ ሙኪ ማኣንዳንዳኔ፤

13 ዓካሪ ዒጊጨፖ ዶዴ! ኑ ዴሮና ኑ ያኦሲ ካታሞና ዛሎሮ ዶዴ ኑ ያልቶም፤ ናንጊና ናንጊ ጎዳ ጌዔሢጉዲ ዬይ ማዎም» ጌዔኔ።

14 ዒዮዓቤና ዒዛኮ ያሎ ዓሶና ያሎሮ ቤርቴም ኬሰካዛ ሶኦሪያ ዓሳ ጳሽኬኔ፤

15 ዓሞኦኔ ዓሳ ሶኦሪያ ዓሳ ጳሽኬሢ ዴንቃዎ ዓቢሻዬ ቤርታፓ ጊንሢም ካታሞ ባንሢ ጳሽኬኔ፤ ዬካፓ ዒዮዓቤ ዬሩሳላሜ ማዒ ዴንዴኔ።

16 ዒሰራዔኤሌ ዓሳ ያሎና ዔያቶ ባሽሢ ሶኦሪያ ዓሳ ዔራዎ ዔፕራዒሴኮ ዓባ ኬሰካ ባንፃ ዓኣ ሶኦሪያ ዓጮ ያሎ ዓሶ ዔኪ ሙኪ ሾባኬ ዓይሢ ያሊሳንዳጉዲ ማሄኔ፤ ሾባኬ ያባ ካኣቲ፣ ሃዳድዔዜሬኮ ያሎ ዓሶ ዓይሣ ሱኡጌኬ፤

17 ዳውቴ ዬያ ዋይዛዎ ዒሰራዔኤሌኮ ያሎ ዓሶ ቡኩሲ ዔኪ ዮርዳኖሴ ዋሮና ፒንቃዎ ያላኒ ቤሲ ዓርቄ ጊኢጊንቴኔ፤ ሶኦሪያ ዓሳኣ ፔ ቤዞ ቤዞ ዓርቄ ዳውቴና ዋላ ያሎ ዴኡሴኔ።

18 ዬካፓ ዒሰራዔኤሌ ዓሳ ሶኦሪያ ዓሶ ጊንሢም ማሂ ዳውሴኔ፤ ዒማና ዳውቴንታ ዒዛኮ ያሎ ዓሶንታ ላንካይ ሺያ ሳርጌላ ያይታ ዒሻ ዓሲና ያይዲታሚ ሺያ ቶኪና ሃንቲ ያላ ዓሲ፤ ዬያጉዲ ሃሃ ሾባኬ ጌይንታ ሶኦሪያ ያሎ ዓሶ ዓይሣሢያ ዎዴኔ።

19 ካኣቲ፣ ሃዳድዔዜሬ ቢታንቶ ዴማ ዎርቃ ካኣታ ዒሰራዔኤሌ ዓሳ ዔያቶ ያሎና ባሽሢ ዔራዎ ዳውቴና ዋላ ቡኪ ዒዛም ጊኢራያ ማዔኔ፤ ዬማፓ ሶኦሪያ ዓሳ ዓሞኦኔ ዓሶ ማኣዳኒ ኮዒባኣሴ።

ዳውቴ ራባ ካታሞ የሎና ባሺ ዓርቄህ
(2ኛሙ. 12:26-31)

1 ባኮ ለዓ ዓርቃንዳሂኮ ቤርታ ሲሎ ዓጊኖይዳ፣ ካኦታ የልዚር ኬሰካ ዋዶና ዒዮዓቤ የሎ ዓሶ ዔኪ ዳገዲ ዓሞኦኔ ዓጮ የላኒ ራባ ካታሞ ማንጌኔ፤ ዳውቴ ጋዓንቴ ዬሩሳላሜይዳ ዓቴኔ፤ ዒዮዓቤ ዒማና ራባ ካታሞ የሊ ባይዜኔ፤

2 ሚልኮሜ ጌይንታ ዓሞኦኔ ዓሳ ካኦሽካ የኦዘኮ ዳኤሠማ ሃይሂታሚ የይዶ ኪሎ ማዓያ ቶኦካ ዓሳ ባኦዚ ዓኦኔ፤ ዬያኮ ጋርይዳ ሚዛጲ፣ ሚርጌ ዋኦኔ ኬሳ ሹቸ ዓኦኔ፤ ዳውቴ ዬኖ ቶኦካ ዓሳ ባኬሎ ዔኪ ፔ ቶኦካ ዓጌኔ፤ ሃሃ ዬያጉዲ ካታሜሎይዳፓኦ ሚርጌ ባኦዚ ዲዒ ዔኬኔ፤

3 ዒኢካ ዓኦ ዓሶዋ ዔኪ ኬሲ ማጋኦዜንታ ባላሻንታ ሄርጋኦ ዓያቶሞ ዒንጊ ማዶ ማዲሺሴኔ፤ ዓሞኦኔይዳ ዳኮ ዳኮ ካታማ ዓኦ ዓሶዋ ቢያ ዒዚ ዒማይዳ። ዬካፓ ዳውቴና ዒዘኮ የሎ ዓሳ ጊንሃ ዬሩሳላሜ ማዔኔ።

ፒሊሰዌኤሜ ዓሶኮ የሎና ዔርቴ ዓሶ የሎና የልዚ
(2ኛሙ. 21:15-22)

4 ናንጊቤቃ ዒሰራዔኤሌ ዓሳ ጌዜሬይዳ ናንጋ ፒሊሰዌኤሜ ዓሶ የሌኔ፤ ዒማና ሁሻ ዓጪ ሾይንቲ ማዔያ ሲቤካዬ ጎየህ ሲፓዬ ጌይንታ የልዚና ዔርቴ ዓሲ ዋዳ፤ ፒሊሰዌኤሜ ዓሳኦ የሎና ባሺንቴኔ፤

5 ዬያ ሌሊቱዋንቴ ላሚ ሃሃ ፒሊሰዌኤሜ ዓሶ ዔያታ የሌኔ፤ ዬኖ የሎና የዒሬ ናኦዚ፣ ዔልሃናኔ ጋኦቴ ዓጫ ሾይንቲ ጎኦሊያዳኮ ጌርሲ ላሂሜ ዋዳ፤ ዬያኮ ዋርዖ ዘየ ዓንዲርሙማ ዶርዜኮ ዓንዳራሾ ሚሂጉዳያኬ።

6 ማሌ ሃሃ ጋኦቴይዳ የልዚ ቡሊንቴኔ፤ ዬኖ የሎይዳ ላሞየ ኩጮና ቶኮናይዳ ላቆ ኬኤላ ዋሊ ዑፃ ላማታሚ የይዶ ኬኤላ ዓኦ ፔቴ የዶሲ ዓሲሰኬይ ዓኦኔ፤ ዒዚያ ሚናኦ ዋዶና የሎና ዔርቴ ራፓይሜ ዓሶ ዜርፃፓኬ።

7 ዬይ ዓሂ ዒሰራዔኤሌ ዓሶ የላኒ ጫርቄኔ፤ ጋዓንቴ ዳውቴኮ ጌርሲ፣ ሻማ ናኦዚ ዮናታኦኔ ዒዛ ዋዳ።

8 ዳውቴንታ ዒዘኮ የሎ ዓሶንታ ዋዳ ዬንሂ ሃይሃ ዓሶንሂ የሎና ዔርቴያ ማዔ፣ ራፓይሜ ዜርፃፓኬ።

20:1 2ኛሙ. 11:1። 20:5 1ኛሙ. 17:4-7።

21

ዳውቴ ዓሶ ፓይዴሢ (2ኛው፡ 24:1-25)

1 ዓላሂ ዒሰራዔኤሌ ዳርይዳ ማቶ ዔኪ ዩዓኒ ማሌሢር ዳውቴ ዳር ፓይዳንዳጉዲ ዳውቴ ዒና ጌሌኔ።

2 ዳውቴ ዒማና ዒዮዓቤና ሃንጎዋቶ ያሎ ዓሶ ሱኡጎናም፡- «ዒሰራዔኤሌ ዓጮኮ ካራፓ ጋፖ ሄላንዳኦና፤ ጌይፆ፡- ዳኦኔፓ ዳንዲ ቤርሳቤ ሄላንዳኦና ዓኦዲ ዳር ፓይዳዋቱ፤ ታኦኒ ዒሰራዔኤሌ ዓጮይዳ ዓኦፒኒ ዓሲ ዓኦቴያ ዓራኒ ኮዓኔ» ጌይ ዓይሢኔ።

3 ዒዮዓቤ ማሃዮ፡- «ካኦቴዮ! ናንጊና ናንጋ ጎዳ ዒሰራዔኤሌ ዳር ሃሢ ዓኦሢፓ ጃኤታ ጳንጨጭ ማሃ ኔኤም ማርጊሾንጎ! ዔያታ ቢያ ኔ ዓይሎኮ፤ ዓካሪ ኔኤኒ ዳር ፓይዲ ዳራ ጉቤ ዳቤያ ዓይጋ ማሃይ?» ጌዔኔ።

4 ካኦቴ ጋዓንቴ ፔኤኮ ዓይሢፃ ኩማንዳጉዲ ዋልቃዲ ዒዮዓቤ ዓይሢኔ፤ ዩካፓ ዒዮዓቤ ካኦቴ ኮራፓ ኬሰኪ ዳንዲ ዳር ፓይዲኒ ዓጮ ጉቤ ሺሪ ዩራሳላሚ ማዒ ሙኬኔ።

5 ዒዚ፡- ያልዚ ያላኒ ዳንዳዓ ዓሶኮ ፓይዶ ቢያ ዳውቴም ኬኤዜኔ፤ ዩያታ፡- ዒሰራዔኤሌፓ ፔቴ ሚሎኔና ፔቴ ጃኤታ ሺያ ዓሲ ማዓዛ፤ ዩሁዳይዳፓ ሃሃ ያይዶ ጃኤታና ላንካይታሚ ሺያናኬ፤

6 ዒማና ዒዮዓቤ ካኦቴኮ ዓይሢፆ ናሽኪ ዔኪባኦሢር ለዊ ዓሶንታ ቢኢኒያሚ ዓሶ ፃጳ ፓይዲባኦ።

7 ያኦሲ ዩያ ማዲንቴ ባኮር ቢያ ማርጌና ዳጋዴሢር ዒሰራዔኤሌ ዓሶይዳ ማቶ ዔኪ ዩዔኔ።

8 ዩያር ዳውቴ ያኦሲ ኮይላ፡- «ታኦኒ ሃያይዲያና ዳኤፒ ዳኤሢ ማዔ ጎሜ ማዳኔ! ሃዳራ ታና ማኦሬ፤ ዔኤያቶ ማዳ ታ ማዳያዋይ!» ጌዔኔ።

9 ናንጊና ናንጋ ጎዳ ዳውቴም ያኦሲ ማሊያ ኬኤዛ፤ ጋኦዳም፡-

10 «ዳንዲ ዳውቴም ሃይሃ ባኦዚፓ ኔ ዶኦራንዳጉዲ ታ ኔኤም ሺኢሽኔ፤ ታኦኒ ኔ ዶኦራማ ማዳንዳኔ» ጋዓኔ» ጌይ ኬኤዜ ጌዔኔ።

11 ዩያር ጋኦዳ ዳውቴ ኮይላ ዳንዲ ናንጊና ናንጋ ጎዳ ዒዛም ጌዔ ባኮ ቢያ ፔጋሲ ኬኤዜኔ፤ ሂዚ ጌዒ ዒዛ ያኦጮኔ፡-

12 «ኔ ዓጮይዳ ሃይሃ ለዔ ለማ ኬሰኬቴ ኮሺም? ሃንጎ ጊንሃ ሃይሃ ዓጊኒ ኔ ሞርካ ኔና ዳውሲ ሃንቴቴዳይ? ዔይዔ ጌዔቴ ሃይሃ ኬሊ ናንጊና ናንጋ ጎዳ ዳካ ፑርታ ዶርያና ዓጮ ኔኤኮ ቢያ ኩርሳንዳ ከኢታንቸ ዳካያይዳፓ ዋማ ኔ ዶኦራይ? ሂንዳ ዓካሪ ናንጊና ናንጋ ጎዳም ታ ጋዓንዳማ ዲማሲ ኬኤዜ» ጌዔኔ።

13 ዳውቴ ዒማና፡- «ታኣኒ ዎኖ ዶኦራንዳቴያ ካራ ታኣም ባይቄኔ! ያዲ ማዔቴያ ዓሲ ኩቺ ጋርሲ ጌላኒ ታ ኮዑዋሴ፤ ናንጊና ናንጋ ጎዳ ሚጪንታያታሢሮ ዒ ታጊዳ ኮዔ ማቶ ዓዓጎንጎ» ጌዔኔ።

14 ዬያሮ ናንጊና ናንጋ ጎዳ ዒሰራዔኤሌ ዳሮይዳ ፑርታ ዎዳ ዶርዖ ዔኪ ሙኬም፡ ላንካይታሚ ሺያ ዓሲ ኩዳኔ፤

15 ናንጊና ናንጋ ጎዳ ጊንሣ ሃሣ ዬሩሳላሜ ባይዛኒ ከኢታንቻ ዳኬኔ፤ ጋዓንቴ ከኢታንቻሢ ዬሩሳላሜ ባይዚያ ዓዓርቃማና ዳሮይዳ ናንጊና ናንጋ ጎዳ ሄሊሴ ሜታ ዒዛኮ ዎልቃ ጌሌሢሮ ከኢታንቻሢም፡- «ሃይማ ሄላንዳኣና ዔያቶይዳ ሄሌ ሜታ ጊዳንዳኔ፡ ሃሺ!» ጌዔኔ። ከኢታንቻሢ ዒማና ዒያቡሳ ዓሢ ዖርና ጎዖሢኮ ቆይዶ ዓጫ ዔቁ ዓኣኔ።

16 ከኢታንቻሢ ዬሩሳላሜ ባይዛኒ ጨንቻ ዓፓሮ ኩጫ ዓርቁ ሳዖኮ ዑፃ፡ ዴጌ ዠባራ ዔቁ ዓኣንቴ ዳውቴ ዳንቄኔ፤ ዬያሮ ዳውቴንታ ሲዮ ፓተሎ ማይንቴ ዓኣ ዳሮ ሱኡጎንታ ቢያ ባሊቶ ሳዖ ሄሊሲ ዒዛም ዘጌኔ።

17 ዳውቴ ዒማና፡- «ዖኦሲዮ! ዳቢንቴሢ ታናኬ፤ ዳራ ፓይዲንታንዳጉዲ ዓይሢሢያ ታናኬ፤ ዓካሪ ሃይ ዔኤቢ ዔሩዋ ዓሳ ዓይጎ ዎኦቴይ? ናንጊና ናንጋ ጎዳ ማዔ ዖኦዛሢዮ! ታናንታ ታ ማኣሮ ዓሰንታይዳ ሜቶ ዓጌ፤ ሃያ ዳሮ ዑፃ ሃያ ዎዳ ዶርዓሢ ኬይሲፖ» ጌዒ ሺኣቄኔ።

18 ናንጊና ናንጋ ጎዳኮ ከኢታንቻሢ ጋኣዴም ሃዚ ጌዔኔ፡- «ዳውቴ ዒያቡሳ ዓሢ፡ ዖርና ቆይዶ ዳንዲ ናንጊና ናንጋ ጎዳም ዒንጎ ባኮ ዒንጎ ቤሲ ጊኢጊሾም ኬኤዜ።»

19 ጋኣዴ ዒዛም ኬኤዜ ዓይሢያ ኩንሣኒ ዳውቴ ዳንዴኔ፤

20 ዬኖ ቆይዶይዳ ዖርናንታ ዒዛኮ ዖይዶ ዓተንቆ ናኣቶንታ ዛርጌ ሺርኪቤቃ ከኢታንቻሢ ዳንቃዖ ናኣታ ጳሽኪ ፑኒንቴኔ።

21 ዖርና ዒማና ዳውቴ ዔያቶ ባንሢ ሙካሢ ዛጊ ቆይዶይዳፓ ዒዛ ባንሢ ኬሰኪ ሳዓ ላሂ ቦንቻ ዔኤሊሢ ዔኤሌኔ፤

22 ዳውቴ ዖርና ኮይላ፡- «ፑርቶ ዎዳ ዶርዓሢ ዳሮይዳፓ ዔቃንዳጉዲ ናንጊና ናንጋ ጎዳም ዒንጎ ባኣዚ ዒንጎንዶ ቤሲ ታ ጊኢጊሾም ኔኤኮ ቆይዶ ታኣም ሻንቹ፤ ጪጊንታኒ ኮይሳ ባኮ ቢያ ኩንሢ ታ ጪጋንዳኔ» ጌዔኔ።

23 ዬያሮ ዖርና፡- «ካኣቴዮ! ኔኤሮ ዔኬ፤ ኔ ኮዔ ባኣዚ ዒኣካ ማማዴ፤ ዒንጎ ባኮ ዒንጎ ቤዛይዳ ሚቹ ዒንጋኒ ሃንሢ ጌማቶንሢያ ዔኬ፤ ሃያ ሃኣኮ ሺርኮ ሚዖዎ ሃንፃሌ ማሂ ዔኬ፤ ሃሣ ዛርጋሢያ ሃኣኮ ዒንጊሢ ማሂ ሺኢሺ፤ ሃይሾ ቢያ ባኮ ታ ኔኤም ዒንጌኔ» ጌዔኔ።

24 ካአቲ፥ ዳውቲ ጋዓንቲ፡- «ዩይ ማዓዓኬ፤ ጨገንታኒ ኮይሳ ባኮ ቢያ ታ ጨጋንዳኔ። ኔ ባአዚ ማዓያ፤ ታአኒ ዔኤቢ ጨገ ዔከባአ ባአዚ ናንገና ናንጋ ጎዳም ዒንጎ ባአዚ ማሂ ዒንጋኒ ታ ኮዑቀሴ» ጌዔኔ።

25 ዩካፓ ዳውቲ ጋርናም ዩኖ ቆይዶኮ ላንካይ ኪሎ ማዓንዳ ዋርቁ ጨገ፥

26 ዩኖ ቤዘይዳ ናንገና ናንጋ ጎዳም ዒንጎ ባኮ ዒንጎ ቤሲ ገአገሺ ሚቹ ዒንጎ ዒንገሢንታ ፔቱሞና ዒንጎ ባአዚያ ሺኢሹኔ፤ ዒዚ ዒማና ሸኢቃዛ ናንገና ናንጋ ጎዳ ዒንጎ ባኮ ዒንጎ ቤዘይዳ ዓአ ባኮ ኬዲ ሙዓንዳ ታሚ ጫሪጎጫፓ ዳኪ ሸኢጲያ ዒዛኮ ዋይዘኔ።

27 ናንገና ናንጋ ጎዳ ኪኢታንቻሢ፡- «ጨንቾ ዓራፖ ጎንጎኖይዳ ዳኤ» ጋዓዛ፥ ኪኢታንቻሢ ዓይሢንቲ ጎይፆ ማዳኔ፤

28 ዩያይዴም ዳውቲ ናንገና ናንጋ ጎዳ ዒዛኮ ሸኢጲያ ዋይዘሢ ዔሬኔ፤ ዩያር ዒያቡሳ ዓሢ፥ ጋርና ቆይዳ ዓአ ዒንጎ ቤዘይዳ ናንገና ናንጋ ጎዳም ዒንጎ ባአዚ ዒዚ ሸኢሹኔ፤

29 ሙሴ ዓሲ ናንጉዋ ዳውሎይዳ ማዜ፥ ዓፒሎና ማዜንቲያ ጎዳ ካአሽከንታ ማአሮንታ ዒንጎ ባኮ ዒንጎ ቤዘንታ ዩማ ሄላንዳአና ጌባጾኦይዳ ዓአ ካአሽኮ ቤዛ ዓይ ዓአኔ፤

30 ናንገና ናንጋ ጎዳ ኪኢታንቻሢኮ ጨንቾ ዓፓር ዳውቲ ዒገጨሢሢር ዒኢካ ዴንዲ ጾኦሲ ካአሽካኒ ዳንዳዒባአሴ።

22

1 ዩያር ዳውቲ፡- «ጾኦሲኮ ጌኤዦ ማአሮንታ ዒሰራዔኤሌ ዴሮኮ ናንገና ናንጋ ጎዳም ሚቹ ዒንጎ ባኮ ዒንጎ ቤዛአ ሃይካ ማዓንዳያ ኮይሳኔ» ጌዔኔ።

ጌኤዦ ማአር ማዛኒ ገአገሺንቲ ባኮ

2 ካአቲ፥ ዳውቲ ዒሰራዔኤሌ ዓጮይዳ ናንጋ ማሌ ዓጮ ዓሶ ፔቲይዳ ቡኩሲ ማዶ ማዲሹኔ፤ ዩያቶ ዓሶፓ ፔቲ ፔቲ ዓሳ ጌኤዦ ማአር ማዦንዶ ሹጮ ዓርሳንዳጉዲ ዓይሣኔ፤

3 ዳውቲ ዒማና ማርሽ ካሮኮ ሚሰማሮንታ ማአጻፖ ጌይንታ ጳንጨንታ ዓንጎዋ ኮሾንዶ ዲቢ ዓንገ፤ ዩያጉዲ ሃሣ ዴኤሠሞዔር ባኮና ዛጊ ዔርታኒ ዳንዳዑዋ ሞኦና ዓንገያአ ዑሣ ዓአዴ ሚርጌ ገአገሹኔ፤

4 ጻርሴና ሲዶና ዓጮ ዴራአ ኮሺ ዲቢ ዚቢቁ ዔኪ ዩዓንዳጉዲ ዓይሢ ዔኪ ዩይሴኔ።

5 ዩካፓ ዳውቱ፡- «ታ ናኣዚ፣ ሴሎሞን ናንገና ናንጋ ጎዳም ማዠንዳ ጌኤዠ ማኣራ ሚርጌና ሚዛጳያ ዓጮ ቢያይዳ ዔርቲያ ማዓኒ ኮይሳኔ፤ ጋዓንቲ ዒዚ ሃገ ናይ፡ ዒናዲ ዶዲባኣያ ማዔሢሮ ታኣኒ ቢያ ባኮ ዒዛም ገኢጊሻንዳኔ» ጌዒ ፔ ዒናና ማላዖ ዒ ሃይቃንዳሢኮ ቤርታ ማኣሮ ማዠንዳ ባኮ ሚርጌ ገኢጊሹኔ።

6 ዒማና ዳውቱ ፔኤኮ ናኣዚ ሴሎሞን ዔኤሊሳዖ ናንገና ናንጋ ጎዳ ማዔ ዒሰራዔኤሌ ዖኦዛሢም ጌኤሺ ማኣሪ ማዠንዳጉዲ ዓይሄኔ፤

7 ዒዚ ናኣዚም፡- «ታ ናዓሢዮ፤ ታኣኒ ናንገና ናንጋ ጎዳ ማዔ ታ ዖኦዛሢም ጌኤሺ ማኣሪ ማዠን ማሌንቲ፡

8 ናንገና ናንጋ ጎዳ፡- «ኤኤኒ ሚርጌ ዓሲ ዎዴኔ፤ ሚርጌ ዖልዚያ ኔ ዖልቲኔ፤ ሚርጌ ሱጉሢያ ኔኤኒ ላኣሌሢሮ ጌኤሺ ማኣሪ ኔ ማዠንዳጉዲ ታ ኮዑዎሴ» ታኣም ጌዔኔ፤

9 ዖዲ ማዔቲያ ሂዚ ጋዓ ሃገ ማዓንዳ ዎዛ ቃኣላ ታኣም ከኤዘኔ፡- ታኣኒ ዒዛኮ ሞርኮ ቢያይዳፓ ሃውሺሲ ኮሹሞ ዒዛም ዒንጌም ኮሺና ዓጮ ዎይሃንዳ ዓቲንቄ ናይ ኔ ሸዓንዳኔ፤ ዒዚ ካኣታዲ ዎይሃ ዎዶና ዒሰራዔኤሌ ዴሮም ዲቃቲሢባኣ ኮሹሞ ታ ዒንጋንዳሢሮ ሱንፃ ዒዛኮ ሴሎሞን ጌይንታንዳኔ፤

10 ታኣም ጌኤዠ ማኣሮ ማዠንዳሢ ዒዛከ፤ ዒዚ ታኣኮ ናዖ ማዓንዳኔ፤ ታኣኒያ ዒዛኮ ዓዶ ማዓንዳኔ፤ ካኣቲማኣ ዒዛኮ ዒሰራዔኤሌይዳ ዶዲ ናንጋንዳኔ» ጌዔኔ።

11 ዳውቱ ሃሃ ከኤዛዖ፡- «ሃሢ ዓካሪ ታ ናዓሢዮ፤ ናንገና ናንጋ ጎዳ ማዔ ኔ ዖኦዛሢ ኔኤና ዎላ ማዖንጎ፤ ዒዛም ኔኤኒ ጌኤዠ ማኣሮ ማዠንዳጉዲ ዒዚ ዒንጌ ሃገ ማዓንዳ ዎዛ ቃኣሎ ካፒ ቢያ ባኮ ኔኤም ገኢጊሹንጎ፤

12 ዒሰራዔኤሌይዳ ኔና ዒ ካኣታሃኣና ናንገና ናንጋ ጎዳ ኔ ዖኦዛሢኮ ዎጎ ኔኤኒ ካፓንዳጉዲ ዔራቶና ጳቂሥሢ ማሊሢና ዒ ኔኤም ዒንጎንጎ፤

13 ናንገና ናንጋ ጎዳ ሙሴ ዛሎና ዒሰራዔኤሌም ዒንጌ ዎጎንታ ዓይሢዖንታ ቢያ ኔ ኩንሢቲ፡ ቢያ ባካ ኔኤም ገኢጊንዳኔ፤ ዶዴ፡ ዒጊጨፓ፤ ጩርቂ ማዲያ ማዔ።

14 ጌኤዠ ማኣሮ ማዠንዳ ዛሎ ማዔቲ ታኣኒ ታ ዛሎና ማኣሮ ማዠንዳም ማዓንዳ ሃይሃ ሺያና ዖይዶ ጻኤታ ቶኦኔ ማዓ ዎርቂ፤ ሃይሢታሚ ዖይዶ ሺያ ቶኦኔ ማዓ ሹቺ ቢራ፤ ሚርጌማ ሃይማኬ

22:10 2ሳሙ. 7:1-16፤ 1ዮሱሲ. ዓሃኬ 17:1-14። 22:13 ዓ.ያ. 1:6-9።

ጌይንቲ ዔርቱዋ ሞኦና ዓንገንታ ገአጊሼኔ፤ ዬያጉዲ ሃሣ ሚሢንታ ሹቹያ ታኣኒ ገአጊሼኔ፤ ጋዓንቲ ኔኤኒ ዬያይዳ ቃሳንዳያ ኮይሳኔ፤

15 ኔኤኮ ሹቹ ዓርሳ ዓሲ፣ ሹጮና ማኦር ማዣ ዓሲ፣ ሚያና ማዣ ዓሲ፤ ዬያጉዲ ሃሣ ዲማ ዲማ ማዶ ማዶ ዓሲያ ዓኣኔ፤

16 ዋርቁ፣ ቢራ ዓንገ፣ ሞኦና ዓንገንታ ሜሌ ዓንጎዋ ገአጊሸሢና ዔርቱ ዲማ ዲማ ማዶ ማዶ ዓሲ ኔኤኮ ዓኣኔ፤ ዬያር ሃሢ ማዶ ዓርቁ፤ ናንገና ናንጋ ጎዳ ኔኤና ዋላ ማዶንጎ» ጌዔኔ።

17 ዬካፓ ዳውቲ ዒሰራዔኤሌ ዓሶኮ ሱኡጋ ቢያ ዒዛኮ ናኣዚ ሴሎሞኔ ማኦዳንዳጉዲ ሂዚ ጌዒ ዓይሣኔ፤

18 «ናንገና ናንጋ ጎዳ ዒንሢኮ ጾኦዛሢ ሃይማ ሄላንዳኦና ዒንሢና ዋላኬ፤ ቢያ ዛሎና ሂርጊሻ ባኣዚፓ ቢያ ካፒ ኮሹሞ ዒንሢሞ ዒንጌኔ፤ ሃና ዓጮይዳ ናንጋ ዴር ቢያ ታኣኒ ያሊ ባሺ ዓርቃንዳጉዲ ማኦዳኔ፤ ዔያታ ዒንሢንታ ናንገና ናንጋ ጎዳንታሞ ዓይሢንቲ ዋርቃያ ማዔኔ፤

19 ዓካሪ ናንገና ናንጋ ጎዳ ማዔ ዒንሢኮ ጾኦዛሢ ጉቤ ዒናፓ፤ ሃሣ ጉቤ ሸምፓፓ ማዶዋቲ፤ ናንገና ናንጋ ጎዳኮ ጫኣቁሞ ሳኣጸናንታ ዒዛ ካኣሽኮ ዒዛሞ ዲማዴ ሜሆ ቢያ ዔኪ ሙኪ ጋራ ጌሣኒ ጌኤኮ ማኦር ጾኦሲ ቦንቾሞ ማዢያ ዓርቁዋቲ።»

23

1 ዳውቲ ባሺንቲ ጋርቻያ ፔኤኮ ናኣዚ፣ ሴሎሞኔ ዒሰራዔኤሌይዳ ካኣታሣኔ።

ሌዊ ዓሶ ማዶ

2 ካኣቲ፣ ዳውቲ ዒሰራዔኤሌ ዓሶ ሱኡጎንታ ቁኤሶንታ ሌዊ ዓሶንታ ጉቤ ፔቲይዳ ቡኩሴኔ፤

3 ዒዚ ዒማና ሌዓ ሃይሢታሚና ዬካፓ ዑሣ ማዔ፣ ሌዊ ዓሶ ዓቲንቆ ቢያ ፓይዳኔ፤ ዋሊ ዑፃ ፓይዳ ዔያቶኮ ሃይሢታሚ ሳሊ ሺያ ማዔኔ፤

4 ካኣቲ ዔያቶይዳፓ ላማታሚ ያይዶ ሺያ ማዓ ዓሲ ጌኤኮ ማኦር ማዶ ማዶንዳጉዲ ዓይሣኔ፤ ሃሣ ላሆ ሺያ ማዓ ዓሲ ዶኦሪ ቢታንቶ ዓኣ ዓሲና ዋጌ ዋጋ ዓሲ ማሂ ጌሣኔ።

5 ያይዶ ሺያ ማዓ ዓሲ ጌኤኮ ማኦር ካፓንዳጉዲ ጌሢንቲኔ፤ ዓቲ ያይዶ ሺዮ ዓሶ ካኣቲ ዔያቶሞ ዒንጋ፣ ዓይኡሞ ዓንጎና ናንገና ናንጋ ጎዳሞ ዓይናዲ ጋላታንዳጉዲ ማሆናኔ።

23:1 1ካኣቶ. ማ 1:1-40::

6 ዳውቴ ለዋ ዓሶ ፔኤኮ ቶኦኮና ቶኦኮና ሃይሃ ቤሲ ፓቄኔ፤
ዔያታ፡- ገርሾኔ፣ ቁዓቴንታ ማራሪ ጌይንታ ቶኦኮኤ።

7 ገርሾኔኮ ላዒዳኔና ሸምዒ ጌይንታ ላምዖ ዓተንቄ ናይ ዓኣኔ፤

8 ላዒዳኔኮዋ ዩሂዔኤሌ፣ ዜታሜንታ ዒዮዔኤሌ ጌይንታ ሃይሃ
ዓተንቄ ናይ ዓኣኔ፤

9 ሸምዒኮ ሸሎሞቴ፣ ሃዚዔኤሌና ሃራኔ ጌይንታ ሃይሃ ዓተንቄ
ናይ ዓኣኔ፤ ዩንሢ ቢያ ላዒዳኔ ዜርዖ ማዔ ቶኦኮኮ ሱኡጎኤ፤

10-11 ሸምዒኮ ለዓ ዋሊ ሄሊ ሄሊ ሸይንቴያ፡- ያሃቴ፣ ዚዛ፣
ዪዑሹና ቤሪያ ጌይንታ ያይዶ ዓተንቄ ናይ ዓኣኔ፤ ዪዑሹና ቤሪያናኮ
ሚርጌ ናይ ባኣሢር ፔቴ ቶኦኪ ማዒ ፓይዲንታኤ።

12 ቁዓቴኮ ዓምራሜ፣ ዪፅሃሬ፣ ኬብሮኦኔና ዑዚዔኤሌ ጌይንታ
ያይዶ ዓተንቄ ናይ ዓኣኔ፤

13 ዒዛኮ ናኣዚ ቶይዲ ዓምራሜ ዓኣሮኔና ሙሴናኮ ዓዶኤ፤
ዓኣሮኔና ዜርዖና ናንጊና ናንጋ ጎዳ ካኣሸኮ፣ ዲማፌ ማሆ
ሱኡጌ ማዒ ካፒ ካፒ ናንጋንዳጉዲ፤ ሃሃ ናንጊና ናንጋ ጎዳ
ካኣሸኮ ዳምቦይዳኣ ዑንጅ ጨቢሻንዳጉዲ፤ ያኦሲማኣ ማዲያ
ማዓንዳጉዲ፤ ዪያጉዲ ጊንሣ ናንጊና ናንጋ ጎዳ ሱንዖና ዴሮ
ዓንጅንዳጉዲ ዲማሶናያኤ፤

14 ያኦሲ ዓሲ ማዔ ሙሴኮ ናኣታ ለዋ ዓሶና ዋላ ፓይዲንቴኤ።

15 ሙሴኮ ገርሾሜና ዔሊዔዜሬ ጌይንታ ላምዖ ዓተንቄ ናይ
ዓኣኔ፤

16 ገርሾሜኮ ዓተንቄ ናኣቶ ባኣካፓ ሱኡጋሢ ሸቡዔኤሌኤ፤

17 ዔሊዔኤዜሬኮ ሬሃቢያ ጌይንታ ፔቴ ዓተንቄ ናይ ሌሊ ዓኣኔ፤
ሬሃቢያኮ ጋዓንቴ ሚርጌ ዜርሢ ዓኣኔ።

18 ቁዓቴኮ ላምዓሳ ናኣዚ፣ ዪፅሃሬኮ ዪኖ ቶኦኮ ሱኡጌ ማዒ
ዋይሃ ሸሎሚቴ ጌይንታ ፔቴ ዓተንቄ ናይ ዓኣኔ፤

19 ቁዓቴ ናኣዚ ኬብሮኦኔኮ ቤርታሳ ናዓሢ ዪሪያ፣ ላምዓሳሢ
ዓማሪያ፣ ሃይሃሳሢ ያህዚዔኤሌ፣ ያይዳሳሢ ዪቃምዓሜ
ጌይንታያኤ።

20 ቁዓቴኮ ያይዳሳ ናዓሢ፣ ሙዚዔኤሌኮ ቶይዳሢ ሚካ፤
ሄሊሴሢ ዩሺያ ጌይንታ ላምዖ ዓተንቄ ናይ ዓኣኔ።

21 ማራሪኮ ማህለና ሙሺ ጌይንታ ላምዖ ዓተንቄ ናይ ዓኣኔ፤
ማሂሊኮ ሃሃ ዓላዜሬና ቁሽ ጌይንታ ላምዖ ዓተንቄ ናይ ዓኣኔ።

22 ዓላዜሬ ጋዓንቴ ዉዲሮ ናይፓ ዓታዛ ፔቴታዖ ዓተንቄ ናይ
ሾውዋዖ ሃይቄኔ፤ ዒዛኮ ዉዲሮ ናኣታ ዔያቶኮ ዓቡ፣ ቁሽ ናኣቶም
ሎዔኔ፤

23:13 ኬሲ. ማፃ 28:1።

23 ሜራሪኮ ላምዓሳ ናኣዚ፥ ሙሹኩ፡- ማሂሊ፥ ዔዴሬና ዪሬሞቲ ጌይንታ ሃይሆ ዓቲንቄ ናይ ዓኣኔ።

24 ዓካሪ ዬያታ ቢያ ፔ ቶኦኮና ቶኦኮና፤ ሃሃ ፔ ማኣርና ማኣርና ፓይዲንቲ ለዊ ዜርዖ ማዓዛ ፔቲ ፔቲ ዓሳ ፔ ሱንዖና ዔኤሊንታኔ። ለማታሚ ለዔ ኩሜያ፤ ሃሃ ገንሣ ዬካፓ ዑሣ ማዔ ፔቲ ፔቲ ለዊ ዜርዖ ናንገና ናንገ ጎዳኮ ጌኤዠ ማኣርይዳ ማዳ ባኣዚ ዓኣያኩ።

25 ዳውቲ ዒማና፡- «ናንገና ናንገ ጎዳ ማዔ ዒሰራዔኤሌኮ ሆኣዛሂ ፔ ዳርሞ ኮሹሞ ዒንጌኔ፤ ዬያ ሌሊቱሞንቲ ዒ ፔ ቶኦኮና ዬሩሳላሚይዳ ናንገና ናንገንዳኔ፤

26 ዬያር ሃካፓ ሴካ ናንገና ናንገ ጎዳ ካኣሽኪንታ ማኣርንታ ካኣዠ ዳምቦ ኩንሆ ሜሆ ለዊ ዓሳ ኩዲ ኩዲ ሃንታንዳያ ኮይሱሞሴ» ጌዔኔ።

27 ዳውቲ ጋፒንፃ ዓይሄ ዓይሄፃ ጎይዖና ለዊ ዓሳ ቢያ ለማታሚ ለዔ ኩሜ ዓሶንታ ዬካፓ ዑሣ ዓኣዴ ዓሳ ማዶሮ ሱንዖ ፃኣፒንቲኔ።

28 ዔያታ ማዳ ማዳ፡- ዓኣርኔ ናኣታ ናንገና ናንገ ጎዳ ማኣርይዳ ማዳ ማዳ ማኣዲሂ፥ ዲሮ ጋርንታ ኩኤዖኮ ቆልዖ ጋር ጌኤሽ ካፒሂ፥ ናንገና ናንገ ጎዳም ዲማዴ ሜሆ ጌኤሽ ካፒሂ፤ ዬያጉዲ ጌኤዠ ማኣርይዳ ማዳንታ ባኮ ማዳሂኩ።

29 ያሳሊም ዒንገንታፃ ማዒ ሽኢካ ካሃና ዲኢሎና፤ ዬያጉዲ ሃሃ ሙኦቃ ፃኣዛ ጌሊባኣ ላኣደንታ ሪሚቶ ዛይቶና ዲርኪንታ ዲኢሎንታ ሱኡጌ ማዒ ዛጋያ ማዓዛ፥ ገንሣ ሃሃ ጌኤዠ ማኣርሞ ዒንገንታ ባኮ ዴኤሠሞ ዔር ባኮና ዛገ፤ ዋርቂያኣ ዔራ ዓሳ ዔያቶኩ፤

30-31 ቢያ ኩሊ ጉቲና ዒባኒና፤ ዬያጉዲ ሃሃ ናንገና ናንገ ጎዳም ዒንጎ ባካ ሚቹንታ ዓይሁደኮ ሃውሾ ኩሎንታ ዓገኖ ፄኤርንታ ዲማ ዲማ ቦንቾ ኩሎንታይዳ ናንገና ናንገ ጎዳ ጋላቲሂና ቦንቹሂ ዔያቶ ማዶኩ፤ ቢያ ዎዴ ዬያ ማዶ ማዳ ለዊ ዓሶኮ ፓይዳ ዋኣዲ ማዓኒ ኮይሳቲያ ኩሰኬ ዳምቤ ዓኣኔ፤ ለዊ ዓሳ ናንገና ናንገ ጎዳ ካኣሽኪያ ዳምቦ ኩንሣንዳጉዲ ቢያ ዎዴም ጌሂንቲኔ።

32 ዬያጉዲ ሃሃ ዓፒሎና ማዠንቲ፥ ናንገና ናንገ ጎዳ ካኣሽኪንታ ማኣርንታ ጌኤዠ ማኣርንታ ዛገ ካፒፃ ዔያቶ ማዶኩ፤ ዬያ ሌሊቱሞንቲ ጌኤዠ ማኣርይዳ ካኣዠ ካኣሽኪሳ፥ ዔያቶኮ ዒገኖ ዓኣርኔ ዜርዖ ማዔ ቁኤሶሞ ዔያታ ማኣዳኔ።

23:26 ለሚ. ዎማ 10:8። 23:32 ፓይ. ማፃ 3:5-9።

24

ቄኤሳ ማዳንዳጉዲ ዓይሢንቴ ባኮ

1 ዓኣሮኔ ናኣታ ማዶሮ ዲማ ዲማ ፓቂንቴ ጎይፃ ያዲኩ፡- ዓኣሮኔኮ ያይዶ ዓቲንቄ ናይ ዓኣኔ፤ ዔያቶኮ ሱንፃ፡- ናኣዳኣቤ፡ ዓቢሁ፡ ዓላዜሬንታ ዒታማሬንታኩ፤

2 ናኣዳኣቤና ዓቢሁና ዓደኮ ቤርታ ደንሢ ሳይቂ ሃይቄኔ፤ ዬያሮ ዔያቶኮ ጌርሲንሢ ዓላዜሬና ዒታማሬና ቄኤሴ ማዔኔ፤

3 ካኣቲ፡ ደውቲ ዓኣሮኔ ዜርፃ ዔያታ ማዳንዳ ማዶጉዲያ ጉዲያ ዲማ ዲማ ፓቂኔ፤ ዬያ ዒ ማዳሢ ዓላዜሬ ዜርሢ ማዔ፡ ሳዶቄና ዒታማሬና ዜርሢ ማዔ ዓቢሜሌኬ ዒዛ ማኣዴምኬ።

4 ዓላዜሬ ዜርፃ ባኣካፓ ዲቢ ሱኡጌ ማዓ ዓሲ ጴዴም ዒታማሬ ዜርፃ ባኣካ ሱኡጌ ማዓ ዓሲ ዳኬሢሮ ዓላዜሬ ዜርፃ ታጰ ላሆ ቤሲ ፓቂንቴኔ፤ ዒታማሬ ዜርፃ ጋዓንቴ ሳሊ ቤሲ ፓቂንቴኔ።

5 ዓላዜሬና ዒታማሬና ዜርፃ ይዳፓ ጌኤዠ ማኣሮኮ ቢታንቶ ዓኣ ሱኡጌንታ ያኣሲ ባኮ ማዳያኣ ዓኣያ ማዔሢሮ ማዶ ገሽኪንቴ ዒንገንታሢ ዒፃ ዓጊ ዲማሲሢናኬ።

6 ዓፃሢ ዔካኒ ቤርታዲ ዓላዜሬና ዒታማሬና ዜርፃ ምሊ ዓኣሢ ጌላኔ፤ ዬካፓ ሌዌ ዓሲ ማዔ፡ ፃኣፖ ባኮ ፃኣፓ፡ ናትናዔሌ ናኣዚ፡ ሹማዒያ ዔያቶኮ ሱንፃ ፃኣፓኔ፤ ዒማና ካኣቲንታ ቢታንታ ዓኣ ደንዠንታ ቄኤሳሢ ሳዶቂንታ ዓቢያታሬ ናኣዚ ዓቢሜሌኬንታ፤ ዬያጉዲ ሃሃ ቄኤሶና ሌዌ ማኣሮ ዓሶናኮ ሱኡጋኣ ቢያ ዬያ ማርካ ማዒ ዛጋኔ።

7-18 ለማታሚ ያይዶ ቤሲ ማዒ ዒፃሢ ዓጊ ፓቆና ማዶ ዓሳ ሃካፓ ሊካ ፓይዲንታ ጎይፃኬ፡-

ቤርታሳፃ ዪሆያሪቤ ዓሶም ኬሰኬኔ፤

ላምዓሳፃ ዪዳዒያ ዓሶም፡

ሃይሣሳፃ ሃሪሚ ዓሶም፡

ያይዳሳፃ ሴያሪሚ ዓሶም፡

ደንጋሳፃ ማልኪያ ዓሶም፡

ላሃሳፃ ሚያሚኔ ዓሶም፡

ላንካሶ ሃቆፃ ዓሶም፡

ሳላሶ ዓቢያ ዓሶም፡

ታዘጳሶ ዒያሱ ዓሶም፡

ታጳሶ ሹካኒያ ዓሶም፡

ታጳ ፔታሶ ዔሊያሺቤ ዓሶም፡

ታጳ ላምዓሶ ያቂሚ ዓሶም፡

ታጳ ሃይሣሶ ሁፖ ዓሶም፡

- ታጳ ያይዳሶ ዩሼብዓቤ ዓሶም፡
- ታጳ ዶንጋሶ ቢልጋ ዓሶም፡
- ታጳ ላሃሶ ዒማሬ ዓሶም፡
- ታጳ ላንካሶ ሄዚሬ ዓሶም፡
- ታጳ ሳላሶ ሃፕፃፃ ዓሶም፡
- ታጳ ታዘጳሶ ፔታህያ ዓሶም፡
- ላማታማሶይዳ ዩሄዝቄሌ ዓሶም፡
- ላማታሚ ፔታሶይዳ ያከኔ ዓሶም፡
- ላማታሚ ላምዓሶይዳ ጋሙሌ ዓሶም፡
- ላማታሚ ሃይሣሶይዳ ዴላያ ዓሶም፡
- ላማታሚ ያይዳሶይዳ ማዓዚያ ዓሶም ኬሰኬኔ።

19 ዩይ ዓሳ ናንጊና ናንጋ ጎዳ ማዔ ዒሰራዔኤሌኮ ያኦዛሢ ዔያቶኮ ቤርታ ዓዳሢ ዓኣሮኔ ዓይሢ ጎይፆና ጌኤዦ ማኣሪ ጌሊ ዲማ ዲማ ማዳ ማዳ ጎይፆ ያዲኬ።

ሃንጎ ዓቴ ለዊ ዓሶ ሱንፆ

20 ለዊ ዜርፆኮ ሃንጎ ዓቴ ማኣሮ ዓሶ ሱኡጎኮ ሱንፆ ሃካፓ ዴማ ፓይዲንታሢጉዴያኬ፡-

- 20 ሹባሌ ዓምራሜ ዜርሢኬ፡ ዩህዴያ ሹባሌ ዜርሢኬ፤
- 21 ዩሺያ ሬሃቢያ ዜርሢኬ፤
- 22 ሹሎሚቴ ዩፅሃሬ ዜርሢኬ፡ ያሃቴ ሹሎሚቴ ዜርሢኬ፤
- 23 ዩሪያ፡ ዓማሪያ፡ ያሂዚዔሌንታ ዩቃምዓሚንታ ኬብሮኦኔ ናኣቶኬ፤ ዔያቶኮ ሱንፆ ፃኣፒንቴሢ ሞሊ ሄሊ ሸይንቴ ጎይፆኬ።
- 24 ሚካ ዑዚዔኤሌ ዜርሢኬ፡ ሻሚሬ ሚካ ዜርሢኬ፤
- 25 ዛካሪያሴ ሚካኮ ጌርሲ፡ ዩሺያ ዛሎና ዑዚዔኤሌ ዜርሢኬ፤
- 26 ማሂለንታ ሙሺንታ ያዕዚያንታ ሜራሪ ዜርሢኬ፤
- 27 ያዕዚያኮ፡- ሸሃሜ፡ ዛኩሬንታ ዒብሬ ጌይንታ ሃይሃ ዓቴንቄ ናይ ዓኣኔ።

28-29 ማህሊኮ ዓላዜሬና ቂሼ ጌይንታ ላምፆ ዓቴንቄ ናይ ዓኣኔ፤ ዓላዜሬኮ ፔቴታፆ ዓቴንቄ ናይ ባኣሴ፤ ቂሼኮ ጋዓንቴ ዩራህሜዔኤሌ ጌይንታ ፔቴ ዓቴንቄ ናይ ዓኣኔ።

30 ሙሺኮ ማሂሊ፡ ዔዴሬና ያሪሞቴ ጌይንታ ሃይሃ ዓቴንቄ ናይ ዓኣኔ።

ዓካሪ ዩያታ ቢያ ለዊ ዜርፆ ማዔ ማኣሮ ዓሶኬ።

31 ፔቴ ፔቴ ማኣሮኮ ሱኡጎንታ ጌኤዛታኣ ዒሸንሢጉዲ ዩያኮ ቤርታ ዔያቶኮ ዒጊና፡ ዓኣሮኔ ናኣታ ማዳ ጎይፆማ ፔኤኮ ማዳ ማዳኒ ዒፃሢ ዓጋኔ፤ ዒማና ካኣቲ ዳውቴንታ ሳዶቄንታ ዓቤሜሌኬንታ

ቄኤሶንታ ለዌ ዓሶንታኮ ማአሮ ዓሶ ሱኡጋኦ ቢያ ማርካ ማዒ ዛጋንቱ ዲማሲ ዔሮ ባኮ ዔያታ ዓጋኔ።

25

ጌኤዠ ማአራ ጎዳም ዓይናዳ ዓሶ

1 ካአቲ፥ ዳውቲና ለዌ ዓሶኮ ሱኡጎና ማርጌ ሻሺ ዴንሢ ዋርቆ ጎኦሎንታ ፔቲ ሻሺ ዴንሢ ዋርቆ ጎኦሎንታ ዑኡቱቡላሢናአ ዓይናዳ ዓይናዳ ያኦሲ ማሊሢ ኬኤዛንዳጉዲ ዓሳአፔና ሄማኔና ዪዲቱና ማአራፓ ዓሲ ዶኦሪ ጌሣኔ፤ ዬያ ማዶ ማዳ ዓሶኮ ሱንፃ ሃካፓ ዴማ ፓይዲንታሢ ጉዳያኩ፡-

2 ዛኩሬ፥ ዮሴፔ፥ ኔታንያንታ ዓሳርዔኤሌ ጌይንታ ያይዶ ዓሳአፔ ናአቶኬ፤ ያኦሲ ማሊያ ኬኤዛሢ ዓሳአፔ ዔያቶኮ ሱኡጌ ማዓዛ ካአቲ ዓይሣ ዋዶማና ዋዶማና ዬያ ማዶ ዔያታ ማዳኔ።

3 ዪዲቱኔኮ ላሆ ዓቲንቆ ናአታ፡- ጌዳሊያ፥ ዪሪ፥ ያሻያ፥ ሺምዒ፥ ሃሻቢያና ማቲቶያ ጌይንታያኩ፤ ዔያታ ፔቲ ሻዠና ዴንሣ ጎኦሎ ዋርቁ ዋርቁ ዔያቶኮ ዓዳሢ ዔያቶኮ ሱኡጌ ማዓም ያኦሲ ዓያና ዔያቶም ዒንጋ ዓይኑም ዋይዚሲ ዋይዚሲ ናንጊና ናንጋ ጎዳ ዓይኑምና ቦንቺ ቦንቺ ጋላታ።

4 ሄሊሳዎ ሄማኔ ጎሦሢ ታጳ ያይዶ ዓቲንቁ ናይ ዓአያ ማዓዛ፥ ዔያታ፡- ቡቂያ፥ ማታኒያ፥ ዑዚዔኤሌ፥ ሺቡዔኤሌ፥ ያሪሞቲ፥ ሃናኒያ፥ ሃናኒ፥ ዔሊዓታ፥ ጌዳልቲ፥ ሮማሞቲዔዜሬ፥ ዮሸቤቃሻ፥ ማሎቲ፥ ሆቲሪና ማህዚዓቲንታኩ፤

5 ካአቲም ያኦሲ ማሊያ ኬኤዛ፥ ሄማኔም ዬንሢ ታጳ ያይዶ ዓቲንቆ ናአቶንሢንታ ቃሲ ሃሣ ሃይሣ ዉዲር ናይያኦ ያኦሲ ዒንጌኔ፤ ዬያ ያኦሲ ማዳሢ ሄማኔ ዴጊዲ ቦንቺሳኒ ቤርታ ኬኤዜ ቃኦሎ ጎይያናኩ።

6 ዓዛኮ ዓቲንቆ ናአታ ቢያ ጌኤዠ ማአሮይዳ ያኦሲ ካአሽኪንታ ካአዠ ዳምባ ኩንሢንታኦና ዔያቶኮ ዓዴ ሱኡጌ ማዓም ዑኡቱቡላሢ ዋቻኔ፥ ጎኦሎዋ ዋርቃኔ፤ ዓሳአፔንታ ዪዲቱንታ ሄማኔንታ ካአቲ ቢታንቶ ዴማ ማዒ ዬያ ማዶ ማዳኔ።

7 ዬንሢ ላማታም ያይዶ ዓሶንሢ ቢያ ኮሺ ዔኤቢ ዔራያኩ፤ ዬያጉዲ ሃሣ ዔያቶኮ ዒጊናኦ ያኦሲም ዓይናዶ ዓይኑም ዔራያ ማዓዛ ፓይዳ ዔያቶኮ ዋሊ ዑፃ ላምያ ዪኤታና ሳሊታሚ ሳሊኩ።

8 ዔያቶኮ ማዶ ማዶ ዴማሳኒ ዴጌያኦ ማዎም ጋርቺ፥ ዔርዛሢምታቲያ ዔርያይዳ ዓአሢም ያናኦ ፓቁዋዎ ዒፃ ዓጊንታ።

9 ዒፃሢ ጌርታሲ ዓሳኣፔ ዒጊናፓ ዮሴፔም ኬሰኬኔ፤ ዒዛንታ ዒዛኮ ናኣቶንታ ጌርሲንሢንታኮ ፓይዳ ዋሊ ዑፃ ታጾ ላምዖኬ፤ ላምዓሳ ጌዳሊያም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

10 ሃይሣሳ ዛኩሬም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዋሊ ዑፃ ታጾ ላምዖኬ።

11 ዖይዳሳ ዪፅሬም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

12 ዶንጋሳ ኔታንያም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ፤

13 ላሃሳ ቡቂያም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ፤

14 ለንካሳ ዓሳርዔኤሌም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ፤

15 ሳላሳ ያሻዕያም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

16 ታዘጸሳ ማታኒያም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ፤

17 ታጸሳ ሽምዒም ኬሰኬኔ፤ ዒዛንታ ዒዛኮ ናኣቶንታ ጌርሲንሢንታኮ ፓይዳ ዋሊ ዑፃ ታጾ ላምዖኬ፤

18 ታጾ ፔታሳ ዓዛርዔኤሌም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

19 ታጾ ላምዓሶ ሃሻቢያሜም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ፤

20 ታጾ ሃይሣሳ ሹባዔሌም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

21 ታጾ ዖይዳሳ ማታትያም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

22 ታጾ ዶንጋሳ ያሪሞቴም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

23 ታጾ ላሃሳ ሃናንም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

24 ታጾ ለንካሳ ዮሸቤቃሽም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

25 ታጾ ሳላሶ ሃናንም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ፤

26 ታጾ ታዞጸሶ ማሎቲም ኬሰኬኔ፤ ዒዛንታ ዒዛኮ ገርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

27 ላማታማሶ ዔሊዓታም ኬሰኬኔ፤ ዒዛንታ ዒዛኮ ገርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

28 ላማታሚ ፔታሶ ሆቲሬም ኬሰኬኔ፤ ዒዛንታ ዒዛኮ ገርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

29 ላማታሚ ላምዓሳ ጊዴልቲም ኬሰኬኔ፤ ዒዛንታ ዒዛኮ ገርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

30 ላማታሚ ሃይሣሶ ማህዚዖቲም ኬሰኬኔ፤ ዒዛንታ ዒዛኮ ገርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

31 ላማታሚ ዖይዳሳ ሮሚምቲዔዜሬም ኬሰኬኔ፤ ዒዛንታ ዒዛኮ ገርሲንሢንታ ናኣቶንታ ፓይዳ ዋሊ ዑፃ ታጾ ላምዖኬ።

26

ጌኤዠ ማኣር ካፓ ዓሶ

1 ጌኤዠ ማኣር ካፓያ ማዔ ለዊ ዓሶኮ ማዳ ዓርቂንቲሢ ሃካፓ ዴማ ዓኣ ጎይዖኬ፤ ቆራሄ ቶኦኮኮ ዓሳኣፔ ማኣራፓ ቆኦሬ ናኣዚ፤ ማሱላሚኬ።

2 ዒዛኮ ለንካይ ዓቲንቄ ናይ ዓኣኔ፤ ዔያታ ዋሊ ሄሊ ሄሊ ሾይንቲ ጎይዖና፡- ዛካሪያሴ፤ ዱዲዕዔኤሌ፤ ዛባድያ፤ ያትኒዔኤሌ፤

3 ዔላኣሜ፤ ዩሆሃናኔንታ ዔልዩሆዔናዩ ጌይንታኔ።

4 ማሌ ሃሣ ሳሊ ዓቲንቄ ናይ ዒንጊ ያኦሲ ዓንጃ፤ ዖቤድዔዶኦሚ ጌይንታ ፔቲ ዓሲ ዓኣኔ፤ ዒዛ ናኣታ ዋሊ ሄሊ ሾይንቲ ጎይዖና፡- ሹማዒያ፤ ዩሆዛባዴ፤ ዮዓሄ፤ ሳካሬ፤ ናትናዔኤሌ፤

5 ዓሚዔኤሌ፤ ዩሳኮኦሬና ፔዑሌታዩ ጌይንታያኬ።

6-7 ሃሣ ዖቤድዔዶኦሚኮ ናኣዚ ቶይዲ፤ ሹማዒያኮ ላሆ ዓቲንቄ ናይ ዓኣኔ፤ ዩንሢ፡- ያትኒ፤ ሬፓዔኤሌ፤ ዖቤዴ፤ ዔልዛባዴ፤ ዔሊሁና ሳማክያናኬ፤ ዔያቶኮ ዴኤፔ ዔራቶ ዓኣሢር ዔያቶ ዓድ ማኣር ዓሶኮ ዔያታ ሱኡጎኬ።

8 ዓካሪ ዩያታ ቢያ ዖቤድዔዶኦሚ ዜርዖ ማዓዛ ዔያቶንታ ዔያቶኮ ዓቲንቆ ናኣቶንታ፤ ሃሣ ዔያቶኮ ዒጊና ማዶ ማዳኒ ጊዳ ዔራቶ ዓኣያኬ፤ ዒዛ ዜርዖ ዋሊ ዑፃ ላሂታሚ ላምዖኬ።

9 ማሱላሚኮ ማዶ ማዳኒ ዔራቶ ዓኣ ታጾ ሳሊ ዓቲንቄ ናይንታ ገርሲንሢንታ ዓኣኔ።

26:5 2ሳሙ. 6:11፤ 1ዮኦሲ. ዓሃኬ 13:14።

10 ሜራሪ ቶኦካፓ ያይዶ ዓቲንቄ ናይ ዓኣ፡ ሆሳ ጌይንታ ዓሲ ዓኣኔ፤ ዬያ ናኣቶኮ ሱኡጋሢ ሽምሪኬ፤ ዒዚ ቶይዶ ናዖቲዋቲያ ዓዴ ዒዛ ሱኡጌ ማሄኔ፤ ዔያታ፡- ሽምሪ፡

11 ሂልቂያ፡ ዪባልያና ዛካሪያሴ ጎያያኬ፤ ዬያ ሆሳኮ ማኣሮ ዓሶይዳፓ ጌኤዠ ማኣሮ ካፓያ ማዔዘንሢ ዋሊ ዑፃ ታጶ ሃይሆ ዓሲኬ።

12 ጌኤዠ ማኣሮ ካፓ ዓሳ ፔ ማኣሮ ዓሶ ሱኡጎኮ ዴማ ዴማ ማዒ ፓቂንቲ ፓቂንቲ ዔያታ ሃንጎ ሌዊ ዓሶጉዲ ጌኤዠ ማኣሮ ማዶ ማዶ ማዳኔ።

13 ዋዚጉዲ ዔያታ ሚርጌቲያ ፔቲ ፔቲ ማኣሮ ዓሳ ዋኖ ዛሎ ማርሾ ካሮ ካፓቲያ ዔራኒ፡ ዳጌ ማዔቲያ ጋርቺ ጎዑዋፖ ጉቤሢም ዒፃሢ ዓጋኔ፤

14 ዓባ ኬሰካ ዛሎና ዓኣ ማርሾ ካሮ ካፒያኮ ዒፃሢ ሴሌሚያም ኬሰኬ፤ ሂሊሳፖ ቢያ ዋዴና ኮሺ ዞሮ ዞራ ዒዛኮ ናኣዚ ዛካሪያሴም ኬዶ ዛሎና ዓኣ ማርሾ ካሮ ካፓንዳጉዲ ዒፃሢ ኬሰኬ፤

15 ያቤድዔዶአማ ዶኦሎ ዛሎና ዓኣ ማርሾ ካሮ ካፓንዳጉዲ ዲማሲ ዔሮ ባካ ኬሰካዛ፡ ማሆ ጌሆ ማኣሮ ካፓንዳጉዲ ዒዛኮ ናኣቶም ዒፃሢ ኬሰኬ።

16 ሹፒሜና ሆሳናም ዓባ ጌላ ዛሎና ዓኣ ማርሾ ካሮና ኬዶ ጎይፖ ዛሎና ዓኣ ሻሌኬቲ ጌይንታ ማርሾ ካሮ ካፓንዳጉዲ ዒፃሢ ዔያቶም ኬሰኬ፤ ዬይ ማርሾ ካሮ ካፒያ ማዶ ዋሊ ሂሊ ሂሊ ፔ ዋዴና ዋዴና ፓቂንቲያኬ፤

17 ዬያሮ ቢያ ኬሊ ዓባ ጌላ ዛሎና ላሆ፡ ኬዶ ዛሎና ያይዶ፡ ዶኦሎ ዛሎናኣ ያይዶ ካፓ ዓሲ ዔቃኔ፤ ዬያጉዲ ሃሃ ቢያ ኬላ ያይዶ ካፓ ዓሲ ማሆ ጌሆ ማኣሮ ካፓንዳጉዲ ጎፖዛ ዔያቶይዳፓ ላምዓሢ ፔቲ ማሆ ጌሆ ማኣሮ፡ ዓቲ ላምፖንሢ ሃሃ ባጎ ማኣሮ ካፓኔ።

18 ዓባ ጌላ ዛሎና ጎይፖ ሂሊሲ ኮሺንቲ ዓሳ ቡካ ቤዞ ኮይላ ያይዶ ካፓ ዓሲ ጌሆዛ፡ ዬኖ ቤዜሎ ካፓ ላምፖ ዓሲ ዓኣኔ።

19 ቆራሄና ሜራሪ ቶኦኮናም ማርሾ ካሮ ካፓንዳጉዲ ጊሽኪንቲሢ ያዲዲኬ።

ሃንጎ ሌዊ ዓሳ ጌኤዠ ማኣሮ ማዶ ማዶ

20 ሌዊ ዓሶይዳፓ ዓኪያ ጎፖሢ ጌኤዠ ማኣሮኮ ማሆ ጌሆ ማኣሮንታ ያኦሲም ዲማዴያ ማዔ ዒንጊንታ ባኮ ጌሆ ማኣሮኮ ሱኡጌኬ፤

21 ጌርሾኔ ናኣታፓ ፔቲሢ ማዔ፡ ላዒዳኔ ፔኤኮ ናኣዚ ዪሂዔኤሌ ማኣሮ ዓሶንታ ዲማ ዲማ ማኣሮ ዓሶ ዒጊኖኮ ሱኡጌኬ፤

22 ዩሃዔኤሌኮን ዓቲንቆ ናኣታ፡- ዜታሚና ጌርሲ ዒዮዔኤሌናኬ።
ዩንሢ ጌኤዡ ማኣሮኮ ፃኣፒ ዓርቆ ባኮንታ ሜሆ ጌሆ ማኣሮንታኮ
ሱኡጎንሢ።

23 ዬይ ያዲ ማዓዛ ዓምራሚ፡ ዪፅሃሬንታ ኩብሮኦኔንታ
ዑዚዔኤሌንታ ዜርዖማኣ ዔያታ ማዳንዳ ማዶ ዒንገንቴኔ።

24 ሙሴ ናኣዚ ጌርሾኔ ቶኦኪ ማዔ ሼቡዔኤሌ ጌኤዡ ማኣሮ
ሜሆ ጌሆ ማኣሮኮ ሱኡጎኮ ዑዖ ሱኡጋሢ።

25 ዒዚያ ጌርሾሚኮ ጌርሲ፡ ዔሊዔኤሌ ዛሎና ሼሎሚቴኮ ዑኩ
ዒገኒኬ፤ ዬይ ዔሊዔኤሌ ሬሃቢያ፡ ሬሃቢያ ዪሻዕያ፡ ዪሻዕያ ዮራሚ፡
ዮራሚ ዚክሪ፡ ዚክሪያ ሼሎሚቴ ሾዔኔ፤

26 ሼሎሚቴንታ ዒዛኮ ዒገኖንታ ካኣቲ ዳውቴንታ ዒዛ ማኣሮ
ዓሶኮ ሱኡጎንታ፡ ገንሣ ሃሣ ዒዛ ቶኦኮኮ ዲማ ዳማ ያሎ ዓሶ ሱኡጋ፡
ዖኦሲም ዲማዲያ ማሂ ዒንጎ ባኮኮዋ ሱኡጌኬ፤

27 ዩንሢ ሱኡጎንሢ ያሎ ዋዶና ዔያታ ዲዒ ዔካ ባኮይዳፓ ፓቂ
ጌኤዡ ማኣራ ማዲንታንዳጉዲ ናንገና ናንጋ ጎዳም ዲማሳኔ።

28 ሼሎሚቴና ዒዛኮ ዒገኖና ጌኤዡ ማኣሮ ማዶም ዲማዲ ባኮ
ቢያ፡ ዖኦሲ ማሊያ ከኤዛሢ ሳሙዔኤሌንታ ካኣቲ ሳኦዖኤሌንታ ኔሪ
ናኣዚ ዓቤኔሬና ፃሩያ ናኣዚ ዒዮዓቤ ዒንጌ ባኮንታኮ ሱኡጌ ማዔኔ።

ሃሣ ዓቲ ሌዋ ዓሳ ማዳ ማዶ

29 ዪፅሃሬ ዜርዖ ባኣካፓ ኬናንያንታ ዒዛኮ ናኣቶንታ ጌኤዡ
ማኣራቴዋንቴ ዙላ ዓሲ ዋይሥሢና ዒሰራዔኤሌ ዳሮ ባኣካ ኬሰካ
ዓይጎ ባኣዚ ማዔቴያ ዔያታ ዛገ ጌሰታኒ ሱኡጌ ማዒ ጌሢንቴኔ።

30 ኩብሮኦኔና ሃሻቢያ ዜርዖናይዳፓ ዛላ፤ ዬያጉዲ ሃሣ ደዲ
ዔርቴያ ማዔ፡ ፔቴ ሺያና ላንካይ ፃኤታ ማዓ ሃሻቢያንታ ዒገኖንታ
ዮርዳኖሴ ዋሮኮ ዓባ ኬሰካ ዛሎና ዓኣ ዒሰራዔኤሌ ዳሮኮ ዖኦሲ
ማዲንታ ካኣቲም ማዲንታ ማዶኮዋ ቢያ ሱኡጌኬ።

31 ኩብሮኦኔ ዜርዖኮ ሾይንቶ ሃይጎ ፃኣፒንጉቲ ዓኣ ጎይዖና ሱኡጋሢ
ዪሪያኬ፤ ዳውቴ ካኣታዲንቴ ያይዲታማጎ ሊዖና ሃይሶ ፃኣፒ ዓርቆ
ቤዛ ዛጎንቴ ጌሌዓዳይዳ ያዕዜሬ ጌይንታ ቤዛ ናንጋ ማኣሮ
ዓሶይዳፓ ዔርቴያ ማዓ ፖኦሊሴ ጴዴኔ፤

32 ዓማና ካኣቲ ዳውቴ ዩንሢ ዒዛኮ ዒገኖንሢዳፓ ዔርቴያ
ማዓ ላምዖ ሺያና ላንካይ ፃኤታ ዓሲ ሱኡጌ ማሂ ደኦሬኔ፤ ዬያ
ሌሊቴዋንቴ ዳውቴ ዮርዳኖሴ ዋሮኮ ዓባ ኬሰካ ዛሎና ጌይዖ
ሮኦኤሌንታ ጋኣዲንታ ሚናኦሴ ዓጮንታይዳፓ ዖኦሲ ማዶና ዓጮ
ዋይሢያናኮ ቢያ ሱኡጌ ዔያቶ ማሂ ጌሢኔ።

27

ዳውቱ ያሎ ዓሶኩ ሱኡጎ ደኦሪህ

1 ሃካፓ ደማ ዓኣዘንህ ሲሰራዔኤሌ ዓሶኩ ማኦር ዓሶ ሱኡጎንታ ደማ ደማ ቶኦኩ ወይህ ዓሶንታ፤ ዬያጉዲ ሃሃ ካኣቲኩ ማዶ ማዶ ቢታንታ ዓኣ ዓሶኩ ሱንፃ ዋሊ ሄሊ ፃኣፒንቲኔ፤ ዬይያ፡- ሌዖ ጋራ ዓኣ ፔቲ ፔቲ ዓገኖይዳ ላማታሚ ያይዶ ሺያ ዓሲ ዋሊ ዑፃ ማዒ ማዳንዳጉዲ ፓቂንቲያ ማዓዛ ዬያ ደማ ደማ ፓቂንቲ ዓሶኩ ሱኡጌ ዓኣኔ።

2-15 ፔቲ ፔቲ ዓገኖይዳ ዬያ ዋሊ ዑፃ ማሆና ዓሶኩ ሱኡጌ ማዒ ዓሶኩ ሱንፃ ሃካፓ ደማ ፓይዲንቲህ ጎይያኬ፤ ቤርታሳ ዓገኖይዳ ቤርታሲ ፓቂንቲ ፖኦሊሶኩ ሱኡጌ ማዒህ ዛብዲዔኤሌ ናኣዚ ያሹብዓሜኬ፤ ዒዛ ደማ ማዒም ዒ ዓይህ ወይህ ፖኦሊሳ ላማታሚ ያይዶ ሺያኬ፤ ዒዚያ ዪሁዳ ዓገኖ ዛላፓ ማዒ ፓርሴ ቶኦኪኬ።

ላምዓሳ ዓገኖና ላምዓሲ ፓቂንቲ ፖኦሊሶኩ ሱኡጋህ ዓሆሄ ዓህ ደዳዬኬ፤ ዒዛ ደማ ማዒም ዒ ዓይህ ወይህ ፖኦሊሳ ላማታሚ ያይዶ ሺያኬ።

ዒዛኩ ደማ ማዒ ዓይህህ ሚቅሎቲ ጎሮህኬ። ሃይህሳ ዓገኖና ሃይህሲ ፓቂንቲ ፖኦሊሶኩ ሱኡጋህ፡- ቁኤሳህ፤ ዮዳሄ ናኣዚ ቤናያኬ፤ ዒዛ ደማ ማዒም ዒ ዓይህ ወይህ ፖኦሊሳ ላማታሚ ያይዶ ሺያኬ፤ ዬይ ቤናያ ሃይህታሚ ያሎና ዔርቲ ፖኦሊሶኩ ዑፃ ዔርቲያ ማዒ ሱኡጌ ማዒያኬ። ዒማና ዒዛኩ ናኣዚ ዒዛኩ ደማ ማዒ ዓይህኔ።

ያይዳሳ ዓገኖና ያይዳሶ ፓቂንቲ ፖኦሊሶኩ ሱኡጋህ፡- ዒዮዓቤ ፔርሲ ዓሳሄሌኬ። ዬካፓ ዒዛ ቤዘይዳ ዒዛኩ ናኣዚ ዜባድያ ዬያ ፖኦሊሶኩ ሱኡጋህ ማዒኔ፤ ዒዛ ደማ ማዒም ዒ ዓይህ ፖኦሊሳ ላማታሚ ያይዶ ሺያኬ።

ደንጋሳ ዓገኖና ደንጋሶ ፓቂንቲ ፖኦሊሶኩ ሱኡጋህ፡- ዪፀሃሬ ዓህ ሽምሁቲኬ፤ ዒዛ ደማ ማዒም ዒ ዓይህ ፖኦሊሳ ላማታሚ ያይዶ ሺያኬ።

ላሃሳ ዓገኖና ላሃሶ ፓቂንቲ ፖኦሊሶኩ ሱኡጋህ ቴቆዓ ዓህ ዒቁሽ ናኣዚ ዒራራኬ፤ ዒዛ ደማ ማዒም ዒ ዓይህ ፖኦሊሳ ላማታሚ ያይዶ ሺያኬ።

ላንካሳ ዓገኖና ላንካሶ ፓቂንቲ ፖኦሊሶኩ ሱኡጋህ፡- ዔፕሬኤሜ ፃጳፓ ፔሎ ዓህ፤ ሄሌፃኬ፤ ዒዛ ደማ ማዒም ዒ ዓይህ ፖኦሊሳ ላማታሚ ያይዶ ሺያኬ።

ሳላሳ ዓገኖና ሳላሶ ፓቂንቴ ፖኦሊሶኮ ሱኡጋሢ፡- ሁሻ ዓሢ፡ ሲቤካዬኬ፤ ዒዚያ ዪሁዳ ፃጶኮ ዛራ ዜርፃፓጤ፤ ዒዛ ዴማ ማዔም ዒ ዓይሣ ፖኦሊሳ ላማታሚ ያይዶ ሺያኬ።

ታዘጸሳ ዓገኖና ታዘጸሶ ፓቂንቴ ፖኦሊሶኮ ሱኡጋሢ፡- ዓናቶቴ ዓሢ ዓቤዔዜሬኬ፤ ዒዛ ዴማ ማዔም ዒ ዓይሣ ፖኦሊሳ ላማታሚ ያይዶ ሺያኬ።

ታጸሳ ዓገኖና ታጸሶ ፓቂንቴ ፖኦሊሶኮ ሱኡጋሢ፡- ዛራ ፃጶፓ ኔፃፓ ዓሢ ማሂራዬኬ፤ ዒዛ ዴማ ማዔም ዒ ዓይሣ ፖኦሊሳ ላማታሚ ያይዶ ሺያኬ።

ታጶ ፔታሳ ዓገኖና ታጶ ፔታሶ ፓቂንቴ ፖኦሊሶኮ ሱኡጋሢ፡- ዔፕሬኤሜ ፃጶ ዓጮኮ ፒርቶኔ ዓጮ ሾይንቴ፥ ቤናያኬ፤ ዒዛ ዴማ ማዔም ዒ ዓይሣ ፖኦሊሳ ላማታሚ ያይዶ ሺያኬ።

ታጶ ላምዓሳ ዓገኖና ታጶ ላምዓሶ ፓቂንቴ ፖኦሊሶኮ ሱኡጋሢ፡- ፆትኒዔኤሌ ቶኦኪ ማዔ ኔፃፓ ዓሢ፡ ሄልዳዬኬ፤ ዒዛ ዴማ ማዔ ዒ ዓይሣ ፖኦሊሳ ላማታሚ ያይዶ ሺያኬ።

ዳውቴ ዒሰራዔኤሌ ዓሶ ፃጶ ሱኡጎ ዶኦሬሢ

16-22 ዒሰራዔኤሌ ዓሶ ዎይሣ ሱኡጎ ሱንፃ ሃይካፓ ዴማ ዎሊ ጊንፃ ፓይዲጎታ ጎይፃፕዲኬ፡-

ሮኦቤኤሌ ፃጶ ዎይሣሢ፡- ዚክሪ ናኣዚ ዔሊዔዜሬኬ፤

ሲሞኦኔ ፃጶ፡- ማዕካ ናኣዚ ሺፓፂያ፡

ሌዊ ፃጶ፡- ቄሙዔሌ ናኣዚ ሃሻቢያ፡

ዓኣሮኔ ፃጶ፡- ሳዶቄ፡

ዪሁዳ ፃጶ፡- ካኦቴ፡ ዳውቴ ጌርሲንሢፓ ፔቴሢ ማዔ ዔሊሁ፡

ዪሳኮኦሬ ፃጶ፡- ሚካዔኤሌ ናኣዚ ያሞሪ፡

ዛብሎኦኔ ፃጶ፡- ዓዲዩ ናኣዚ ዩሽማዕያ፡

ኒፕታኣሌኤሜ ፃጶ፡- ዓዘሪዔሌ ናኣዚ ያሪሞቴ፡

ዔፕሬኤሜ ፃጶ፡- ዓዛዝያ ናኣዚ ሆሴዔ፡

ዓባ ጌላ ዛሎና ዓኣ ሚናኣሴ ፃጶ፡- ፔዳያ ናኣዚ ዒዮዔሌ፡

ዓባ ኬሰካ ዛሎና ዓኣ ሚናኣሴ ፃጶ፡- ዛካሪያሴ ናኣዚ ዩዶ፡

ቢኢኒያሜ ፃጶ፡- ዓቤኔሬ ናኣዚ ያዕሲዔኤሌ፡

ዳኣኔ ፃጶ፡- ዪሮሃሚ ናኣዚ ዓዛርዔሌ ዎይሣያ ማዔኔ።

23 ናንጊና ናንጋ ጎዳ፡- «ታኣኒ ዒሰራዔኤሌ ዴሮ ጫሪንጮ ዡኦጋሢፓዲ ሚርጊሻንዳኔ» ጌዒ ኬኤዜ ሃጊ ማዓንዳ ዎዘ ቋኣሎፕዲ ካኦቴ፡ ዳውቴ ሌዓ ላማታሚ ማዔያና ዩካፓ ዴማ ማዔ ዓሶ ፓይዳ ዎዶና ዎላ ፓይዲባኣሴ፤

27:23 ማዢ. ማፃ 15:5፤ 22:17፤ 26:4።

24 ጭሩና ናኣዚ፡ ዒዮዓቤ ዴሮ ገይዲ ጋፒሱዋየ ጎይፃ ሃሼኔ፤ ያሱሲ ዬያ ገይዲያሮ ዳጋዲ ዒሰራዔኤሌ ዴሮይዳ ሃይቢ ሄሊሴሢረ ዬይ ገይዲ ካኣቲ ዳውቲ ሃይሳ ፃኣፒንታ ማዘጋባ ፃኣፒንቲባኣሴ።

ካኣቲዋ ማኣራ ዓኣ ሜሆ ዛጊ ዋይሃ ዓሶ

25-31 ካኣቲዋ ማኣሮይዳ ዓኣ ሜሆ ዛጊ ዋይሃያ ማዔ ዓሶኮ ሱንፃ ዋሊ ጊንፆ ሃካፓ ዴማ ዓኣ ጎይፆኮ፡-

ካኣቲዋ ማኣሮይዳ ሜሆ ጌሦ ማኣሮኮ ሱኡጋሢ ዓዲዔኤሌ ናኣዚ ዓዝማቁቲኮ፤

ካታዋይዳ፣ ካታዋኮኮ ዙሎይዳ፣ ዲማ ዲማ ጉርዶይዳ፣ ዋርዲዮ ቤዘይዳ ዓኣ ካኣቲኮ ሜሆ ጌሦ ማኣሮ ሱኡጋሢ፡- ዑዚያ ናኣዚ ዮናታኣኔኮ፤

ጎዡ ጎሽካ ዓሶ ሱኡጋሢ፡- ካሉቤ ናኣዚ ዔዝሪኮ፤

ዋይኖ ጎዡ ሱኡጋሢ፡- ራማይዳ ሾይንቲ፣ ሺምዒኮ፤

ዋይኖ ዑዡ ጌሦ ማኣሮ ሱኡጋሢ፡- ሼፓሜይዳ ሾይንቲ ዛብዲኮ፤

ደኣሎ ዛሎ ጌሜሮይዳ ዓኣ ሪሚቶንታ ቦኦ ሚፆንታ ሱኡጌ ማዒ

ዛጋሢ ጌዴሪይዳ ሾይንቲ ባዓልሃናኔኮ፤

ሪሚቶ ዛይቶ ጌሦ ማኣሮ ሱኡጌ ማዒ ዛጋሢ፡- ዒዮዓሴኮ፤

ሳኣሮኣኔ ቦኣሎይዳ ዓኣ ባኣቶ ሱኡጌ ማዒ ዛጋሢ፡- ሳኣሮኣኔይዳ

ሾይንቲ ሺፀሪዬኮ፤

ደኣጮይዳ ዓኣ ባኣቶ ሱኡጌ ማዒ ዛጋሢ፡- ዓድላዬ ናኣዚ ሻፓፃኮ፤

ሱኡጌ ማዒ ጋኣላሢ ዛጋሢ፡- ዒሰማዔኤሌይዳ ሾይንቲ ያቢሌኮ፤

ሱኡጌ ማዒ ሃሮ ዛጋሢ፡- ሜሮኖቲይዳ ሾይንቲ ዬህዲያኮ፤

ማራቶና ዋኣሮና ሱኡጌ ማዒ ዛጋሢ፡- ሃግራ ዓሢ ያዚዜኮ።

ዳውቲ ዘራ ዓሶ

32 ካኣቲ ዳውቲኮ ዓቤ፣ ዮናታኣኔ ዘሮና ጨንጫ ሃሣ ዔራ ዓሲኮ፤ ዒዛና ሃኪሞኔ ናኣዚ ዪሂዔኤሌና ካኣቲኮ ናኣቶ ዔርዛዘንሢኮ፤

33 ዓኪያፕሌ ካኣቲ ዘራ ደንዛሢ ማዓዛ ዓርካይዳ ሾይንቲ፣ ሁሻዬ ካኣቲኮ ላጌኮ፤

34 ዓኪያፕሌ ሃይቁሰካፓ ዓቢያታሪና ቤናያ ናኣዚ፣ ዪሆያደዔና ካኣቲ ዘራዘንሢ ማዔኔ፤ ዒዮዓቤ ካኣቲኮ ያሎ ዓሶ ዓይሣ ሱኡጋሢ ማዔኔ።

28

ዳውቲ ጌኤዡ ማኣሮ ማዡኒ ማሌሢ

27:24 2ሳሙ. 24:1-15፤ 1ያሱሲ. ዓሃኬ 21:1-14።

1 ካኣቲ ዳውቴ ዒሰራዔኤሌ ዓሶኮ ቢታ ዓቱዋዎ ዬሩሳላሜ ሙኪ ቡካንዳጉዲ ዔኤሊሢ ዳኤሢሮ ፔቴ ፔቴ ፃጵኮ ሱኡጋ፣ ዓጮይዳ ማደ ማደ ቢቶ ዓሳ፣ ዲማ ዲማ ቶኦኮኮ ሱኡጋ፣ ካኣቲንታ ዒዛኮ ዓቲንቆ ናኣቶንታኮ ዓኣ ባኮና ባኣቶዋ ሱኡጋ ማዒ ዛጋ ዓሳ፤ ዬያጉዲ ሃሣ ካኣቱሞ ማኣሮኮ ደንዛ፣ ደዲ ማዒ ያሎና ዔርቴ ዓሳ ጉቤ ሙኪ ቡኤኔ።

2 ዓሳ ቢያ ቡኪንቴሰካፓ ዳውቴ ዔቃዎ፡- «ዒንሢ ሃይ ታ ዒጊኖንታ ታ ዓጮ ዓሳ! ሂንዳ ዋይዙዋቴ፤ ናንጊና ናንጋ ጎዳኮ ጫኣቁሞ ሳኣዲና ጌሦንዶ ቤሰንታ ኑ ያኦዛሢኮ ቶኪ ሄርቃንዳ ማኣሪያ ማኸኒ ማኸንዶ ጎይዎ ታኣኒ ጊኢጊሺ ማሌኔ፤

3 ጋዓንቴ ያልዚና ማርጌ ሱጉሢ ታ ላኣሌሢሮ ታኣኒ ዒዛኮ ጌኤዦ ማኣሮ ማኸንዳጉዲ ያኦሲ ኮዒባኣሴ፤

4 ናንጊና ናንጋ ጎዳ ማዔ ዒሰራዔኤሌኮ ያኦዛሢ ዪሁዳ ፃጵ፡ ዒሰራዔኤሌ ዓሶይዳ ሱኡጋ ማሂ ደኦሬኔ፤ ሃሣ ዪሁዳ ፃጵፓ ታ ማኣሮ ዓሶ፡ ታ ማኣሮ ዓሶይዳፓ ታና ዒሰራዔኤሌ ዓሶኮ ካኣቲ ማሂ ደኦራዎ ታ ዜርፃ ካኣቶ ማዒ ዋይሣንዳሢ ታኣም ዒ ጫኣቄኔ።

5 ዬያ ሌሊቱዋንቴ ዒ ታኣም ማርጌ ዓቲንቁ ናይ ዒንጌኔ፤ ዔያቶ ባኣካፓ ካኣቱሞ ዓልጋ ዳዒ ዒሰራዔኤሌይዳ ካኣታዳንዳጉዲ ታ ናኣዚ፣ ሴሎሞኔ ደኦሬኔ።

6 «ቃሲ ሃሣ ናንጊና ናንጋ ጎዳ ታኣም ከኤዛዎ፡- ታኣም ጌኤዦ ማኣሮ ማኸንዳሢ ኔ ናኣዚ ሴሎሞኔከ፤ ታ ዒዛ ታኣኮ ናይ ማሃንዳኔ፤ ታኣ ዒዛኮ ዓደ ማዓንዳኔ፤

7 ዒዚ ሃሣ ማዳ ጎይዎ ቢያ ዋዴ ታ ዋጎና ታኣኮ ዓይሢዎ ዛጊ ማዲ ከንሣያ ማዔቴ ዒዛኮ ካኣቱሞ ናንጊና ታ ዒዛም ደዲሻንዳኔ ጌዔኔ።

8 «ሃሢያ ታ ዓሲኖቴ! ያኦሲ ዋይዛንቴ፤ ያኦሲ ደኦሬ ዒሰራዔኤሌ ዓሳኣ ዛጋንቴ ናንጊና ናንጋ ጎዳ ማዔ ኑ ያኦዛሢ ኑና ዓይሢ ባኮ ቢያ ዛጊ ማዲ ዒንሢ ከንሣንዳጉዲ ታ ዒንሢ ሸኢቃኔ፤ ዬያ ዒንሢ ማደቴ ሃኖ ኮዦ ዓጩሎ ናንጊና ዒንሢ ዓጩ ማሃንዳኔ፤ ሃሣ ጊንፃፓ ሙካ ሸይንቶማኣ ዒንሢ ዳካልሳኒ ዳንዳዓኔ» ጌዔኔ።

9 ዬካፓ ዳውቴ ሴሎሞኔ ኮራ፡- «ታ ናዓሢኖ! ያኦሲ ዓሲኮ ዒኔ ቢያ ዛጋያ፡ ማሊዎዋ ቢያ ዔራሢሮ ኔ ዓደ ያኦዛሢ ዔሬ፤ ዒዚ ኦኡኮ ማሊዎና ኑ ኮዓ ባኮ ቢያ ዔራኔ፤ ዬያሮ ኔ ጉቤ ዒናፓ ኮሺ ማሊሢና ዒዛም ማዳንዳጉዲ ታ ኔኤም ጋዓኔ፤ ዒዛ ኔ ኮዓያ ማዔቴ ኔ ዒዛ ዴንቃንዳኔ፤ ጋዓንቴ ዒዛ ኔ ሃሺቴ ዒዚያ ኔና ናንጊና ሃሻንዳኔ።

28:7 2ሳሙ. 7:1-6፤ 1ያሕሲ. ዓሃኬ 17:1-14።

10 ዒዛም ኔ ጌኤዡ ማኣሮ ማዡንዳጉዲ ናንጊና ናንጋ ጎዳ ኔና ደኣሬሢ ዋሊፖ፤ ደዲ ጩርቁ ዒናፓ ማዴ» ጌዔኔ።

11 ሄሊሳዖ ሃሣ ዳውቴ ሴሎሞኔም ጌኤዡ ማኣሮኮ ማሆ ጌሃ ማኣሮ፣ ዋሊ ዑፃ ዑፃ ማዡና ኩቦ ማኣሮና ጋሮ ቆልዖንታ፤ ዬያጉዲ ሃሣ ጎሞ ጌኤሾ፣ ዑሣ ዓኣዴ ጌኤዡ ማኣሮ ማዡንዳጉዲ ጎይዖ ኬኤዚ ዒንጌኔ፤

12 ዬያ ሌሊቱዋንቴ ጌኤዡ ማኣሮኮ ዓሳ ቡከንታንዳ ጸኣኮንታ ኮይላ ዓኣ ቆልዖንታ ጌኤዡ ማኣሮ ማሆንታ ናንጊና ናንጋ ጎዳም ዒንጊንታ ባኮ ጌሃ ማኣሮ ቢያ ዒ ዋማይዲ ማዡንዳጉ ማሌቴያ ዓኣ ማሊዖዋ ኬኤዚ ዒንጌኔ።

13 ዬያጉዲ ሃሣ ዳውቴ ቁኤሶና ሌዊ ዓሶና ማዴንዳ ባኮ፣ ጌኤዡ ማኣሮይዳ ዔያታ ማዴንዳ ማዴና ያኣሲ ካኣዡ ማዴም ማዓ ማሆ ኮሺ ዓርቆንዳ ጎይዖ ማሊዖዋ ሴሎሞኔም ኬኤዜኔ።

14 ዲማ ዲማ ማዴም ማዓ ማሆ ኮሺሢም ማዓንዳጉዲ ቢሮ ዓንጎንታ ዋርቆንታኮ ሚርጉማ ዴኤሠሞ ዔሮ ባኮና ዋማዲ ማዓኒ ኮይሳቴ ኬኤዜኔ፤

15 ፔቴ ፔቴ ፖዖ ጌሃ ሻርኖም ማዓ ዋርቆንታ ፖዖ ጌሃ ሻርኖም ማዓ ቢሮ ዓንጎንታ ዴኤሠሞ ዔሮ ባኮና ዋማዲ ማዓኒ ኮይሳቴያ ኬኤዜኔ።

16 ቢሮ ዓንጎና ኮሺንታ ሎኣዡ ዖይቶም፣ ያኣሲም ዒንጊንታ ዲማዴ ካሃ ጌሃ ዋርቆ ጋባደንታ፤

17 ሃይሃ ኬኤሎ ሲልጳሢንታ፣ ዔቶ ሳኣኖንታ ጉንጎላሢያኣ ኮሻኒ ዴኤሠሞ ዔሮ ባኮና ዋማ ጉዴያ ቢራ ዓንጊና ዋርቁና ኮይሳቴያ ኬኤዜኔ፤

18 ዬያጉዲ ዑንጅ ጩቢሾ ቤዞንታ ፔኤኮ ጋኣዞ ናንጊና ናንጋ ጎዳ ጩኣቁሞ ሳኣፂኖኮ ዑፃ ፒሼ ኪሩቤላ ዴዓ ሳርጌሎ ዖይቶ ኮሺንታሢም ዋማጉዴ ጌኤሺ ዋርቁ ኮይሳቴያ ዓኣ ማሊዖ ኬኤዜኔ፤

19 ካኣቲ ዳውቴ ቃሲ ኬኤዛዖ፡- «ዬይ ቢያ ናንጊና ናንጋ ጎዳ ታ ዒዛኮ ጌኤዡ ማኣሮ ዋማይዲ ማዡንዳጉቴያ ዳዌ ባኮታንቴ ታኣኒ ያኣፔሢኬ» ጌዔኔ።

20 ጋፒንዖይዳ ካኣቲ፣ ዳውቴ ናኣዚ ሴሎሞኔም፡- «ዓካሪ ዒኔ ኩሙሢ ማዓ፤ ደዴ፤ ማዴዋ ዑኬና ዓርቁ፤ ዓይጎ ባኣዚያ ኔና ቃዘፓ፤ ታኣኒ ዒዛም ማዴ፣ ናንጊና ናንጋ ጎዳ ማዔ ታ ያኣዛሢ ኔኤና ዋላኬ፤ ጌኤዡ ማኣሮይዳ ኔ ማዴ ማዴ ማዴ ኔ ጋፒሳንዳያ ሄላንዳኣና ዒ ኔኤፓ ዲማዴዓኬ፤ ሃሃ ሃሻዓኬ፤ ፔቴታዖ ኔና ዒ ኬኤራዓኬ፤

21 ጌኤዡ ማኣሮ ጋሮይዳ ዓኣ ማዴ ማዴ ኩንሣንዳጉዲ ቁኤሶና ሌዊ ዓሶና ዓይሢንቴኔ፤ ሃሃ ዲማ ዲማ ማዴ ዳንዳዓ ዔራቶ ዓኣ

ዓሳኣ ኔና ማአዳኒ ገሊጌኔ፤ ዴሮና ዔያቶኮ ሱኡጋኣ ቢያ ኔኤም ዓይሢንታንዳኔ» ጌዔኔ።

29

ጌኤዠ ማአሮ ማዠም ዲማ ዲማ ዒንጊንቲ ባኮ

1 ዩካፓ ካኣቲ፥ ዳውቴ ቡኪንቲ ዴሮም ጉቤ፡- «ያኦሲ ዶኦሬ ታኣኮ ናዓሢ ሴሎሞኔ ሃጊ ዴጌ፤ ሃሣ ማዲያ ዛገባኣያኮ፤ ሃይ ማዠፎንታ ማአራ፥ ካኣቲሞ ማአሪቱሞንቲ ናንጊና ናንጋ ጎዳ ኑ ያኦዛሢ ካኣሸኪንታ ጌኤሺ ማአሪኮ፤ ሃይ ማዲንታንዳ ባካ ኮሺ ዴኤፒኮ፤

2 ታኣኒ ታ ዳንዳዔሢጉዴያ ጌኤዠ ማአሮ ማዠም ኮይሳ ባኮ ቢያ ገሊጊሺኔ፤ ዩይያ፡- ዋርቆና ማዠ ባኮም ዋርቁ፥ ቢሮ ዓንጎና ማዠ ባኮም ቢራ ዓንጊ፥ ሞኦና ዓንጎና ማዲ ባኮም ሞኦና ዓንጊ፥ ሜሌ ዓንጎና ማዲ ባኮም ሜሌ ዓንጊ፥ ሚያና ማዠንዳሢም ሚያ፤ ዩያጉዲ ሃሣ ማይሊ ኬልቆንዶ ሜሪጊዴ፥ ኬልቁዶኔንታ ዲማ ዲማ ሚዛጳ ሹጮንታ ሚርጌ ዒብኔ ቤሬዴ ጌይንታ ሹጮሞታ ገሊጊሺኔ።

3 ሃያ ታ ገሊጊሺ ባኮይዳፓ ቢያ ዑሣ ያኦሲኮ ጌኤዠ ማአሮም ታኣኮ ዓኣ ዴኤፖ ናሹሞፓ ዔቁያና ታ ባኮይዳፓ ሚርጌ ቢራንታ ዋርቁንታ ታ ዒንጌኔ፤

4 ዩይያ፡- ጭታ ሺያ ኪሎ ማዓ ያፕሬ ዋርቁንታ ያይዲታሚ ሺያ ኪሎ ማዓ ጌኤሺ ቢራ፤ ጌኤዠ ማአሮኮ ኮጮ ኬልቁ ማዠ ሹጮ ሚዛጳ ሳኒ፥

5 ሃኣማ ማዲ ማዲም ማዓ ባኣዚ ታ ዒንጌኔ፤ ዓካሪ ሂንዳ ዒንሢዳፓ ማሊሢና ናሽኪ ናንጊና ናንጋ ጎዳሢም ዒንጋይ ያናዳይ?» ጌዔኔ።

6 ዩካፓ ዲማ ዲማ ቶኦኮና ፃጳናኮ ሱኡጋ፥ ሺዮና ጭቶ ፖኦሊሶ ዓይሣ ዓሳ፥ ማዲ ማዲ ቢታንታ ዓኣ ዓሳ ናሹሞና ዒንጎ ባኣዚ ዒንጌኔ።

7 ዩያ ዔያታ ዒንጌሢ፡- ጭታና ላንካይታሚ ሺያ ኪሎፓ ባሻ ዋርቁ፥ ሃይሣ ጭታና ያይዲታሚ ሺያ ኪሎፓ ባሻ ቢራ ዓንጊ፥ ላሆ ጭታና ላማታሚ ሺያ ኪሎ ማዓ ሞኦና ዓንጊንታ ሃይሣ ሚሎኔና ያይዶ ጭታ ሺያ ኪሎፓ ባሻ ዓንጊ፤

29:2 1 ያሳሊ. ዓሃኬ 22:5።

8 ሚዛዳ ሹጫ ዓሳ ዓሳኣ ቢያ ጌኤዮ ማኣርዮ ሚሆ ጌሆ ማኣርይዳ ጌልዚ ጌሆንዳጉዲ ለዌ ዓሢ ጌርሸኔ ቶኦኪ ማዔ ዪሂዔኤሌም ዒንጌኔ።

9 ዴራ ፔ ቶኦኪና ናሽኪ ጉቤ ዒናፓ ናንጊና ናንጋ ጎዳም ዒንጌኔ፤ ሚርጌ ባኣዚ ዒንጊንቴሢር ዴራ ኮሺ ዋዛዴኔ፤ ካኣቲ ዳውቴያ ዑሣ ዓኣዴ ዋዛዴኔ።

ዳውቴ ናንጊና ናንጋ ጎዳ ጋላቲ ሺኢቄ ሺኢጲዎ

10 ዳውቴ ዒማና ዪያ ዓሶኮ ቤርታ፡- «ኦኡኮ ቤርታኣ ዓዳሢ ዒሰራዔኤሌኮ ያኦሲ ማዔ ናንጊና ናንጋ ጎዳሢዮ! ናኣናና ጋላቲንቴያ ማዔ፤

11 ያኦሲዮ፤ ጫሪንጮና ሳዖናይዳ ዓኣሢ ቢያ ኔኤርኮኔ፤ ኔኤኒ ቢያፓ ባሽ ዴኤፒ ዋልቄና ዓኣያኮ፤ ቦንቸና ሚዛዴሞና ዲቃሢ ሄርሺሲሢሢኣ ኔኤኒ ኩሚያኮ፤ ኔ ቢያፓ ባሽ ዑሣ ዴግ ጌዔያ፤ ሃሣ ቢያ ባኮ ዑፃ ኔኤኒ ቢታንቶ ዓኣ ካኣቲኮ፤

12 ዖርጎቹሞንታ ቦንቸንታ ቢያ ጴዳሢ ኔጊዳፓኮ፤ ኔኤኒ ኔ ደዲሞና ዋልቆና ቢያ ባኣዚ ዋይሣኔ፤ ኔ ናሽኮ ዓሲ ዴኤፒ፡ ሃሣ ደዲ ማሃኒ ዳንዳዓኔ።

13 ኦ ያኦዛሢዮ! ኦ ኔና ጋላታኔ፤ ኔኤኮ ቦንቸንቴ ሱንዖዋ ኦ ሄርሻኔ።

14 «ታኣና ታ ዴርና ኔኤም ኦ ዒንጋንዳ ባኣዚ ዓይጌያ ኦኡኮ ባኣሴ፤ ዓይጎር ጌዔቴ ቢያ ባኮ ኔጊዳፓ ዔኮ ባኮኮ ኦ ዒንጋሢ፤ ዓካሪ ኔኤሲታንቴ ማሂ ኦ ኔኤም ዒንጌኔ፤

15 ኦ ያኦዛሢዮ! ኦኡኒያ ኦኡኮ ቤርታኣ ዓዳንሢጉዲ ኔ ቤርቶይዳ ዒዳ ዳኪንቴያና ቤሲባኣ ሸኦቹኮ፤ ሳዖይዳ ናንጎ ዋዳ ኦኡኮ ሺቢጉዲኮ፤ ሃሣ ሃጊ ማዓንዳ ዋዛኣ ባኣያኮ።

16 ናንጊና ናንጋ ጎዳ ማዔ ኦ ያኦዛሢዮ! ሃያ ቢያ ቆሎ ኦ ቡኩሴሢ ኔኤኮ ደማዴ ሱንዖም ቦንቸንቴ ጌኤሺ ማኣሪ ማዣኒኮ፤ ያዲ ማዔቴያ ቢያሢ ጴዳሢ ኔጊዳፓኮ፤ ቢያ ባካ ኔኤሲኮ፤

17 ኔኤኒ ዓሲኮ ቢያ ዒኔ ዛጊ፡ ጉሙርቁንቴያ ማዓ ዴሪና ዋዛዴያ ማዔሢ ታ ዔራሪ፤ ዪያር ታኣኒ ሃያ ቢያ ታ ማሊሢና ናሽኪ ኔኤም ዒንጌሢ ጉሙርቁንቴሢር ፒዙሞናኮ፤ ዪያጉዲ ሃሣ ሃካ ኔኤኮ ቡኪንቴ ዴራ ኔኤም ዒንጌ ባኮና ኮሺ ዋዛዴሢ ታ ዴንቄኔ፤

18 ኦኡኮ ቤርታኣ ዓዳንሢ ዓብራሃሚንታ ዪሳኣቁንታ ያይቆኦቤንታኮ ጎዳ ማዔ ያኦዛሢዮ! ሃይ ዴኤፓ ናሹማ ኔኤኮ ዴር ዒና ናንጊና ደዲ ናንጋንዳጉዲ ማሄ፤ ቢያ ዋዳ ኔኤም ዔያታ ጉሙርቁንታያ ማዓንዳጉዲ ማሄ፤

29:11 ማቲ. 6:13።

19 ኔኤኒ ዓይሄ ባኮ ቢያ ማዲ ኩንሣንዳጉዲና ሃያ ቢያ ታ ዒዛም ጌኤዠ ማኣር ማዠንዳጉዲ ጌኢጊሼሣ ማዳንዳጉዲ ታ ናሳሣ ሴሎሞንም ጉቤ ዒናገ ማዔ ዔኤዒሣ ዒንጌ» ጌዔኔ።

20 ዩካፓ ዳውቲ ዴሮም፡- «ናንገና ናንጋ ጎዳ ማዔ ዒንሣኮ ያኣዛሣ ጋላቱዋቲ!» ጋዓዛ፡ ቡኬ ዓሳ ጉቤ ዔያቶኮ ቤርታኣ ዓደንሣኮ ጎዳ ማዔ ያኣዛሣ ጋላቲኔ፤ ሊካ ሳዖ ባንሣ ሂርኪ ጌዒ ያኣሲንታ ካኣቲንታም ዘገገ ቦንቼኔ።

21 ዩኖኮ ዚሮ ጉቲሎ ሚርጌ ቆልሞ ሹኪ ያኣሲም ዒንጎ ባኣዚ ማሃ ዔያታ ሺኢሼኔ፤ ዩካፓ ዴራ ሙዓንዳጉዲ ዒንጌኔ፤ ዒማና ፔቲ ሺያ ዚያ ጌማይ፡ ፔቲ ሺያ ዓዴ ማራይና ፔቲ ሺያ ማራናይ ሚቺ ዒንጎ ዒንገሣ ማሃ ሹካዖ ያኣሲም ዒንገይ ዒንጎ ቤዘ ዑፃ ጉቤ ሚቼኔ፤ ዋይናፓ ኮሾና ዑዠዋ ያኣሲም ዒንገሣ ማሃ ሺኢሼኔ፤

22 ናንገና ናንጋ ጎዳ ቤርታ ዩኖ ዓሶ ሙዒ ዑሸኪ ዑሸኪ ኮሺ ዋዛዲ ዔያታ ፔኤቄኔ።

ዩኖ ዓሶዋ ሴሎሞን ካኣቲ ማዔሣ ዔርዚሣ ማዓ ባኣዚ ላምዓሲ ማዳኔ፤ ናንገና ናንጋ ጎዳ ሱንዖናኣ ደኣሚ ዔያታ ዒዛ ካኣታሣኔ፤ ሳደቄ ጎዖሣያኣ ቄኤሴ ማሃ ዔያታ ደኣሬኔ።

23 ዩያይዲ ሴሎሞን ዓደ ቤዛ ጌሊ ናንገና ናንጋ ጎዳ ዒዛም ደዲሹ ካኣቱም ዓልጋ ዴዔኔ፤ ዩካፓ ቢያ ባኣዚ ዒዛም ጌኢጌ ካኣቲ ማዔኔ፤ ዒሰራዔኤሌ ዴራኣ ጉቤ ዒዛም ዓይሣንቲኔ።

24 ቢታንታ ዓኣ ዓሶንታ ፖኦሊሶንታ ዳውቲ ናኣታታዖ ዓቱዋ ካኣቲ ሴሎሞንም ጉሙርቄንታ ዓሲ ማዓንዳሣ ጫኣቄኔ።

25 ናንገና ናንጋ ጎዳ ዩኖ ዓጮ ዴሮ ቢያሣ ቤርታ ዴግ ዴጊዲ ሴሎሞን ቦንቼሴኔ፤ ዒዛኮ ቤርታ ዒሰራዔኤሌ ዓሶ ዋይሣ ካኣቶፓ ቢያ ዑሣ ባሽ ዒዛ ቦንቼሴኔ።

ዳውቲኮ ካኣቱም ዋደ ሃይሶ ቃሚሣና

26 ዒሴዩ ናኣዚ፡ ዳውቲ ዒሰራዔኤሌ ዓጮይዳ ካኣታዲ ዋይሣኔ፤

27 ዒዚ ኩብሮኦኔይዳ ዴዒ ላንካይ ሌዔ፡ ዩፋላሚይዳ ናንጌ ሃይሣታሚ ሃይሣ ሌዔ፡ ዋሊ ዑፃ ዖይዲታሚ ለዔ ካኣታዳኔ፤

28 ዩካፓ ሚርጌ ቆሎንታ ቦንቸዋ ዴንቄሰካፓ ኮሺ ጋርቺ ሃይቄም፡ ዒዛ ቤዛ ናኣዚ ዒዛኮ ሴሎሞን ካኣታዳኔ፤

29 ዓይፃፓ ዴንዲ ጋፓ ሄላንዳኣና ካኣቲ ዳውቲኮ ዓኣ ሃይሳ ያኣሲ ማሊዖ ኬኤዛ ሳሙዔኤሌ፡ ናኣታኣኔንታ ጋኣዴ ጌይንታ ሃይሣ ዓሳ ፃኣፔ ሃይሶ ማፃኣፓ ፃኣፒንቲ ዓኣኔ።

29:23 1ካኣቶ. ማ 2:12። 29:27 2ሳሙ. 5:4-5፤ 1ያሕሲ. ዓሃኬ 3:4።

30 ዳውቲ ዎመይዲ ፔ ዓጮ ዎይሄቲያ፡ ዎዚጉዴ ዎልቄ
ዒዛኮ ዓኣቲያ፤ ዒዛንታ ዒሰራዔኤሌ ዓጮንታይዳ፡ ዬያጉዲ ሃሣ
ኮይሎይዳ ዓኣ ካኣቶይዳኣ ሄሌ ባኮ ዛላ ቢያ ዬንሢ መፃኣፖንሢዳ
ፃኣፒንቲ ዓኣኔ።

ጌሌዢ ማጻሕፍት
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዢ ማጻሕፍት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929